

## I. XEDAPEN OROKORRAK

### ESTATUKO BURUZAGITZA

**8187** *11/2013 Legea, uztailaren 26koa, ekintzaileei laguntzeko eta enpleguaren sorrera eta hazkundera suspertzeko neurriei buruzkoa.*

JUAN CARLOS I.a  
ESPAINIAKO ERREGEA

Honako hau irakurtzen duten guztiek jakin dezaten.  
Jakin ezazue: Gorte Nagusiek ondoko lege hau onetsi dutela, eta Nik, hemen, berretsi egiten dudala.

#### HITZAURREA

I

Bizitasun handikoa da Espainiako ekonomia, eta horren erakusgarri da azken hamarkadetan izan duen garapen itzela. Urte horietan guztietan, nazioartera zabaldu da, eta hazteko aukera ugari baliatzeko modua izan du.

Hala ere, desoreka ekonomikoak eta finantzarioak pilatu dira garapen-prozesu horretan. Espainiak urratsak eman ditu 2012. urtean bere ahuleziak zuzentzeko, politika ekonomikoko estrategiak garapen orekatu baterako trantsizioa egin nahi izan baitu, eta hazkunderaren oinarriak finkatu, enplegua sortzeko.

Testuinguru horretan, hiru helburu nagusi hauek dituzte Espainian 2012. urtearen hasieratik egiten ari diren egiturazko erreformek: lehenik eta behin, egonkortasun makroekonomikoa eman nahi diote Espainiako ekonomiari, bai defizitaren eta inflazioaren alderdietan, bai kanpo-orekaren alorrean. Bigarren helburua da finantza-erakunde sendo eta kaudimendunak izatea, inbertsio produktiboetara bideratzeko berriro ere kredituak. Azkenik, malgutasun-maila handi bat lortu nahi dute neurriek, prezio eta soldata erlatiboak doitzeko, eta, horren ondorioz, gure ekonomiaren lehiakortasuna handitzeko.

Jarduera horiek guztiek bultzatuta, ekonomia berrindartzeko oztopo handienetako batzuk gainditu dira. Edonola ere, erreformen bideari jarraitu behar zaio, ekonomiaren hazkuntzan sakontzeko eta enplegua sortzeko.

Hori horrela, politika ekonomikoko estrategia horren hirugarren arloa lantzeko, mantendu eta amaitu egin nahi dira hasita dauden jarduerak, eta, horrez gain, egiturazko erreformen bigarren neurri-multzo bat abiaraziko da, beharrezkoak baitira berriro hazteko eta enplegua sortzeko.

Espainiako enpresa-sarearen baitan, garrantzi kuantitatibo eta kualitatibo nabarmena dute enpresa txiki eta ertainek eta autonomoek. Azterlanek egiaztatu dute enpresa eta ekintzaile-mota horiek direla, hain justu, Espainiako ekonomiaren suspertzaile nagusietako batzuk, enplegua sortzeko gaitasuna eta balioa sortzeko potentziala duten aldetik.

Hala ere, azken urteotan, eragile ekonomiko horien jarduera ekonomikoak behera egin du, eta haien jardun-testuingurua (lan-esparrua, fiskalitatea, erregulazioa eta finantza-alorra) kaltegarri izan zaie, ezin izan baitiote eutsi aldaketetara egokitzeko gaitasunari. Horrez gainera, bankuekiko egiturazko mendetasuna izan ohi dutenez finantziarioa lortzeko, handitzeko gaitasuna mugatuta suerta dakieke gaur egunean bizi ditugun baldintzetan.

Enpresa-jarduerak egiteko araubideak eta esparru instituzionalak berebiziko garrantzia dute produktibitate-etekinak indartzeko eta baliabideak optimizatzeko.

Horrenbestez, behar-beharrezkoa da herri-administrazioek hori guztia bultzatzea eta enpresa-ekimenak erraztea, eta beharizan hori are premiazkoagoa da egungo egoera

ekonomikoan. Kultura ekintzailea sustatuko duen ingurune bat ezarri behar da, eta enplegua eta balio erantsia ekarriko duten enpresa-proiektuak sortu eta garatu behar dira.

Ekimen ekintzaileei, enpresa-garapenari eta enplegu-sorrerari ematen zaion laguntza da errege lege-dekretu honek araututako neurriak antolatzeko ildo komuna.

Alde horretatik, lege honek premiazko neurriak hartzen ditu Enpresa-ekimeneko eta Gazte Enplegurako Estrategia lantzeko, enpresak beste merkatu batzuen bidez finantza daitezen sustatzeko, merkataritza-eragiketen berankortasuna murrizteko eta, oro har, Espainiako ekonomiaren lehiakortasuna indartzeko.

## II

Gazteen langabezia egiturazko arazoa da Espainian, eta arazo hori larritu egin da krisiarekin. Horrek ondorio larriak dakarzkie gaur egun gazteei eta gerora ere ondorio larriak ekarriko dizkie; horrez gainera, egoerak mugatu egiten du Espainiako ekonomiak epe luzean hazteko duen potentziala.

Espainiak, 2012ko hirugarren hiruhilekoan, % 54,1eko langabezia-tasa izan zuen 25 urtetik beherako pertsonen artean. Tasa hori, Eurostat erakundearen datuen arabera, % 23koa izan zen 27 herrialdeko Europar Batasunean.

Biztanleria Aktiboaren Inkestak (BAI) banakatuta argitaratu dituen datuei erreparatzen badiegu, ikusten dugu 16 eta 19 urte bitarteko gazteen langabezia-tasa % 74koa izan dela 2012ko laugarren hiruhilekoan, % 51,7koa 20 eta 24 urte bitarteko gazteen artean, eta, azkenik, % 34,4koa izan dela 25 eta 29 urte bitartean dituzten gazteen artean.

Ekonomiak egun bizi duen egoerak badu eraginik gazteen langabezia-egoera horretan, eta, alde horretatik, agerikoa da, era berean, egiturazko ahuleziek ere eragin zuzena dutela gazteen langabezia-ehunekoetan. Ahulezia horiek indartzea da, hain justu, lortu nahi den helburua. Hona egiturazko ahulezia horiek: handia da eskola uzten duten ikasleen ehunekoak, bikoiztu egiten baitira 27 herrialdeko Europar Batasuneko ehunekoak; lan-merkatua oso polarizatua ageri da, izan ere, gazte batzuek kualifikazio eskasarekin uzten dituzte ikasketak, eta, beste batzuek, kualifikazio handikoak, ez dute lekurik topatzen lan-merkatuan; maila ertaineko Lanbide Heziketak ez du behar adinako pisurik lan-merkatuan, eta gazteen enplegarritasuna txikia da, batik bat atzerriko hizkuntzen jakintza-mailaren ondorioz; handiak dira aldi baterako lanen eta gogokoak ez diren kontratazio partzialen ehunekoak; gizarte-bazterketako arriskua duten giza taldeek zaila dute lan-merkatuan sartzea; eta, azkenik, gazteen autoenplegua eta enpresa-ekimenak hobetu behar direla adierazi behar da.

Arauren I. tituluak Enpresa-ekimeneko eta Gazte Enplegurako 2013-2016 Estrategia lantzen du, eta haren xedea da gazteen langabezia murrizteko neurriak sustatzea, bai besteren konturako laneratzearen bidez, bai autoenpleguaren eta ekintzailatzaren bidez. Gizarte-eragileekiko elkarrizketa- eta partaidetza-prozesuaren ondoriozko emaitza da titulu hori.

Horrez gainera, tituluak bete egiten ditu Europako Batzordeak gazte-enpleguaren alorrean eman dituen gomendioak, eta Gobernuak abiarazi duen Erreformen Plan Nazionalaren baitan kokatzen da. Hori horrela, Europako «Gazte Bermearen» ildoari jarraitzen dio eta Europar Batasuneko esparruetatik proposatzen diren gomendio espezifiko eta jarduera-ildo gehienak lantzen ditu.

Tituluaren helburuak dira gazteen enplegarritasuna hobetzea, enpleguak kalitate handiagokoak eta egonkorragoak izatea, laneratze aukera-berdintasuna sustatzea eta ekintzailatza bultzatzea. Estrategia antolatzen duten ardatzak dira: kontratazioak eta enpresa-ekimenak sustatzea gazteengan, lan-merkatuaren egoerara egokitzea gazteek jasotzen duten heziketa eta prestakuntza, eta eskola goiz uzten duten ikasleen tasa murriztea.

Hori egin ahal izateko, gazteak besteren kontura edo ekintzailatzaren bidez lanera daitezen errazteko neurri batzuk ezarri ditu Estrategiak, haien eraginaren eta denbora-erazpenaren arabera sailkatuta.

Estrategiak partaidetzarako bide izan nahi du haren helburuak lortzen lagundu nahi duten erakunde publiko eta pribatu guztientzat, enpresentzat eta denetariko organizazioentzat.

Partaidetza hori gauzatzeko, bitarteko edo tresna irekia da plana, eta harekin bat egiteko aukera ematen die ekimen propioen bidez eta alderdi guztietatik (ekintzaitza, autoenplegua, etab.) gazte-enpleguaren erronkari aurre egin nahi dioten eragile guztiei. Ikur edo bereizgarri bat izango du Estrategiak, eta emandako laguntzaren aitortpen gisa erabili ahal izango da.

Gizarte-eragileekin elkarrizketatu eta partaidetza-prozesu bat egin ondoren prestatu da neurri-multzoko hori. Horrez gainera, lan autonomoaren eta gizarte-ekonomiaren alorreko erakunde eta elkarte nagusien iritzia jaso da.

Lege honek lehen neurri-multzoko bat abiarazten du, eta espero da eragin onuragarria izango duela gazteen langabezia-tasa murrizteko eta enpleguaren kalitatea eta egonkortasuna handitzeko.

Arauaren I. tituluko I. kapituluak, neurriak hartzen dira enpresa-ekimenak eta norberaren konturako lana sustatzeko 30 urtetik beherako gazteen artean. Neurri horien artean, nabarmentzekoak dira: hastapeneko kuota murriztu bat ezartzen dela, bateragarri egiten direla langabezia-prestazioa jasotzea eta norberaren konturako jarduera hastea, eta langabezia-prestazioaren kapitalizazioa gauzatzeko aukerak handitzen direla.

Neurri horien osagarri, langile autonomoentzat onuragarriagoa den esparru fiskal bat arautzen da, baldin eta jarduera ekintzaile bat abiarazi behar badu, enpresaren bat sortzeko. Langile horiek, gainera, zerga-zama arinagoa izango dute jardueraren lehen urteetan.

Hori horrela, Sozietateen irabazien gaineko Zergan, ehuneko 15eko zerga-tasa arautu da zerga-oinarriko lehen 300.000 euroentzat, eta ehuneko 20koa hortik gorako gaindikinentzat. Tasa horiek aplikatuko dira erakundeen zerga-oinarria positiboa den lehen zergaldian eta haren ondorengo zergaldian.

Ildo horretako neurrien harian, eta jarduera ekintzaileak abian jar daitezten sustatzeko, Pertsona Fisikoen Errentaren gaineko Zergan ehuneko 20ko murriztapen berri bat arautu da jarduera ekonomiko bat abiarazi duten zergadunek beren jarduera ekonomikoengatik izan dituzten etekin garbiak zergapetzeko. Tasa hori aplikatuko da erakundeen zerga-oinarria positiboa den lehen zergaldian eta haren ondorengo zergaldian.

Zerga horretan bertan, Pertsona Fisikoen Errentaren gaineko Zergan, kendu egin da ordainketa bakarreko langabezia-prestazioen salbuespenak zuen muga.

Gazteak gizarte-ekonomiako enpresetan sar daitezten sustatzeko neurriak arautzen dira III. kapituluak, baita lanik gabe dauden gazteak kontratatuzko pizgarriak ere. Pizgarri horien artean, nabarmentzekoak dira prestakuntzari lotutako lanaldi partzialeko kontratuak egiteko pizgarriak, mikroenpresek eta enpresaburu autonomoek gazteei kontratu mugagabeak egiteko pizgarriak, eta praktika-kontratuak egitekoak.

Horrez gainera, gazte autonomoek pertsona hauek kontrata ditzaten sustatzen da: lanik gabe denbora luzean izan eta 45 urte baino gehiago dituzten langabeak, eta gazteak, lehen lan-esperientzia izan dezaten.

Lan-bitartekaritza hobetzeko neurriak arautzen ditu IV. kapituluak; izan ere, bitartekaritza eraginkorra izango bada, kendu egin behar dira eskuragarri dauden lanpostuak azkar betetzeko izan daitezkeen traba guztiak, eta pertsona guztiei eman behar zaie lan-eskaintzen berri izateko aukera. Horretarako, enplegu-zerbitzu publikoek Enplegu Zerbitzu Publikoen Informazio Sistemak erregistratu behar dituztela enplegu-eskari eta -eskaintza guztiak ezarri da (abenduaren 16ko 56/2003 Legeak, enpleguari buruzkoak, arautzen du sistema hori). Horrenbestez, ziurra da informazio hori herritar, enpresa eta herri-administrazio guztien eskura izango dela, merkatuaren gardentasuna eta batasuna bermatzeko.

Lan-bitartekaritza hobetzeko ildo horri berari jarraituz, lege honek aldatu egiten du Sektore Publikoko Kontratuak Legeko testu batekina, azaroaren 14ko 3/2011 Legegintzako Errege Dekretuak onartua, Estatuko Enplegu Zerbitzu Publikoak, esparruhitzarmenak hitzartzeko aukera izan dezaten autonomia-erkidegoetan eskumendun diren

kontratazio-organoek eta, haien mendekoak izanik, Enplegu Sistema Nazionalen sartuta dauden erakunde eta entitateek. Esparru-hitzarmen horien helburua izango da zehaztea zer baldintza bete beharko dituzten zerbitzu-kontratuek, enplegu-zerbitzu publikoen lan-bitartekaritzako eginkizuna bideratzeko.

### III

Enpresen finantziazioa sustatzeko neurri batzuk arautzen dira II. tituluan, premiaz hartu beharrekoak direnak gaur egun bizi dugun egoera ekonomikoan.

Aseguru pribatuak antolatu eta ikuskatzeko erregelamendua aldatzen da, aseguru-etxeek Burtsa Merkatu Alternatiboan negoziagarriak diren baloreetan inbertitzeko aukera izan dezaten. Inbertsio horiek baliozkoak izango dira hornidura-teknikoen estaldura gauzatzeko.

Ildo horri berari jarraituz, Pentsio-plan eta -funtsen Erregelamendua aldatzen da, pentsio-funtsek aukera izan dezaten Burtsa Merkatu Alternatiboan negoziagarriak diren baloreetan eta arrisku-kapitaleko entitateetan inbertitzeko. Azken kasu horretan, funtsaren aktiboaren % 3a izango da gehienezko muga espezifiko entitate bakoitzean inbertitzeko.

Azkenik, bankuez besteko finantziario eskuratzeko bideak erraztu nahi zaizkie Espainiako enpresei, eta, horretarako, Kapital Sozietateen Legeko 405. artikulua arautzen duen muga kendu behar da; izan ere, artikulua horrek esaten du sozietateen jaulkipenen zenbateko osoak ezin duela izan jarritako kapital sozialak eta erreserbek osatzen duten zenbatekoa baino handiagoa. Arau-aldaketak kendu egiten du muga hori alde anitzeko negoziatio-sistemetan inbertitzen denerako (merkatu arautuetan gertatzen denaren ildoari jarraitzen zaio). Jaulkipenak inbertitzaile instituzionalei zuzenduak direnean soilik malgutuko da artikulua horrek ezarritako muga, behar bezala babestu nahi baitira txikizkako inbertitzaileak. Horrela jokatuta, merkatu alternatiboak garatzeko aukerak zabaltzen dira, eta, zehazki, alde anitzeko negoziatio-sistema moduan antolatutako merkatuak garatzekoak; hala, Espainiako enpresa txiki eta ertainen finantziario hobetzeko abiarazi diren proiektuen ildoari jarraitzen zaio, eta atea irekitzen zaie berariaraz enpresen zorrak negoziatzen dituzten merkatuei.

### IV

Toki-erakunde eta autonomia-erkidego batzuek bizi duten egoera ekonomiko zaila arintzeko, Gobernuak, iaz, otsailaren 24ko 4/2012 Errege Lege Dekretua eman zuen, toki-administrazioko entitateen hornitzaileei ordaintzeko finantzaketa-mekanismo bat ezartzeko informazio-betebeharrak eta beharrezko prozedurak ezartzen dituena. Gerora, toki-administrazioentzat zabalduko bide hori autonomia-erkidegoen eskura jarri zen, Politika Fiskal eta Finantzarioko Kontseiluak 2012ko martxoaren 6an erdietsi zuen Akordioaren bidez. Horrez gainera, hornitzaileei ordaintzeko Finantziario Funtsekin bat eratu zen martxoaren 9ko 7/2012 Errege Lege Dekretuaren bidez.

Arau horiek aparteko mekanismo bat ezarri dute toki-erakunde eta autonomia-erkidegoen hornitzaileekiko zorrak ordaindu eta kitatzeko. Mekanismo horren bidez, erakunde publikoek kontratistekiko dituzten zorrak ordain ditzakete, eta, era berean, epe luzerako maileguak formaliza ditzakete zorpetutako herri-administrazio horiek. Hala ere, mailegu horiek formalizatzeko, baldintza fiskal eta finantzario jakin batzuk bete behar dituztela arautu da, eta baldintza horietako bat da doikuntza-planak ezarri behar dituztela.

Lege honen III. tituluko I. kapituluko xedapenek mekanismo horren fase berri bat arautzen dute, eta, horrekin batera, haren aplikazio-eremu subjektiboa eta objektiboa zabaltzen dute. Halaber, prozedura-xehetasun batzuk arautzen dira, fase berrirako beharrezko direnak.

Ildo horretan, arauaren aplikazio-eremuan sartu dira Euskal Autonomia Erkidegoko eta Nafarroako udal-mankomunitateak eta toki-erakundeak.

Aplikazio-eremu objektiboari dagokionean, ordaindu gabeko obligazioen sorkari izan behar dute, besteak beste: hitzarmenak; administrazio-emakidak; kudeatzeko gomendioak, baldin eta gomendioa jaso duen erakundea bitarteko propioa eta

Administrazioaren zerbitzu teknikoa bada; ondasun higiezinak errentamendu-kontratuak; urriaren 30eko 31/2007 Legeak araututako kontratuak (31/2007 Legea, ur, energia, garraiobide eta posta zerbitzuen sektoreetako kontratazio prozedurei buruzkoa); herri-lanen emakida-kontratuak; sektore publikoaren eta sektore pribatuaren arteko lankidetzakontratuak; eta zerbitzu publikoak emakidaren modalitatean kudeatzeko kontratuak, baldin eta toki-erakunderen baten edo autonomia-erkidegoren baten konturako diru-laguntza bat hitzartu bada.

Kontuan izan behar da, hala ere, aurrekontuetan kontabilizatu eta aplikatutako obligazio ordaindu gabeak soilik sar daitezkeela zabalduko eremu objektibo horretan.

Xedapen orokorren 1. sekzioak lehen kapituluaren xedea arautzen du, hau da, hornitzaileei ordaintzeko finantzazio-mekanismoaren eremu subjektiboa eta objektiboa handitzea eta beharrezkoak diren espezialitate edo xehetasunak ezartzea.

Toki-erakundeei aplikatzekoak zaizkien xedapenak arautzen ditu 2. sekzioak, eta adierazi berri ditugun irizpideen arabera zehazten ditu haien aplikazio-eremu subjektiboa eta objektiboa; hala, informazioa emateko prozedurari dagozkion xehetasunak arautzen ditu, batik bat udal-mankomunitateei buruzkoak, eta doikuntza-planei dagozkien xehetasunak.

Autonomia-erkidegoei aplikatzekoak zaizkien xedapenak arautzen ditu 3. sekzioak, eta haiekiko aplikazio-eremu subjektiboa eta objektiboa zehazten ditu. Horrez gain, informazioa emateko obligazioaren eta fakturen ordainketaren prozedura-xehetasunak arautzen ditu, eta agintzen du hitzartzen diren kreditu-eragiketa berrien arabera berrikusi behar direla doikuntza-planak. Horrez gainera, finantzazio eratxekia duten obligazio ordaindu gabeak nola kitatu behar diren adierazten du.

Europar Batasuna eta Espainia bereziki ari dira zaintzen azkenaldian enpresen arteko kontratu-zorrik ordaintzeko berankortasuna, enpresen eta herri-administrazioen arteko zorrik ordaintzeko berankortasuna eta zorrik ordaintzeko epeak. Horren arrazoia da kezka sortzen duela berankortasunak eta ordainketa-epe luzeegiek enpleguarekiko, lehiakortasunarekiko eta enpresen beraien biziraupenarekiko dituzten ondorio kaltegarriak.

Europako Parlamentuak eta Kontseiluak 2000/35/EE Zuzentaraua eman zuten 2000ko ekainaren 29an merkataritza-eragiketetan berankortasunaren aurkako neurriak ezartzeko, eta Espainiak abenduaren 29ko 3/2004 Legearen bidez egin zuen arau horren transposizioa.

Europar Batasunak 2000/35/EE Zuzentaraua berrikusteari ekin zion garaian, bertako legearen aldaketa prestatzeari ekin zion Espainiak, eta aldaketa hori uztailaren 5eko 15/2010 Legearekin gauzatu zen; lege horrek abenduaren 29ko 3/2004 Legea aldatu baitzuen, merkataritza-eragiketen berankortasunaren aurkako neurriak ezartzeko.

Arau horrek zenbait neurri aurreratu zituen, merkataritza-eragiketen berankortasunaren aurkako neurriak ezartzen dituen Europako Parlamentuaren eta Kontseiluaren 2011ko otsailaren 16ko 2011/7/EE Zuzentarauak gerora arautu zituenak 2000. urteko beste zuzentarau bat ordeztu zuen arau horrek. Aurreratutako neurri horietako bat ordainketa-epeena izan da, eta eraginak izan ditu, besteak beste, sektore publikoan.

Egia da Espainiako zuzenbideak, arau-aldaketa horren ondoren, bete egiten dituela, oro har, Europar Batasunaren eskakizun berriak, baina badira zenbait alderdi bat ez datozenak arau horiekin, eta, ondorioz, ezinbestekoa da abenduaren 29ko 3/2004 Legea aldatzea. Eta horixe bera egiten du, hain zuten, lege honetako III. tituluko bigarren kapituluak.

Ordainketa-epeak zehazteko modua da arau honek aldatzen duen lehen gauza, modu sinpleago bat arautzen baitu. Ordaintzeko epeak eta epe horiek zenbatzeko moduak zehazten ditu arauak, eta zorren onarpenerako eta egiaztapenerako prozedura berri bat aurreikusten du, ez daitezkeen bata zein bestea ordainketak berandutzeko erabili.

Arauen xedapen batek agintzen du zer ordainketa-egutegi izango diren eta nola kalkulatu diren interesak, baldin eta ez bada hitzartutako egunean egiten ordainketaren bat.

Arauk aldatu egiten du, era berean, zordunak ordaindu beharko duen berandutzagatik legeko interes-tasa, zazpi puntukoa izatetik zortzi puntukoa izatera

igaroko baita. Europako Banku Zentralak bere azken finantzazio-eragiketa nagusiari aplikatutako interes-tasa gehitu behar zaio zenbateko horri.

Kobranta-kostuen kalte-ordainaren alorrean, arauak agintzen du hartzekodunari 40 euroko zenbateko finko bat ordaindu behar zaiola, aurretik eskatu beharrik izan gabe. Zenbateko hori gehitu egingo zaio zor den dirua kobratzeko egin behar izan diren gastuen erreklamazioagatik dagozkion zenbatekoei. Horrez gainera, kendu egin da kalte-ordain horrek zuen muga, ezin baitzen izan zor nagusiaren ehuneko 15ekoa baino handiagoa. Kalte-ordain horretan sar daitezke, besteak beste, berandutzak hartzekodunari eragin dizkion gastuak, abokatu bat kontratatu behar izan duelako edo kobrantza kudeatzeko agentzia bat kontratatu behar izan duelako.

Apirilaren 13ko 7/1998 Legeak, kontratazio-baldintza orokorrei buruzkoak, arautzen duenaren ildotik, arau honek dakarren beste berrikuntzetako bat da, hain justu, abusuzko klausulatzat, eta, ondorioz, klausula deuseztat joko direla kobrantza-kostuengatik kalte-ordainak bazterten dituzten klausulak. Klausula horiek legearen kontrakoak izango dira, salbu eta zordunak behar bezala frogatzen badu hori hitzartzea ez dela abusuzkoa. Arau honek kontuan hartzen du, halaber, merkataritza-jardueren bidez urra daitekeela lege hau, eta, ondorioz, arautzen du jarduera horiek abusuzkoak izango direla eta araubide bera bete beharko dela haiek aurkaratzeko.

## V

Egungo egoera ekonomikoaren nolakoa ikusita, trenbide-sektorea arrazionalizatzeko neurri gehiago hartu behar dira, trenbide-zerbitzuen kudeaketaren efizientzia-maila handiena lortu eta abian jarrita dauden liberalizazio-prozesuak indartzeko.

Helburu horiek lortzeko eta Estatuako trenbide-azpiegituren kudeaketa bateratzeko, trenbide-azpiegiturak administratzeaz arduratzen den enpresa-entitate publikoaren esku utzi behar da Estatuaren trenbide-sarea, hau da, ADIF izeneko entitatearen esku utzi behar da. Hori eginda, Estatuaren titulartasunpeko sarean biltzen diren trenbide-azpiegiturak eta geltokiak, ADIF entitateak administratzen dituenak, entitate horren titularitatepekoak izango dira; hala, eraginkortasunaren mesedetan, entitate bakarrean bilduko dira sarearen titulartasuna eta administrazio-funtzioak.

Bestalde, trenbide-azpiegituren eta -zerbitzuen arloan neurriak hartzen dituen uztailaren 20ko 22/2012 Errege Lege Dekretuak arautzen du lau merkataritza-sozietatetan berregituratuko dela RENFE-Operadora erakundea, eta haiek hartuko dituztela gaur egun erakunde horrek bere gain hartzen dituen funtzio edo eginkizunak; hala nola, bidaiarien eta salgaien garraioa. Jardunean aritzeko, trenbide-sektoreko legedia bete behar dute merkataritza-sozietate horiek, eta legedi horrek arautzen du haiek eratzean trenbide-enpresen lizentzia izan behar dutela, segurtasun-ziurtagiria eta azpiegitura-gaitasun egokia.

Aldaketa batzuk egiten dizkio arau honek trenbide-sektoreari buruzko azaroaren 17ko 39/2007 Legeari. Lehenik eta behin, Konstituzio Auzitegiak abenduaren 18an eman zuen 245/2012 sententzia betetzen da, interes orokorreko trenbide-sarearen kontzeptua zedarritu zuen aldetik. Nabarmendu beharrekoa da Interes Orokorreko Trenbide Sareko linea eta bide-zatien katalogo bat ezarri eta onartu behar duela Sustapen Ministerioak. Hura onartu aurretik, sareak zeharkatuko dituen autonomia-erkidegoekin hitz egingo du ministerio horrek. Interes Orokorreko Trenbide Sareko linea eta bide-zatien katalogoa ezartzen ez den bitartean, lege honen eranskinean zerrendatutako linea eta bide-zatiek osatuko dute katalogo hori, modu iragankorrean, harik eta katalogoa onartzen den arte.

Arau honek aldatu egiten du, era berean, trenbide sektoreari buruzko azaroaren 17ko 39/2003 Legea, bidaiarien trenbide-garraioaren arloan lehia askeari bidea egiteko, Estuari garraio horren alorrean dagokion eskumen-esparruaren barruan eta Espainiako Konstituzioko 149.1.21. artikulua arautzen duena aintzat hartuta. Alde horretatik, merkatu-eskema iragankor bat ezartzea aurreikusten da operadore berriek jarduteko aukera izan dezaten. Zehazki, gaikuntza-tituluak eskuratu beharko dira merkatuan sartzeko. Ministroen Kontseiluak erabakiko du zenbat gaikuntza-titulu emango diren lehia-



erregimenean jardungo duen linea edo linea-multzo bakoitzerako. Gaikuntza-tituluak Sustapen Ministerioak emango ditu, lizitazio-prozeduren bitartez.

Hala ere, ez dira mugikortasunerako ezinbesteko zerbitzuak izango, batik bat turismo-xedeekin ematen direnak. Horien artean sartzen dira bidaiariak garraiatzeko zerbitzuak, Trenbide Sektorearen Legeak zehazten ez dituenak eta, gaur egun, RENFE-Operadora konpainiak ematen dituenak (lehen RENFE-Operadora eta FEVE); izan ere, aisialdi-zerbitzuak dira, eta ez dute liberalizazio-prozesuko aldi iragankorrak behar izateko baldintzarik betetzen.

## VI

Egungo ekonomia-atzeraldia erreparatuta eta petrolio-produktuen kotizazioek zer-nolako bilakaera duten aintzat hartuta, interes nazionala dela eta, ibilgailuen erregaien prezioen egonkortasuna zaindu behar da, eta neurri zuzenak hartu behar dira, berehala eragiteko erregaien prezioan. Horrela jokatuta, merkatu horren funtzionamendua oraingoa baino efizienteagoa izango da.

Energiaren Batzorde Nazionalak behin eta berriro egiaztatu du bere ikuskapen-txostenetan, erregaien prezioa zergak baino lehen handiagoa izaten dela Espainian Europan baino.

Halaber, Lehiaren Batzorde Nazionalak emandako txostenek erregaien prezioak konparatu dituzte Europako zenbait herrialdetan, eta txosten horiek adierazi dute erregaien prezioek eta haien banaketa-merkatuko marjinek ez dutela lehia-egoera egiazko baten zantzurik adierazten Espainian.

Alde horretatik, arau honek zenbait neurri hartzen ditu handizkako eta txikizkako merkatuetan, egiazko lehiakortasuna handitzeko sektore horretan. Neurri horien bidez, murriztu egingo dira eragile berriak sartzeko oztopoak, eta hori guztia onuragarria izango da herritarren ongizatearentzat.

Neurri horiek indarreko araubidean sartzeko, aldaketa puntual batzuk egiten zaizkie Hidrokarburoen sektoreari buruzko urriaren 7ko 34/1998 Legeari (sektore horren oinarrizko arau-esparrua ezartzen du) eta ekainaren 23ko 6/2000 Errege Lege Dekretuari (premiazko neurriak arautzen ditu lehiakortasuna handitzeko ondasunen eta zerbitzuen merkatuetan).

Handizkako merkatuan, hidrokarburoen logistika efizientea izango dela bermatu behar da, banaketa gastuak ahalik eta merkeenak izan daitezen. Hori lortzeko, aldatu egiten dira urriaren 7ko 34/1998 Legearen 41., 43. eta 109. artikulua, eta indartu egiten da instalazio logistikoak eta biltegiak ikuskatzeko erregimena, hirugarrenei sarbidea emateko obligazioa ezartzen zaielarik, gardentasunez, baldintza objektiboak beteta eta diskriminaziorik egin gabe. Horren ondorioz, herri-administrazioek behar bezala ikuskatu ahal izango dute konpainia horien jarduna eta merkatuaren lehia-baldintzetan duten eragina.

Sektoreko txikizkako merkatuan, traba administratiboak kentzeko neurriak proposatzen dira. Erregaien txikizkako hornidura-instalazio berriak irekitzeko tramiteak sinpleagoak izango dira eta operadore berrien sarrera sustatzeko neurriak ezarriko dira.

Aukera emango da zerbitzuguneak jartzeko merkataritza-saltoki handietan, merkataritza-parkeetan, ibilgailuen azterketa teknikoak egiteko establezimenduetan eta industria-eremu eta industrialdeetan. Hala, lortze-bidean jarriko dira ekainaren 23ko 6/2000 Errege Lege Dekretuak araututako helburuak.

Espainian operadore berriak sartzeko eta haien ezarpen-eremua handitzeko oztopo nagusiak izan dira, batetik, zerbitzugune berriak jartzeko zailtasunak, eta, bestetik, txikizkako hornidura-kontratu eskusiboak hitzartu ohi direla. Kontratu eskusiboek gaur egun hitzartzen dituzten kontratu-mugek lehia-aukerak mugatzen dituzte sektorean, eta horrek kalteak dakarzikie kontsumitzaileei. Eragin kaltegarri horiek arintzeko, 43 bis artikulua erantsi zaio urriaren 7ko 34/1998 Legeari, baldintza zorrotzagoak arautzeko hornidura-kontratu eskusiboak hitzartu nahi dituztenentzat, eta publikoarentzako salmenta-prezioen gomendioak debekatzeko. Zerbitzuguneak kudeatzeko erregimen ekonomiko jakin batzuk eragotzi nahi dira, kontratu eskusiboen bidez hitzartu eta txikizkako banatzailea deskontu finkodun birsaltzaile edo komisionista gisa ageri dutenak.

Kontratu-erregimen horietan, gomendatutako prezioa edo gehienezko prezioa funtsezkoak izaten dira produktua erosteko salneurria ezartzeko, eta kontratupeko zerbitzuguneen prezioak parekatzen dituzte eta marka bereko zerbitzuguneen arteko lehia murrizten.

Arau honek, halaber, aldi baterako mugatzen die petrolio-produktuak saltzeko instalazioen kopurua handitzeko aukera probintziatiko operadore nagusiei.

Apirilaren 1eko 459/2011 Errege Dekretuak, bioerregaiei buruzko nahitaezko helburuak xedatzen dituenak 2011, 2012 eta 2013. urteetarako, bioerregaien kontsumo eta salmentako urteko helburu orokorrak eta produktukako helburuak ezartzen ditu. Asmo handiko helburu horiek lortzeko, subjektuek derrigorrean baliatu behar dituzte biodieselaren kantitate handiak eta beste produktu batzuk, hala nola, hidrobiodiesela. Hidrobiodieselaren energia-edukia kontuan hartzen da errege-dekretu horrek ezarritako helburuak betetzeko, eta bere abantailatako bat da gasolioaren oso antzeko produktua dela eta bete egiten dituela nahaste-ehuneko handietan bete beharrekoak diren indarreko xedapen teknikoak. Hala ere, kontuan izan behar da erregai fosilak baino garestiagoak direla produktu horiek eta horrek eragina duela gasolioaren azken salneurri-prezioan.

Egungo egoera ekonomikoari eta erregaien prezioei erreparatuta, komeni da 2013. urterako arautu ziren helburuak berrikustea, helburu berriek ahalik eta gehien merka ditzaten erregaien prezioak eta bioerregaien sektoreari nolabaiteko egonkortasuna bermatzeko, baina, betiere, Europar Batasunak 2020. urterako aurreikusi dituen helburuak kolokan jarri gabe. Horrez gainera, bioerregaiak kontsumitu eta saltzeko helburu orokorrak eta produktukako helburuak ezarri dira hurrengo urteetarako.

Xede horrekin berarekin, epe jakin batean ez dela eskatuko azaroaren 4ko 1597/2011 Errege Dekretuak 4. artikuluan agintzen dituen iraunkortasun-irizpideak betetzea arautu da. Hala ere, subjektuek alderdi horiei buruzko informazio egiazkoa eman beharko dute eta behar bezala bete arautu den masa-balantzeko sistema.

## VII

Lege honek bederatzi xedapen gehigarri, sei xedapen iragankor, xedapen indargabetzaile bat eta hamabost azken xedapen ditu.

Lehen xedapen gehigarriak arautzen du Estatuko Enplegu Zerbitzu Publikoaren dagokion partidaren eta Gizarte Segurantzako sarreraren aurrekontuen kontura finantzatuko direla, hurrenez hurren, lege honek araututako hobariak eta kuota-murriztapenak. Era berean, Estatuko Enpleguko Zerbitzu Publikoak eta Gizarte Segurantzako Diruzaintzak egin beharreko jarduketak ezartzen ditu, gauzatzen diren hobarien eta murriztapenen kontrolari dagokienez.

Bigarren xedapen gehigarriak arautzen du ministerio arteko batzorde bat eratuko dela, arau bidez ezarritako osaera eta eginkizunak izango dituen, Enpresa-ekimeneko eta Gazte Enplegurako Estrategiaren jarraipena egin eta hura ebaluatzeko. Hirugarren xedapen gehigarriak, berriz, Estrategiara atxikitzeko prozedura antolatzeke agintzen dio Enplegu eta Gizarte Segurantzako Ministerioari, eta agintzen du organismo horrek aldiro eman beharko duela atxikitako enpresei eta proposatutako ekimenei buruzko informazioa.

Horrez gainera, laugarren xedapen gehigarriak arautzen du 12 hileko epea izango dela banaketa-kontratuak 43. bis artikuluan berriarazten diren baldintzetara egokitzeke.

Bosgarren xedapen gehigarrian aldi baterako lan-enpresa baten eta enpresa erabiltzaile baten artean langileak lagatzeko kontratuak egiteko aukera aurreikusten da.

Ceuta eta Melilla Autonomia Estatutudun Hirietan bingo nahiz kirol- edo lehiaketa-ekitaldietako apustuetako tributu-oinarria aldatzea. Eta zazpigarren xedapen gehigarrian Ceuta eta Melillako ekoizpenaren, zerbitzuen eta inportazioaren gaineko zerga onartzen duen martxoaren 25eko 8/1991 Legearen 9. artikulua aldatzen da.

Lehen xedapen iragankorrak arautzen du lege honetako 9. artikulutik 13. artikulura bitartean arautzen diren neurri eta pizgarriak indarrean izango direla, harik eta enplegua % 15etik beherakoa izaten den arte.

Bigarren xedapen iragankorrak, araua indarrean jarri aurretiko lan-kontratu, hobari eta murriztapenei dagokienez, agintzen du haiek egin edo haiek hartu zireneko garaian indarrean zen araubidearen arabera arautuko direla aurrerantzean ere.



Araua indarrean jarri aurretik berankortasunaren alorrean indarrean ziren kontratuez dihardu hirugarren xedapen iragankorrak.

Jarduerarako udal-lizentzia duten hornidura-instalazio berrien lizentziak arautzen ditu laugarren xedapen iragankorrak. Bosgarren xedapen iragankorrak osatu egiten du 43.2 artikulua ezarritako araubide juridiko berria, eta, zehazki, arautzen du petrolio-produktuak handizka saldu eta ehuneko 30etik gorako merkatu-kuota duten operadoreek ezingo dutela banaketa eskusiboko banaketa-kontratu berririk izenpetu ibilgailuentzako erregaiak hornitzeko instalazioak ustiatzen dituzten txikizkako banatzaileekin, aintzat hartu gabe nork duen haiekiko titulartasuna edo eskubide erreala. Seigarren xedapen iragankorrean gizon eta emakumeen arteko tratu-berdintasunaren arloko aldaketek eragindako ondorioen abian jartzea zehazten da.

Xedapen indargabetzaileak indargabetu egiten du ekainaren 23ko 6/2000 Errege Lege Dekretuak premiazko neurriak arautzekoa lehiakortasuna handitzeko ondasunen eta zerbitzuen merkatuetan arautzen duen lehen xedapen iragankorra, urratu egiten baitu lege honek araututakoa.

Azken xedapenek ezarritako araubidean, nabarmentzekoa da, lehenik, ordeko zuzenbidearen izaera ematen zaiela otsailaren 24ko 4/2012 eta martxoaren 9ko 7/2012 errege lege-dekretuei.

Azken xedapenetako bigarrenak aldatu egiten du Langileen Estatutuko Legearen Testu Bategina, martxoaren 24ko 1/1995 Legegintzako Errege Dekretuan onartua, eta, zehazki, kendu egiten dio 11.1.c) artikuluko azken lerroaldea. Azken xedapenetako hirugarrenak, laugarrenak eta bosgarrenak aldatu egiten dute, hurrenez hurren, ekainaren 1eko 14/1994 Legea, aldi baterako lan-enpresak arautzekoa, uztailaren 1eko 3/2012 Legearen, lan-merkatua aldatzeko premiazko neurriei buruzkoaren, 3. artikulua eta azaroaren 8ko 1529/2012 Errege Dekretua, prestakuntzarako eta ikasketarako kontratua garatzeko eta bitariko lanbide-heziketaren oinarriak ezartzeko, langileekin prestakuntza eta ikasketako kontratuak egiteko baimena emateko aldi baterako lan-enpresei, eta langileak enpresa erabiltzaileen eskura jartzeko.

Sektore Publikoko Kontratuen Legeko testu bategineko zenbait xedapen aldatzen ditu azken xedapenetako zazpigarrenak. Arau-testu horren 216. eta 222. artikuluetan egiten diren aldaketen asmoa da zehaztea noiz sortuko diren merkataritza-eragiketen berankortasunaren kontrako neurriak ezartzen dituen zuzentarauak araututako berandutza-interesak, fakturak hartu eta haiek prozesatzeko dauden moduen arabera, eta 2011ko otsailaren 16ko 2011/7/EE Zuzentarauak arautzen duenarekin bat eginez. Sektore Publikoko Kontratuen Legeko hamaseigarren xedapen gehigarria aldatzen da bitarteko elektronikoa, informatikoa eta telematikoen erabilerako araubide orokorretik baztertze kontratazio-prozeduretan egiten diren faktura elektronikoa. Kontratua betetzeko elementuetako bat da faktura, eta, izaera hori duenez, ez da sartzen 2004/18/EE Zuzentarauak kontratazio-prozeduretarako baimentzen dituen bitarteko elektronikoen artean. Hori horrela, egokia dirudi araubide autonomo bat ezartzea fakturetarako, eragina baitute eremu fiskalean, bankuekiko jardunean eta beste hainbat esparrutan. Hogeita hamahirugarren xedapen gehigarri berriak izapidetze-modu berri bat arautzen du fakturak kontularitza publikoaren alorrean eskumendun den administrazio-organoari aurkezteko. Horren helburua da ziurtatzea Administrazioak zehatz-mehatz jakingo duela zer zor dituen bete beharrekoak diren kontratuengatik.

Azken xedapenetako bederatzigarrenak aldatu egiten du martxoaren 9ko 7/2012 Errege Lege Dekretua, hornitzaileei ordaintzeko finantzaketa-funtsa sortzen duena, eta arautzen du ICO kreditu-erakundeak administratu eta kudeatuko dituela FFPP funtsarekin hitzartzen diren operazio edo eragiketak.

Azken xedapenetako hamargarrenak aldatu egiten du uztailaren 13ko 21/2012 Errege Lege Dekretua, administrazio publikoetako eta finantza-esparruko likidezia-neurriei buruzkoa, eta xedatzen du alde anitzeko finantza-erakundeekin egindako zorpetze-operazioetatik eratorritako obligazioei eta doikuntza-planek aurreikusten dituzten obligazioei ez dietela eragingo autonomia-erkidegoen finantzazio-sistemaren baliabideen balizko atxikitzeak.

Azken xedapenetako hamahirugarrenak emakumeen eta gizonen arteko benetako berdintasunerako martxoaren 22ko 3/2007 Lege Organikoa aldatzen du, eta azken xedapenetako hamalagarrenak, ordea, aseguru pribatuen antolamendurako eta ikuskapenerako legearen testu bategina.

## I. TITULUA

### Enpresa-ekimeneko eta Gazte Enplegurako Estrategia lantzeko neurriak

## I. KAPITULUA

### Enpresa-ekimenak eta autoenplegua sustatzea

1. artikulua. *Norberaren konturako langileen araubidepean diharduten gazteen Gizarte Segurantzako kotizazioak.*

Bat. Honela idatzita geratuko da ekainaren 20ko 1/1994 Legegintzako Errege Dekretuaren bidez onartu zen Gizarte Segurantzako Lege Orokorren testu bategineko hogeita hamabosgarren xedapen gehigarria:

«Hogeita hamabosgarren xedapen gehigarria. *Norberaren konturako langileen araubidepean diharduten gazteen Gizarte Segurantzako murrizketak eta hobariak.*

1. 1. Langile Autonomoen Estatutua indarrean jarri ondoren sartua bada langilea Norberaren Konturako edo Autonomoen Gizarte Segurantzako Araubide Berezian eta 30 urte edo gutxiagoko gizona nahiz 35 urtetik beherako emakumea bada, dagokion gertakari arruntengatiko kuotari murriztapen bat aplikatuko zaio: aplikagarri den gutxieneko kotizazio-oinarriari une bakoitzean araubide horretan indarrean den gutxieneko kotizazio-tasa aplikatuta ateratzen den kuotaren % 30ekoa, aldi baterako ezintasuna barne, aukeratutako kotizazio-oinarriaren eta aplikatzekoa zaion kotizazio-tasaren arabera, hautatu den babes-esparrua kontuan hartuz eta alta eraginkor egiten den dataren ondorengo 15 hilabeteetan. Era berean, hobari bat aplikatuko zaio: murriztapenaren zenbateko berekoa, murriztapen-epea amaitu ondorengo 15 hilabeteetan.

2. Aurreko paragrafoan zehaztutako hobari- eta murriztapen-sistemaren orde, jarraian adierazten diren murriztapen eta hobariak aplikatu ahal izango dira norberaren kontura lan egiten duten eta 30 urte baino gutxiago dituzten langileen kasuan, horiek lehenengo alta hartu badute Norberaren Konturako Langileen edo Langile Autonomoen Gizarte Segurantzako Araubide Berezian, edo alta hori hartu aurreko bost urteetan alta-egoeran egon ez badira. Hala, honako hau izango da murriztu beharreko kuota: dagokion gutxieneko kotizazio-oinarriari une bakoitzean indarrean den gutxieneko kotizazio-tasa aplikatuzetik lortzen den emaitza, aldi baterako ezintasuna barne, gehienez ere 30 hilabeteko epean, eta honako eskala honen arabera:

- a) Kuotaren % 80ko murriztapena altaren eragin-dataren ondorengo 6 hiletan.
- b) Kuotaren % 50eko murriztapena a) letran adierazitako epearen ondorengo 6 hiletan.
- c) Kuotaren % 30eko murriztapena b) letran adierazitako epearen ondorengo 3 hiletan.
- d) Kuotaren % 30eko hobaria murriztapen-epea amaitu ondorengo 15 hiletan.

Ez zaie puntu honetan araututakoa aplikatuko besteren konturako langileak kontratatzen dituzten norberaren konturako langileei.

3. Aurreko puntuko sistema aukeratzen duten norberaren konturako langileek 1. puntuko hobariak eta murriztapenak eskura ditzakete, baldin eta haien guztien zenbateko osoak ez badu gainditzen 30 hileko gehienezko epea.

4. Lan elkartuko kooperatibetako bazkide langileei aplikatuko zaie aurreko puntuetan arautzen direnak, baldin eta xedapen gehigarri honetako aurreko puntuetan arautzen diren baldintzak betetzen badituzte eta Norberaren Konturako Langileen edo Langile Autonomoen Gizarte Segurantzako Araubide Berezian sartuta badaude.

5. Estatuko Enplegu Zerbitzu Publikoaren dagokion aurrekontu-partidaren eta Gizarte Segurantzako sarreraren aurrekontuen kontura finantzatuko dira, hurrenez hurren, xedapen gehigarri honek araututako hobariak eta kuota-murriztapenak.»

Bi. Honela idatzita geratzen da abenduaren 12ko 45/2002 Legeko hamaikagarren xedapen gehigarria 45/2002 Legea, abenduaren 12koa, langabeziatik babesteko sistema erreformatzeko eta lan-aukerak areagotzeko premiazko neurriei buruzkoa:

«Hamaikagarren xedapen gehigarria. *Gizarte Segurantzarekiko kuoten murriztapenak eta hobariak desgaitasuna duten pertsonentzat, norberaren konturako langile gisa hasten badira.*

1. Gutxieneko kotizazio-oinarriari une bakoitzean indarrean den gutxieneko kotizazio-tasa aplikatu ondoren ateratzen den gertakari arruntengatiko kuotaren % 50eko hoberia izango dute, aldi baterako ezintasuna barne, % 33ko desgaitasuna edo handiagoa duten pertsonak, Norberaren Konturako Langileen edo Langile Autonomoen Gizarte Segurantzako Araubide Berezian lehen alta hartzen dutenean.

2. Norberaren konturako langileak % 33ko edo gehiagoko desgaitasun-maila eta 35 urte baino gutxiago baditu, gertakari arrunteko kuotari jarraian adieraziko diren murriztapen eta hobariak aplika dakizkioke, lehendabiziko alta hartu badu Norberaren Konturako Langileen edo Langile Autonomoen Gizarte Segurantzako Araubide Berezian edo alta hori hartu aurreko bost urteetan ez bada izan alta-egoeran araubide horietakoren batean. Gutxieneko oinarriari unean-unean indarrean dagoen kotizazio-tasa aplikatuta kalkulatu dira murriztapen eta hobariak, 5 urteko gehienezko epearengatik eta eskala honen arabera:

a) Kuotaren % 80ko murriztapena altaren eragin-dataren ondorengo 12 hiletan.

b) Kuotaren % 50eko hoberia hurrengo lau urteetan.

Ez zaie puntu honetan araututakoa aplikatuko besteren konturako langileak kontratatzen dituzten norberaren konturako langile ezinduei.

3. Aurreko puntuko sistema hautatzen duten norberaren konturako langile ezinduek aukera izango dute, gerora eta hala badagokie, 1. puntuko hobariak eskuratzeko, baldin eta haien guztien zenbateko osoak ez badu gainditzen 60 hileko gehienezko epea.

4. Lan elkartuko kooperatibetako bazkide langileei aplikatuko zaie aurreko puntuetan arautzen direnak, baldin eta xedapen gehigarri honetako aurreko puntuetan arautzen diren baldintzak betetzen badituzte eta Norberaren konturako Langileen edo Langile Autonomoen Gizarte Segurantzako Araubide Berezian sartuta badaude.

5. Estatuko Enplegu Zerbitzu Publikoaren dagokion aurrekontu-partidaren eta Gizarte Segurantzako sarreraren aurrekontuen kontura finantzatuko dira, hurrenez hurren, xedapen gehigarri honek araututako hobariak eta kuota-murriztapenak.»

2. artikulua. *Norberaren kontura lan egin eta langabezia-prestazioa jasotzeko aukera, enplegua sustatzeko programek horretarako aukera ematen dutenean.*

Seigarren puntu berri hau gehitzen zaio ekainaren 20ko 1/1994 Legegintzako Errege Dekretuaren bidez onartu zen Gizarte Segurantzako Lege Orokorren testu bategineko 228. artikuluari:

«6. Lan-merkatuan sartzeko zailtasun handiak dituzten taldeen enplegua sustatzeko xedea duten programek hala arautzen dutenean, posible izango da norberaren konturako lan bat egin eta, aldi berean, langabezia-prestazioa jasotzea. Kasu horietan, erakunde kudeatzaileak langileari ordainduko dio erabakitzen den hileko prestazio-zenbatekoa dagokion denbora-epean, Gizarte Segurantzarako kotizazioak sartu gabe.»

3. artikulua. *Langabezia-prestazioaren eta norberaren konturako jardueren arteko bateragarritasuna 30 urtetik beherako pertsonen kasuan.*

Ekainaren 20ko 1/1994 Legegintzako Errege Dekretuak onartu zuen Gizarte Segurantzako Lege Orokorren testu bategina, eta testu horren 228. artikuluko 6. paragrafoan arautzen dena aplikatzean, lege horren 221. artikulua arautzen duenaren salbuespen gisa, kontribuzio-mailako langabezia-prestazioaren onuradunek aukera izango dute, norberaren konturako langileen araubidean sartzen badira, prestazioen hileko kobrantza eta lan autonomia bateratzeko. Gehienez 270 eguneko edo, egun-kopuru horren azpitik, jasotzeko dute prestazio-denboran egin ahal izango dute hori. Eskakizun eta baldintza hauek bete beharko dira bateragarriak izan daitezen:

a) Kontribuzio-mailako langabezia-prestazioaren onuradunak 30 urte baino gutxiago izan behar ditu bere konturako jarduerari ekiten dion eguneko eta ez du mendeko langilerik izan behar.

b) Prestazioaren erakunde kudeatzaileari eskatu behar zaio biak bateragarri izatea norberaren konturako jarduerari ekin baino 15 egun lehenago, hartara eragotzi gabe prestazioaren bateragarritasunerako eskubideak jarduerari ekiten zaion egunetik aurrera izatea eragina. Langileak ezingo ditu biak bateragarri egin 15 eguneko epe hori igarotzen bada.

Langabezia-prestazioa eta norberaren konturako jarduera bateragarriak izango diren denboran, ez zaio eskatuko prestazioaren onuradunari enplegu-eskatzailak dituzten betebeharrak eta Gizarte Segurantzako Lege Orokorren 231. artikulua araututako jarduera-konpromisotik eratorritzen diren obligazioak betetzeko.

4. artikulua. *Langabezia-prestazioaren kapitalizazioa aplikatzeko aukerak handitzea.*

Bat. Aldatu egiten da abenduaren 12ko 45/2002 Legea, premiazko neurriak arautu dituen langabeziagatik babes-sistema aldatu eta okupazio-aukerak hobetzeko. Zehazki, lege horren laugarren xedapen iragankorreko 1. paragrafoaren hirugarren araua aldatzen da eta laugarren arau berri bat sartzen da; hala, orain arte laugarrena izan dena aldatu egingo da eta bosgarrena izango da hemendik aurrera. Testu hau izango dute arau horiek hemendik aurrera:

«3. Era berean, 1. eta 2. arauak bete beharko dituzte:

a) Kontribuzio-mailako langabezia-prestazioaren onuradun izan eta langile autonomoen araubidean sartu nahi duten pertsonak, baldin eta ez badute % 33ko desgaitasun-mailarik edo handiagorik.

Xedapen horretako 1. arauaren kasuan, ordainketa bakarria egingo da; jarduera egiteko behar den inbertsioaren zenbatekoa ordainduko da. Zenbateko horretan sartuko dira jardueraren hasierari dagozkion zergak, eta mugako zenbatekoa izango da kontribuzio-mailako langabezia-prestazioaren kontzeptupean jasotzeko

gelditzen den diru-zenbatekoaren % 60a. Gehienezko muga % 100ekoa izango da, baldin eta onuradunak 30 urtetik beherako gizonak badira edo 35 urtetik beherako emakumeak badira, eskaera egiten den datan.

b) Kontribuzio-mailako langabezia-prestazioa jaso eta hogeita hamar urte baino gutxiago dituzten pertsonak, baldin eta prestazioa kapitalizatzen badute haren zenbatekoaren % 100era arteko zenbateko bat merkataritza-entitate berri baten kapital sozialera ekarpena egiteko (entitate hori ekarpena egin aurreko hamabi hiletan eratua ere izan daiteke). Pertsona horiek, kasu guztietan, izaera mugagabeko jarduera profesional edo lanbidezko bat egin behar dute entitate horrekiko, aintzat hartu gabe Gizarte Segurantzako zer araubidetan kokatzen diren.

Besteren konturako jarduerak egiten dituzten pertsonen kasuan, hura 18 hilabetez mantendu behar da gutxienez.

Ez dira kasu horretan sartuko sozietate horiekin aldez aurretik kontratu-harremanak izan dituzten pertsonak, ezta haiekiko mendetasun ekonomikoa duten langile autonomoak ere, baldin eta Estatuko Enplegu Zerbitzu Publikoan erregistratutako kontratu bat izenpetu badute sozietate horrekin bezero hori bezero dela.

4. Langabezia-prestazioa kapitalizatzea erabakitzen duten 30 urtetik beherako gazteek zenbateko hori erabil dezakete entitate bat eratu eta martxan jartzeko gastuei aurre egiteko eta abiarazi nahi den jarduerarekin lotutako tasak eta aholkularitza-, prestakuntza- eta informazio-zerbitzu espezifikoaren prezioa ordaintzeko.

5. Xedapeneko 1., 2. eta 3. arauak adierazten dutena betetzeko, kooperatiban edo lan-sozietatean sartu aurretik edo merkataritza-entitatean langile autonomo moduan edo bazkide moduan lanean hasi aurretik eskatu behar da, hirugarren arauak adierazten duen moduan, kontribuzio-mailako langabezia-prestazioaren ordainketa. Hirugarren suposamendu horretan, jardueraren hasierako egunean eskatu behar du langileak alta Gizarte Segurantzari.

Langileak aurkaratu egin badu langabezia-prestazioaren jatorri izan den lan-harremanaren amaiera, aurkapen-prozedura ebatzi ondoren egin behar da eskaera.

Eskatutako eskubidearen eragin ekonomikoak hura aitortu ondorengo egunean hasiko dira. Ez da hori gertatuko jardueraren hasiera-data lehenagokoa bada. Azken kasu horretan, jardueraren hasiera-datari erreparatuko zaio.»

Bi. Gobernuak errege-dekretu bidez alda dezake aurreko Bat puntuan arautzen dena.

5. artikulua. *Langabezia-prestazioaren kobrantza etetea eta hura berrabiaraztea norberaren konturako jarduera bat egin ondoren.*

Aldaketa hauek egiten zaizkio ekainaren 20ko 1/1994 Legegintzako Errege Dekretuaren bidez onartu zen Gizarte Segurantzako Lege Orokorraren testu bateginari:

Bat. Aldatu egiten da 212. artikuluko 1. paragrafoko d) letra, eta honela idatzita geratzen da:

«d) Eskubidearen titular denak hamabi hilabete baino iraupen laburragoko lanen bat egiten duen bitartean besteren konturako araubidean, edo hogeita lau hilabete baino iraupen laburragoko lanen bat egiten duen bitartean norberaren konturako araubidean. Azken epe hori hirurogei hilabetekoa izango da norberaren konturako langileak hogeita hamar urte baino gutxiago baditu eta hasierako alta hartzen badu Norberaren konturako Langileen edo Autonomoen Gizarte Segurantzako Araubide Berezian edo Itsasoko Langileen Gizarte Segurantzako Araubide Berezian.»



Bi. Aldatu egiten da 212.4. artikuluko b) letra, eta honela idatzita geratzen da:

«b) Interesdunak eskatuta, 1. paragrafoko b), c), d) eta e) letretan jasoriko kasuetan, baldin eta egiaztatzen bada: geldieraren arrazoia amaitu dela; hala badagokio, arrazoi hori legezko langabezia-egoeraren kausa dela; edo, hala badagokio, errentarik ezaren edo familia-erantzukizunak izatearen betekizunak badirauela. Artikuluko 1. puntuko d) letrak adierazten duen egoeran, norberaren konturako langileak hogeita hamar urte baino gutxiago izan eta lehendabiziko alta hartzen duenean Norberaren konturako Langileen edo Autonomoen Gizarte Segurantzako Araubide Berezian edo Itsasoko Langileen Gizarte Segurantzako Araubide Berezian, langabezia-prestazioa berriz has daiteke norberaren konturako lana hirurogei hilabetekoa baino laburragoa bada.

Eteteko arrazoia amaitzen denean sortuko da prestazioari berrekiteko eskubidea, amaitu eta ondorengo hamabost egunetan eskatzen bada; eskaera hori egiteko, izena eman beharko da enplegu-eskatzaille moduan, lehenago eman ez bada. Orobat, berraktibatutzat joko da eskaera egiten den datan lege honen 231. artikuluan adierazten den jarduera-konpromisoa. Hala ere, ez da berraktibatuko erakunde kudeatzaileak beste konpromiso bat izenpetzea eskatzen duen kasuetan.

Adierazitako epea iraganda aurkezten bada eskaera, 209. artikuluko 2. zenbakian eta 219. artikuluko 1. paragrafoko b) letran aurreikusitako ondorioak gertatuko dira.

Urteko opor ordainduei dagokien denbora hartu gabe izanez gero, lege honen 209. artikuluko 3. paragrafoan ezarritakoa aplikatuko da.»

Hiru. Aldatu egiten da 213. artikuluko 1. paragrafoko d) letra, eta honela idatzita geratuko da:

«d) Besteren kontura hamabi hileko edo iraupen luzeagoko lanen bat egitea, hargatik eragotzi gabe 210. artikuluko 3. zenbakian ezarritakoa, edo norberaren konturako lanen bat egitea hogeita lau hilabetez edo gehiagoz, edo hirurogei hilabetez edo gehiagoz norberaren konturako langileak hogeita hamar urte baino gutxiago baditu eta hasierako alta hartzen badu Norberaren konturako Langileen edo Langile Autonomoen Gizarte Segurantzako Araubide Berezian edo Itsasoko Langileen Gizarte Segurantzako Araubide Berezian.»

6. artikulua. *Gertakari profesionalen eta jarduera-amaierarengatiko kotizazio-erregimena.*

Hirugarren lerroalde berri hau gehitzen zaio ekainaren 20ko 1/1994 Legegintzako Errege Dekretuaren bidez onartu zen Gizarte Segurantzako Lege Orokorraren testu bategineko berrogeita hemezortzigarren xedapen gehigarriari:

«Lan-istripuen eta lanbide-gaixotasunen gertakarien aurreko babes, bere baitan jardueraren amaieragatiko babesaren estaldura barne hartzen duena, borondatezkoa izango da norberaren kontura lan egin eta 30 urte baino gutxiago dituzten langileentzat.»

## II. KAPITULUA

### Pizgarri fiskalak

7. artikulua. *Pizgarriak entitate berrientzat.*

Martxoaren 5eko 2/2004 Legegintzako Errege Dekretuak onartu zuen Sozietateen gaineko Zergaren Legeko testu bateginari hemeretzigarren xedapen gehigarri berri hau erantsiko zaio, eta eragina 2013ko urtarrilaren 1etik aurrerako zergaldietarako izango du:

«Hemeretzigarren xedapen gehigarria. *Entitate berriak.*

1. Entitateak berriak badira, hau da, 2013ko urtarrilaren 1etik aurrera eratu badira, eta jarduera ekonomikoak egiten badituzte, eskala honen arabera ordainduko dute zerga, zerga-oinarri positiboa duten lehendabiziko zergaldian eta hurrengoan salbuespenez, ez dute eskalaren arabera ordainduko, lege honen 28. artikulua arautzen duena betez, zerga-tasa orokorra ez beste bat ordaindu behar dutenek:

- a) Zerga-oinarria 0 eta 300.000 euro bitartekoa bada, zerga-tasa ehuneko 15ekoa izango da.
- b) Gainerako zerga-oinarriek ehuneko 20ko zerga-tasa izango dute.

Era berean, aurreko lerrokadan adierazitako eskala aplikatuko da kooperatiba sortu berrien kasuan, emaitza kooperatiboei nahiz emaitza estrakooperatiboei dagokienez.

Zergaldia urtebetetik beherakoa bada, ehuneko 15eko tasan zergapetuko den zerga-oinarriaren zatia honako hau izango da: 300.000 eurori zergaldiaren egun-kopuruaren eta urteko 365 egunen arteko proportzioa aplikatuz ateratzen dena, edo, hura txikiagoa bada, zergaldiko zerga-oinarria aplikatuz ateratzen dena.

2. Subjektu pasiboak lege honetako 45. artikuluko 3. paragrafoan arautzen den ordainketa zatikatuaren modalitatea baliatuko badu, ordainketa zatikatu horiek kuantifikatzeko, ez da aplikatuko 1. paragrafoan arautzen den eskala.

3. Xedapen honetan araututakoa betetzeko, kontuan izango da jarduera ekonomiko bat ez dela abiarazitzat joko:

a) Beste pertsona edo entitate batzuek lehenago egin dutenean jarduera ekonomiko hori lege honen 16. artikulua adierazten duen ildoan eta jarduera entitate berrira eskualdatua izan denean, eskualdatze-titulua edozein izanda ere.

b) Jarduera ekonomiko entitatea eratu aurreko urtean egin duenean erakunde berriaren kapitalean edo funts propioetan ehuneko 50 baino handiagoko partaidetza zuzena edo zeharkakoa duen pertsona fisiko batek.

4. Ez dira entitate berritzat hartuko talderen bateko partaide direnak Merkataritza Kodeko 42. artikulua araudipean, kontuan izan gabe non duten egoitza edo urteko kontu bateratuak egiteko betebeharra ote duten.»

#### 8. artikulua. *Pizgarriak Pertsona Fisikoen Errentaren gaineko Zergan.*

Aldaketa hauek egiten dira, 2013ko urtarrilaren 1etik indarrean jartzeko, azaroaren 18ko 35/2006 Legean (Pertsona Fisikoen Errentaren gaineko Zergari buruzkoa eta Sozietateen gaineko Zerga, Egoiliarak ez direnen Errentaren gaineko Zerga eta Ondarearen gaineko Zerga partez aldatzekoa):

Bat. Aldatu egiten da 7. artikuluko n) letra, eta honela idatzita geratuko da:

«n) Erakunde kudeatzaileak aitortutako langabezia-prestazioak, baldin eta ordainketa bakarreko modalitatean jasoak badira, langabezia-prestazio ordainketa bakarreko modalitatean ordaintzeko modua arautzen duen ekainaren 19ko 1044/1985 Errege Dekretuak adierazten duen moduan eta arau horrek adierazitako helburuetarako erabiltzen badira.

Salbuesteko baldintza izango da bost urteko epe batean eustea akzio edo partaidetzei, baldin eta zergaduna lan-sozietateetan edo lan elkartuko kooperatibetan sartu bada edo ekarpen bat egin badu merkataritza-entitate baten kapital sozialean, edo, langile autonomoa bada, bost urteko epe horretan bertan eustea jarduerari.»

Bi. Kendu egiten da 14. artikuluko 2. puntuko c) letra.

Hiru. Arauaren 32. artikuluari 3. puntu berri hau gehitzen zaio:

«3. Jarduera ekonomiko bati ekin eta haren etekin garbia zenbatespen zuzeneko metodoaren bidez kalkulatzeko duten zergadunek ehuneko 20 murriz dezakete metodo horren bidez aitortzen duten etekin garbi positiboa, eta, hala badagokio, aurreko 1. eta 2. puntuan araututako murriztapenekin gutxitua, positiboa zaien lehen zergaldian eta haren ondorengo zergaldian.

Aurreko leerroaldean araututakoaren zehaztapen gisa, jarduera ekonomiko bati ekin zaiola ulertuko da hari ekiteko egunaren aurreko urtean jarduera ekonomikorik egin ez den kasuetan, eta, hori zehazteko, ez dira aintzat hartuko hasieratik etekin garbi positiboak lortu gabe amaitu diren jarduera ekonomikoak.

Aurreko lehen leerroaldeak adierazten duen jarduerari ekin ondoren beste jarduera bati ekiten bazaio aurrekoa amaitu gabe, aurreko paragrafo horretan arautzen den murriztapena aplikatuko da etekinak positiboak diren lehen zergaldian lortzen diren etekin garbien gainean eta haren hurrengo zergaldian, lehen jarduerari ekin zitzaionetik kontatzen hasita.

Murriztua izango den etekin garbiaren zenbateko hori, paragrafo honetan aipatzen dena, ezingo da izan 100.000 eurotik gorakoa urtean.

Ez da puntu honetan arautzen den murriztapena aplikatuko, baldin eta zergadunak, jardueraren hasiera-dataren aurreko urtean, lan-etekinengatik sarrerak hartu baditu pertsona edo erakunde batetik, eta, hain zuzen ere, dagokion zergaldian diru-sarreraren ehuneko 50 baino gehiago pertsona edo erakunde horietatik jaso baditu.»

Lau. Hogeita hemezortzigarren xedapen gehigarri hau gehitzen da:

«Hogeita hemezortzigarren xedapen gehigarria. *Ehuneko 20ko murriztapena jarduera ekonomiko bat abiarazteagatik.*

2013ko urtarrilaren 1etik aurrera jarduera ekonomiko bati ekin dioten zergadunak soilik aplikatuko zaie Lege honetako 32. artikuluko 3. paragrafoak arautzen duena.»

### III. KAPITULUA

#### Kontratatzeako pizgarriak

9. artikulua. *Prestakuntzari lotutako aldi baterako kontratuak egiteko pizgarriak.*

1. Enpresek eta langile autonomoek eskubidea izango dute, prestakuntzari lotutako aldi baterako kontratuak egiten badizkiete hogeita hamar urte baino gutxiagoko gazteei, Gizarte Segurantzari gertakari arruntengatik eta kontratatutako langileengatik ordaindu behar dioten kuota murriztu bat ordaintzeko hamabi hileko gehienezko epe batean. Murriztapen hori ehuneko 100ekoa izango da 250 langile baino gutxiago dituen enpresa bada kontratua egin duena, eta ehuneko 75ekoa, kontratua egin duen enpresak 250 langile edo gehiago baldin baditu.

Pizgarri hori beste hamabi hilabetez luza daiteke, baldin eta langileak prestakuntza eta enplegua bateratzen jarraitzen badu, edo prestakuntza aurreko leerroaldeak adierazten duen epea amaitu aurreko sei hiletan egin baldin badu.

2. Baldintza hauetakoren bat bete behar dute langileek:

a) Ez dute lan-esperientziarik izan behar edo esperientzia horrek hiru hilekoa baino laburragoa izan behar du.

b) Beste jarduera-sektore batetik etorria izatea, erregelamendu bidez zehaztutako moduan.

c) Langabezia-egoeran izatea eta enplegu-bulegoetan etenik gabe izena emanda izatea kontratua egin aurreko hemezortzi hiletatik hamabi hilean, gutxienez.

d) Nahitaezko irakaskuntzako, lanbide-heziketako edo profesionaltasun-ziurtagiriaren titulu ofizialik ez izatea.

3. Langileek enplegua eta prestakuntza bateratu behar dituzte edo prestakuntza kontratua izenpetu aurreko sei hiletan egin dutela justifikatu.

Prestakuntzak ez du berariazko loturarik izan beharrik kontratuaren xedeko lanpostuarekin, eta ezaugarri hauek izan ditzake:

a) Prestakuntza egiaztagarri ofiziala izan daiteke edo enplegu-zerbitzu publikoek sustatua.

b) Urtean 90 orduko prestakuntza jaso izana, hizkuntzetan edo informazio eta teknologiako teknologietan.

4. Neurri hori aplikatzeko, kontratua denbora mugagabez edo denbora jakinerako hitzar daiteke, martxoaren 24ko 1/1995 Legegintzako Errege Dekretuaren bidez onartu zen Langileen Estatutuaren Legeko testu bateginak arautzen duena betez.

Hitzartutako lanaldiak ezingo du izan langile batek lanaldi oso konparagarrian egiten duenaren ehuneko 50ekoa baino handiagoa. Lanaldi oso konparagarria zer den zehazteko, Langileen Estatutuko 12.1 artikulua arautzen duena hartuko da kontuan.

5. Neurri hori hartu ahal izateko baldintza da, enpresa eta langile autonomoentzat, bidegabeko kontratu-azkentzerik ez egin izana kontratua izenpetu aurreko sei hilabeteetan. Mugapen hori indarrean izango da soilik 2013ko otsailaren 24tik aurrerako kontratu-azkentze bidegabeentzat eta azkenduak izan diren lanpostuko lanbide-talde bereko lanpostuak betetzeko lantoki berberetan.

6. Onurak aplikatu ahal izateko, artikulua honek adierazitako kontratuarekin lortu duen enplegu-mailari eutsi behar dio enpresak, kontratu horrek duen iraupenaren pareko epe batean, eta, gehienez, hamabi hilabete epean, kontratua egin ondoren. Ez badira betebeharrak horiek betetzen, itzuli egin beharko dira pizgarriak.

Ez da artikulua honetan adierazten den betebeharra, enpleguari eustekoa, urratutzat joko lan-kontratuak arrazoi objektiboengatik edo diziplinagatik irazpenagatik azkendu badira eta bata zein bestea bidezkotzat jo badira, ezta kargua uzteagatik, heriotzagatik, erretiroagatik, ezintasun iraunkor oso, absolutu edo baliaezintasun handiagatik, hitzartutako kontratu-denbora amaitzeagatik, kontratuaren xede den obra edo zerbitzua egiteagatik edo probaldian hura deuseztatzeagatik azkendu badira.

7. Artikulu honetan arautzen diren neurriak aplikatzeko, ezinbestekoa izango da kontratuak idatziz formalizatzea, Estatuko Enplegu Zerbitzu Publikoak adierazten dituen ereduetan.

8. Artikulu honetan arautzen ez diren alderdiak arautzeko, aplikatzekoa izango da, murriztapenen alorrean, hazkundea eta enplegua hobetzeko abenduaren 29ko 43/2006 Legearen I. kapituluko I. sekzioak arautzen duena. Ez dira aplikatzekoak izango 2.7 eta 6.2 artikulua.

10. artikulua. *Mikroenpresek eta enpresari autonomoek kontratu mugagabeak egitea gazteei.*

1. Enpresek eta langile autonomoek denbora mugagabez kontratatzen badituzte, lanaldi oso edo partzialerako, hogeita hamar urtetik beherako gazte langabeak, ehuneko 100eko murriztapena eskuratzeko eskubidea izango dute enpresa gisa Gizarte Segurantzari ordaindu behar dioten kuotako gertakari arrunten epigrafean, kontratatutako langilearen lehen kontratu urtean eta hurrengo paragrafoetan adierazitako baldintzetan.

Neurri horretara atxikitzeko, baldintza hauek bete behar dituzte enpresa eta langile autonomoek:

a) Bederatzi langile edo gutxiagoko lan-plantilla bat izan behar dute kontratua egiten den unean.

b) Ez dute aurretiazko lan-harremanik izan behar langilearekin.

c) Ez dute, kontratua egin aurreko sei hilabeteetan, kontratu-azkentze bidegaberik egin behar. Mugapen hori indarrean izango da soilik 2013ko otsailaren 24tik aurrerako

kontratu-azkentze bidegabeentzat eta azkenduak izan diren lanpostuko lanbide-talde bereko lanpostuak betetzeko lantoki berberetan.

d) Ez dute aurretiaz egin behar bestelako kontraturik artikuluko honen araupean. 5. paragrafoan xedatutakoa izango da salbuespen bakarra.

2. Ez da aplikatuko artikuluko hau egoera hauetan:

a) Kontratua lan-merkatua aldatzeko premiazko neurriei buruzko uztailaren 6ko 3/2012 Legearen 4. artikulua araberako hitzartzen denean.

b) Kontratua aldizkako lan finkoetarako egiten bada, Langileen Estatutuko 15.8 artikuluaekin bat etorritik.

c) Abenduaren 29ko 43/2006 Legeko 2. artikulua araututako kontratu mugagabeak direnean.

3. Artikulu honetako 1. paragrafoan arautzen diren onurak kontratu batekiko soilik aplikatuko dira, 5. paragrafoan arautzen den salbuespenarekin.

4. Araututako onurak aplikatzeko, kontratatutako enpleguan mantendu behar da langilea lan-harremana hasi eta ondorengo hemezortzi hiletan, salbu eta kontratua enpresaburuari egozgarri ez zaion kausaren batengatik azkentzen bada edo hura probaldian azkentzen bada.

Era berean, urtebetez eutsi behar dio, gutxienez, artikulu honek adierazten duen kontratuarekin enpresak lortu duen enplegu-mailari, kontratua izenpetu denetik kontatzen hasita. Ez badira betebeharrak horiek betetzen, itzuli egin beharko dira pizgarriak.

Ez da artikulu honetan adierazten den betebeharra, enpleguari eustekoa, urratutaz joko lan-kontratuak arrazoi objektiboengatik edo diziplinagatik iraizpenagatik azkendu badira eta bata zein bestea bidezkotzat jo badira, ezta kargua uzteagatik, heriotzagatik, erretiroagatik, ezintasun iraunkor oso, absolutu edo baliaezintasun handiagatik, hitzartutako kontratu-denbora amaitzeagatik, kontratuaren xede den obra edo zerbitzua egiteagatik edo probaldian hura deuseztatzeagatik azkendu badira.

5. Artikulu honen 4. paragrafoko lehen letrazko azken letrazkoak adierazten dituen egoeretan, beste kontratu bat egin ahal izango da artikulu honen araupean. Kasu horietan, ordea, murrizketa-epeak ezingo du izan, guztira, hamabi hilabete bakoitzeko luzeagoa.

6. Artikulu honetan arautzen diren neurriak aplikatzeko, ezinbestekoa izango da kontratuak idatziz formalizatzea, Estatuko Enplegu Zerbitzu Publikoak adierazten dituen ereduetan.

7. Artikulu honetan arautzen ez diren alderdiak arautzeko, aplikatzekoa izango da abenduaren 29ko 43/2006 Legearen I. kapituluako I. sekzioak arautzen duena. Ez dira aplikatzekoak izango, hala ere, 2.7 eta 6.2 artikulua.

11. artikulua. *Pizgarriak gazte-ekintzailetzako proiektu berrietan egindako kontratuentzat.*

1. Kontratazioaren ondorengo hamabi hilabeteetan Gizarte Segurantzari ordaindu beharreko kuotan –laneko istripuei eta gaixotasunei dagozkienak barne– % 100eko murriztapena izateko eskubidea izango dute hogeita hamar urtetik beherakoak diren, beren kontura lan egiten duten eta soldatapeko langilerik ez duten langileek, 2013ko otsailaren 24aren ondoren berrogeita bost urte edo gehiago dituzten pertsona langabeak lehen aldiz kontratatzen badituzte, mugarik gabe eta lanaldi osoko nahiz partzialeko kontratu baten bidez. Azken horiek enplegu-bulegoan langabe gisa inskribatuta egon behar dute, gutxienez, hamabi hilabetez jarraian, kontratazioa egin aurreko hemezortzi hilabeteetan, edo langabezia-babesa agortu duten pertsonentzat abiarazten diren birgaitze profesionaleko programen onuradun izan behar dute.

2. Artikulu honetan araututako onurak aplikatzeko, kontratatutako enpleguan mantendu behar da langilea lan-harremana hasi eta ondorengo hemezortzi hiletan, salbu eta kontratua enpresaburuari egozgarri ez zaion arrazoiren batengatik azkentzen bada



edo hura probaldian azkentzen bada. Ez badira betebeharrak horiek betetzen, itzuli egin beharko dira pizgarriak.

3. Artikulu honen 2. paragrafoak adierazten dituen egoeretan, beste kontratu bat egin ahal izango da artikulu honen araupean. Kasu horietan, ordea, murriztapena aplikatzeko epeak ezingo du izan, guztira, hamabi hilabetekoa baino luzeagoa.

4. Langile bat kontratatzea arrazoiak izan badaiteke Gizarte Segurantzako kuotan beste hobari edo murriztapenak aldi berean aplikatzeko, horietako bat bakarrik aplikatuko da. Onuradunak erabakiko du, langileari Gizarte Segurantzaren alta ematen dionean, horietako zein aplikatuko den.

5. Xedapen honek arautzen ez dituen alderdiak arautzeko, aplikatzeko izango da abenduaren 29ko 43/2006 Legea, hazkundera eta enplegua hobetzeko, eta, zehazki, arau horren I. kapituluko I. sekzioa. Ez da aplikatzeko izango, hala ere, lege horren 2.7 artikulua.

#### 12. artikulua. *Gazteen lehen enplegua.*

1. Lehen lan-esperientziak sustatzeko, enpresek aukera izango dute aldi baterako kontratuak egiteko lan-esperientziarik ez duten edo hiru hil baino gutxiagoko lan-esperientzia duten gazte langabeekin, baldin eta hogeita hamar urte baino gutxiago badituzte.

2. Langileen Estatutuko 15.1.b) artikulua eta haren garapen-arauek arautuko dituzte kontratu horiek, alderdi hauetan izan ezik:

- a) Lehen lan-esperientzia hartzea izango da kontratuaren kausa.
- b) Kontratuak hiru hileko iraupena izan behar dute gutxienez.
- c) Kontratuak sei hileko iraupena izango dute gehienez, salbu eta estatuko sektore-hitzarmen kolektiboak, edo, haren ezean, esparru txikiagoko sektore-hitzarmen kolektiboren batek iraupen luzeago bat arautzen badu. Hala ere, kontratuak ezingo dute inoiz ere hamabi hiletiko gorako iraupenik izan.

Egindako kontratua legez ezarritako gehienezko muga edo konbentzioz ezarritako muga baino laburragoa bada, hura luzatu egin ahal izango da bi aldeek hala erabakitzen badute, baina behin bakarrik. Dena den, kontratuak ezin izango du gehienezko muga baino gehiago iraun.

d) Lanaldi osorako edo lanaldi partzialerako kontratuak izango dira, baina, partziala izatekotan, kontratatutako gaztearen lanaldia langile batek lanaldi oso konparagarrian egiten duen lanaldiaren ehuneko 75ekoa baino handiagoa izan behar du. Lanaldi oso konparagarria zer den zehazteko, Langileen Estatutuko 12.1 artikulua arautzen duena hartuko da kontuan.

3. Neurri hori hartu ahal izateko baldintza da, enpresa eta langile autonomoentzat, bidegabeko kontratu-azkentzerik ez egin izana kontratua izenpetu aurreko sei hilabeteetan. Mugapen hori indarrean izango da soilik 2013ko otsailaren 24tik aurrerako kontratu-azkentze bidegabeentzat eta azkenduak izan diren lanpostuko lanbide-talde bereko lanpostuak betetzeko lantoki berberetan.

Enpresa erabiltzaileen eskura jartzeko langileekin egindako lan-kontratuen kasuan, aurreko lerrokadan zehaztutako muga enpresa erabiltzaileari dagokiola ulertuko da.

4. Enpresek eta langile autonomoek eskubidea izango dute, kontratua egiten denetik hiru hileko epea igaro ondoren, artikulu honek adierazten dituen kontratuak mugagabe bihurtu eta Gizarte Segurantzaren ordaindu behar dituzten enpresa-kuotetan 41,67 euroko hobia izateko hilean (500 euro/urtean), hiru urteko epean; betiere, hitzartutako lanaldia langile batek lanaldi oso konparagarrian egiten duen lanaldiaren ehuneko 50ekoa bada gutxienez. Kontratua emakume batekin egiten bada, kontratuaren izaera aldatzeagatik hobia 58,33 eurokoa izango da hilean (700 euro/urtean).

Artikulu honen arabera kontratatu diren eta enpresa erabiltzaileen eskura jarri diren langileen kasuan, horiek ere hobari bera izateko eskubidea izango dute, aurreko lerrokadan zehaztutako baldintzak kontuan hartuta, langileekin lan-kontratu mugagabe

bat etenik gabe hitzartzen denean, betiere hasierako kontratua egin denetik gutxienez hiru hilabeteko epea igarotzen bada.

Aurreko lerrokadan adierazten den egoeran, artikuluko honetako 5. lerrokadan zehaztutako betebeharra enpresa erabiltzaileari dagokiola ulertuko da.

5. Onurak aplikatu ahal izateko, enpresak hamabi hileko epean eutsi behar dio gutxienez artikuluko honetako adierazitako kontratu-aldaketarekin lortu duen enplegu-mailari. Ez badira betebeharrak horiek betetzen, itzuli egin beharko dira pizgarriak.

Ez da artikuluko honetan adierazten den betebeharra, enpleguari eustekoa, urratutaz joko lan-kontratuak arrazoi objektiboengatik edo diziplinagatik irazpenagatik azkendu badira eta bata zein bestea bidezkotzat jo badira, ezta kargua uzteagatik, heriotzagatik, erretiroagatik, ezintasun iraunkor oso, absolutu edo baliaezintasun handiagatik, hitzartutako kontratu-denbora amaitzeagatik, kontratuaren xede den obra edo zerbitzua egiteagatik edo probaldian hura deuseztatzeagatik azkendu badira.

6. Artikuluko honetan arautzen diren neurriak aplikatzeko, ezinbestekoa izango da kontratuak idatziz formalizatzea, Estatuko Enplegu Zerbitzu Publikoak adierazten dituen ereduetan.

7. Artikuluko honetan arautzen ez diren alderdiak arautzeko, aplikatzekoa izango da, pizgarrien alorrean, abenduaren 29ko 43/2006 Legearen I. kapituluko I. sekzioak arautzen duena. Ez dira aplikatzekoak izango, hala ere, 2.7. eta 6.2. artikulukoak.

#### 13. artikulua. *Pizgarriak praktika-kontratuak egiteko.*

1. Langileen Estatutuko 11.1 artikulua betetzeari utzi gabe, praktika-kontratuak egin daitezke hogeita hamar urtetik beherako gazteekin, ikasketak amaitu dituztenetik bost urte edo gehiago igaro badira ere.

2. Enpresek eta langile autonomoek praktika-kontratu bat hitzartzen badute hogeita hamar urtetik beherako pertsona batekin, eskubidea izango dute, kontratua indarrean den bitartean, ehuneko 50eko murriztapen bat izateko langileagatik ordaindu behar duten Gizarte Segurantzako gertakari arruntengatik enpresa-kuotan.

Kuotaren murriztapena ehuneko 75ekoa izango da langilea lanekoak ez diren praktikak egiten ari bada enpresan praktikako lan-kontratuak hitzartzen den garaian. Betetzekoa izango da, alde horretatik, enpresetan lanekoak ez diren praktikak arautzeko urriaren 31ko 1543/2011 Errege Dekretuak egoera horiei buruz xedatzen duena.

3. Artikuluko honetan arautzen diren neurriak aplikatzeko, ezinbestekoa izango da kontratuak idatziz formalizatzea, Estatuko Enplegu Zerbitzu Publikoak adierazten dituen ereduetan.

4. Artikuluko honetan arautzen ez diren alderdiak arautzeko, aplikatzekoa izango da, pizgarrien alorrean, abenduaren 29ko 43/2006 Legearen I. kapituluko I. sekzioak arautzen duena. Ez da aplikatzekoa izango, hala ere, 2.7. artikulua.

#### 14. artikulua. *Pizgarriak gazteak gizarte-ekonomiako entitateetan sar daitezten.*

1. Hobari hauek arautzen dira gizarte-ekonomiako entitateentzat:

a) Hobariak izango dituzte Gizarte Segurantzari ordaindu beharreko enpresa-kuotetan 30 urtetik beherako langabeak langile-bazkide edo laneko bazkide moduan hartzen dituzten kooperatibek eta lan-sozietateek. Hiru urtez izango dituzte hobariak, eta horien zenbatekoa 66,67 eurokoa izango da hilean (800 euro/urtean). Kooperatiben kasuan, hobariak izango dituzte besteren konturako langileei dagokien Gizarte Segurantzako araubideren bat hartzea erabaki badute, ekainaren 20ko 1/1994 Legegintzako Errege Dekretuaren bidez onartu zen Gizarte Segurantzako Lege Orokorraren testu bategineko laugarren xedapen gehigarriak arautzen duena beteta.

b) Laneratze-enpresek hobariak izango dituzte Gizarte Segurantzako kuotetan, baldin eta kontratuak izenpetzen badituzte gizarte-bazterketako egoeran dauden 30 urtetik beheragoko pertsonekin (laneratze-enpresen araubidea ezartzen duen abenduaren 13ko 44/2007 Legeak 2. artikuluan araututako pertsonak izan behar dute). Hobaria 137,50

eurokoa izango da hilean (1.650 euro/urtean), kontratua indarrean dagoen denboran edo, kontratua mugagabea bada, hiru urtean. Hobari horiek ez dira bateragarriak izango abenduaren 13ko 44/2007 Legeko 16.3.a) artikulua arautzen dituen hobariekin.

2. 1.a) puntuari dagokionez, hazkundera eta enplegua hobetzeko abenduaren 29ko 43/2006 Legea aplikatuko da, eta, zehazki, arau horren I. kapituluko I. sekzioa. Ez da aplikatzekoa izango, hala ere, lege horren 6.2 artikulua.

1.b) puntuan jasotzen ez diren alderdiak arautzeko, hazkundera eta enplegua hobetzeko abenduaren 29ko 43/2006 Legearen I. tituluaren I. atala aplikatuko da, onuradunek bete beharreko baldintzak, hobarien aplikaziotik kanpora geratuko direnak, hobarien gehienezko zenbatekoa, bateragarritasuna eta etekinen itzulera arautzeko.

#### IV. KAPITULUA

##### Bitartekaritza hobetzea

15. artikulua. *Baterako esparru-hitzarmenak formalizatzea lan-bitartekaritza errazteko zerbitzuak kontrata daitezten.*

Hogeita hamabigarren xedapen gehigarri berri hau gehitzen zaio azaroaren 14ko 3/2001 Legegintzako Errege Dekretuaren bidez onartu zen Sektore Publikoko Kontratuen Legeari:

«Hogeita hamabigarren xedapen gehigarria. *Baterako esparru-hitzarmenak formalizatzea lan-bitartekaritza errazteko zerbitzuak kontrata daitezten.*

Estatuko Enplegu Zerbitzu Publikoaren Zuzendaritza Orokorrak, autonomia-erkidegoetako kontratazio-organo eskudunek eta, haien mende izanik, Enplegu Sistema Nazionalean sartuta dauden erakunde eta organismoek aukera izango dute esparru-hitzarmen bateratuak adosteko enpresaburu batekin edo batzuekin, hurrengo lerroaldeak arautzen dituen hitzarmenetan zehazten diren ezaugarri homogeneousko zerbitzu-kontratu guztiek bete beharko dituzten baldintzak finkatzeko. Lan-bitartekaritza erraztea izango da hitzarmen horien xedea, eta denbora-epe jakin baterako ezarriko dira. Hala ere, ezingo dira bitartekaritzarako tresna horiek gehiegikeriaz erabili, eta ezingo dira baliatu lehia oztopatu, murriztu edo faltsutzeko.

Esparru-hitzarmen bateratu horiek adosteko, III. liburuko II. tituluaren II. kapituluko xedapenak bete behar dira, eta aldez aurretik, dagokion lankidetzaren hitzarmena izenpetu behar dute Estatuko Enplegu Zerbitzu Publikoak eta autonomia-erkidegoek edo, horien mende egonik, Enplegu Sistema Nazionalean sartuta dauden erakunde eta organismoek.

Ezin izango dute esparru-kontratu horien xede izan herri-administrazioek aldi baterako langileak hartzeko dei ditzaketan hautaketa-prozeduretarako lan-bitartekaritzako jarduerak. Bitartekaritza-lan hori enplegu-zerbitzu publikoek bakarrik eta zuzenean egin ahal izango dute.»

16. artikulua. *Lanpostuen eskaintzen, eskaeren eta prestakuntza-aukeren datu-base komuna.*

Aldaketa hauek egiten zaizkio Enpleguari buruzko abenduaren 16ko 56/2003 Legeari:

Bat. Aldatu egiten da 8. artikuluko 2. paragrafoko b) letra, eta honela idatzita geratuko da:

«b) Datu-base komun bat izatea, Enpleguko Atari Bakarra, Estatu osoan eta Europako Ekonomia Esparruko gainerako herrialdeetan dauden enpleguen

eskaintzen, eskarien eta prestakuntza-aukeren berri emango duena, baina, betiere, behar bezala beteta abenduaren 13ko 15/1999 Lege Organikoa, Izaera Pertsonaleko Datuak Babestekoa.

Datu-base hori osatzeko, enplegu-zerbitzu publikoek Enplegu Sistema Publikoen Informazio Sistemako datu-baseetan erregistratuko dituzte enpleguen eskaintza eta eskari guztiak. Estatuko Enplegu Zerbitzu Publikoak bermatu egingo du informazio hori herritar, enpresa eta herri-administrazio guztiengana helduko dela, gardentasuna eta merkatuaren batasuna ziurtatzeko.»

Bi. 14. artikulua 3. paragrafoa 4. paragrafoa izango da hemendik aurrera, eta artikulua horrek 3. paragrafo berri hau izango du:

«3. Enplegu eta Lan arloko Gaietarako Sektore Konferentziak funtsak libratu ohi ditu, lurralde-mugarik gabe, lan-bitartekaritzarako eginkizunak betetzeko, eta, hori egitean, bete egiten du lege honek 7.bis artikuluko c) letran arautzen duena, baina, hori egin aurretik, Estatuko Enplegu Zerbitzu Publikoak egiaztatu egingo du enplegu-zerbitzu publikoek bete egiten duten ala ez 8. artikuluko 2.b) xedapena.

Estatuko Enplegu Zerbitzu Publikoak hautematen badu autonomia-erkidegoren batek ez duela betebehar hori betetzen, ez die ordainduko haiei dagozkien zenbatekoak, harik eta egoera hori zuzentzen den arte. Alde horretatik, Estatuko Enplegu Zerbitzuak egoera horretan dauden autonomia-erkidegoei jakinaraziko die hauteman den urraketa zuzendu beharrean daudela.»

## II. TITULUA

### Enpresen finantziarioa sustatzeko neurriak

17. artikulua. *Aldatu egiten da azaroaren 2ko 2486/1998 Errege Dekretua, Aseguru pribatuak antolatu eta ikuskatzeko erregelamendua onartzekoa.*

Aldaketa hauek egiten zaizkio Aseguru pribatuak antolatu eta ikuskatzeko Erregelamendua onartzen duen azaroaren 20ko 2486/1998 Errege Dekretuari:

Bat. c) azpiatal hau gehituko zaio 50.5 artikuluari:

«Burtsako Merkatu Alternatiboan edo errege-dekretu bidez zehazten den alde anitzeko beste sistemaren batean negoziatutako baloreak eta eskubideak.»

Bi. Honela idatzita geratuko da 53.4 artikuluko seigarren leerroaldea:

«Ezingo dira estali beharrekoak diren hornidura teknikoaren guztizkoaren 100eko 10ean baino zenbateko handiagoan zenbatu Ekonomia eta Lankidetzaren Garapenerako Antolakundearen (ELGA) esparruan araututako merkatuetan negoziagarriak ez diren balore eta eskubide higigarrietan egindako inbertsioak, inbertsio libre eta kolektiboko erakundeetako akzioetan eta partaidetzetan egindako inbertsioak, 50. artikuluko 5.a.2. paragrafoan adierazten diren inbertsio libre eta kolektiboko erakundeetako inbertsio kolektiboko instituzioetan egindako inbertsioak, 50. artikuluko 5.a.3. paragrafoan adierazten diren arrisku-kapitaleko sozietate eta funtsei dagozkien akzio eta partaidetzetan egindako inbertsioak, eta Burtsako Merkatu Alternatiboan edo errege-dekretu bidez zehazten den alde anitzeko beste sistemaren batean negoziatu diren balore eta eskubideetan egindako inbertsioak. Muga hori 100eko 30ekoa izango da erakundeak berraseguruaren alorrean jarduten badu eta Ekonomia eta Lankidetzaren Garapenerako Antolakundearen (ELGA) esparruan araututako merkatuetan negoziagarriak ez diren balore eta eskubide higigarrietan egindako inbertsioak badira.»

Hiru. Honela idatzita geratuko da 53.4 artikuluko zortzigarren leerroaldea:

«Ezingo dira estali beharrekoak diren hornidura teknikoaren guztizkoaren 100eko 5 baino zenbateko handiagoan zenbatu inbertsio libreko inbertsio kolektiboaren erakundeei dagozkien akzioak eta partaidetzak eta inbertsio libreko inbertsio kolektiboaren inbertsio kolektiborako erakundeei dagozkien akzioak eta partaidetzak, erregelamendu honetako 50. artikuluko 5.a.2 paragrafoak adierazten dituenetakoak, eta arau horretako 50. artikuluko 5.a.2 paragrafoak adierazitako arrisku-kapitaleko sozietate eta funtsei dagozkien akzioak eta partaidetzak. Arrisku-kapitaleko erakunde bakar batek jaulki eta Burtsako Merkatu Alternatiboan edo errege-dekretu bidez zehaztutako beste alde anitzeko negoziazio-sistemaren batean negoziatzen diren akzio eta partaidetzetan egindako inbertsioek, batera, ezin dute gainditu, erakunde bakar batek jaulkiak badira, estaltzekoak diren horniduren % 3. Muga hori, ehuneko 3koa, ehuneko 6koa izango da, baldin eta arrisku-kapitaleko erakundeek jaulkitako akzio eta partaidetzetan eta Burtsako Merkatu Alternatiboan edo errege-dekretu bidez zehaztutako beste alde anitzeko negoziazio-sistemaren batean negoziatzen diren balore eta eskubideetan egindako inbertsioak talde bereko entitateek jaulkiak edo abalatuak badira.»

18. artikulua. *Aldatu egiten da Pentsio-planei eta -funtsei buruzko Erregelamendua, otsailaren 20ko 304/2004 Errege Dekretuaren bidez onartua.*

Aldaketa hauek egiten zaizkio otsailaren 20ko 304/2004 Errege Dekretuaren bidez onartutako Pentsio-planei eta -funtsei buruzko Erregelamenduari:

Bat. Erregelamenduari d) paragrafo hau gehitzen zaio 70.9 artikuluan:

«d Burtsako Merkatu Alternatiboan edo errege-dekretu bidez zehazten den alde anitzeko beste sistemaren batean negoziatutako baloreak eta eskubideak.»

Bi. Aldatu egiten da 72. artikuluko b) letra, eta honela idatzita geratuko da:

«b) Ezingo da pentsio-funtsaren aktiboaren ehuneko 5ekoa baino inbertsio handiagorik egin erakunde bakar batek jaulkitako baloreetan eta finantza-bitartekoetan, erakunde horri emandako kredituak edo hark abalatu edo bermatutako zenbatekoak barruan sartuta.

Hala ere, aurrez adierazitako muga hori ehuneko 10ekoa izango da erakunde jaulkitzaile, mailegatzaile edo bermatzaile bakoitzeko, baldin eta funtsak ez badu aktiboaren ehuneko 40 baino gehiago inbertitzen funtsaren aktiboaren ehuneko 5a gainditzen den erakundeetan.

Talde bereko enpresa bat baino gehiagotan inberti dezakete funtsek, baina taldean egindako inbertsio osoak ezin du izan fondoaren aktiboaren ehuneko 10ekoa baino handiagoa.

Pentsio-funtsek ezin dute beren aktiboaren ehuneko 2 baino gehiago inbertitu merkatu arautuetan kotizagarriak ez diren finantza-tresnetan edota, merkatu arautuetan negoziagarriak izanda ere, merkaturatze orokortu eta inbertsonalik ez duten balore eta finantza-tresnetan, baldin eta erakunde bakar batek jaulki edo abalatuak badira. Adierazi berri den muga hori ehuneko 4koa izango da balore eta finantza-tresna horientzat, baldin eta talde bereko erakundeek jaulkiak edo abalatuak badira.

Hori horrela izango bada ere, pentsio-funtsaren ehuneko 3koak izan daitezke erakunde bakar batek jaulki eta Burtsako Merkatu Alternatiboan edo errege-dekretu bidez zehaztutako beste alde anitzeko negoziazio-sistemaren batean negoziatzen diren akzio eta partaidetzetan egindako inbertsioak eta arrisku-kapitaleko erakunde bakar batek jaulkitako akzio eta partaidetzetan egindakoak.

Adierazi berri den muga hori, ehuneko 3koa, ehuneko 4koa izango da balore horientzat eta bestelako finantza-tresnentzat, baldin eta talde bereko erakundeek jaulkiak badira.



Kreditu-erakundeetako gordailuek ez dute b) letra honetako mugak bete beharrik izango, hartara eragotzi gabe artikuluko f) letrak arautzen duen baterako mugaren aplikazioa.»

19. artikulua. *Aldatu egiten da uztailaren 28ko 24/1988 Legea, Balore Merkatuei buruzkoa.*

Honela geratuko da idatzita Balore Merkatuei buruzko uztailaren 28ko 24/1988 Legea:

Bat. Honela geratu da idatzita 30 ter artikulua:

«30. artikulua. *Zorra aitortzen edo sortzen duten obligazioen eta beste baloreen jaulkipenen erregimena, horiek bigarren mailako merkatu ofizial batean saltzeko eskaintza publikoaren nahiz han negoziatuak izateko onarpenaren objektu direnean, liburuxka bat argitaratzeko betebeharra eta guzti.*

1. Artikulu honetan xedatutakoa behar bezala aplikatuko zaie zorra aitortzen edo sortzen duten obligazioen edo beste baloreen jaulkipen guztiei, horiek bigarren mailako merkatu ofizial batean saltzeko eskaintza publikoaren nahiz han negoziatuak izateko onarpenaren objektu izatekoak badira eta horrek haiei buruzko liburuxka bat egitea eskatzea badakar, zeina Balore Merkatuaren Batzorde Nazionalak onartu eta erregistratu beharko baitu aurreko kapituluan xedatutako baldintzetan.

Era berean, aurreko lerrokadan sartuko dira, bertan aurreikusitakoa betetzen badute, uztailaren 2ko 1/2010 Legegintzako Errege Dekretuak onartutako Kapital Sozietateen Legearen testu bategineko XI. tituluaren aurreikusten diren zorra aitortzen edo sortzen duten obligazioen edo beste baloreen jaulkipenak. Abenduaren 24ko 211/1964 Legearen aurreikusitako obligazioen jaulkipenei ere aplikatuko zaie artikuluko hau; haren bidez, anonimoen izaera juridikoa hartu ez duten sozietateen, elkarten eta bestelako pertsona juridikoen obligazio-jaulkipenak eta obligaziodunen sindikatuaren eraketa arautzen dira.

Ez dira zorra aitortzen edo sortzen duten obligazio edo beste balore gisa hartuko lege honetako 26.2 artikulua bigarren lerrokadan adierazten diren partaidetzako baloreak, hala nola, akzio bihur daitezkeen obligazioak, horiek azpiko akzioen jaulkitzaileek edo talde jaulkitzailearen entitate batek jaulkitzen baditu.

2. Artikulu honetan aipatzen diren baloreen jaulkipenerako ez da eskritura publikorik egin beharrik izango.

Artikulu honetan adierazten den balore-jaulkipenarekin lotutako ekintza guztien publizitatea lege honetan eta garapen-xedapenetan jaso bezala arautuko da, eta jaulkipena eta harekin lotutako ekintzak ez dira Merkataritza Erregistroan inskribatu edo Merkataritza Erregistroaren Aldizkari Ofizialean argitaratu beharrik izango.

3. Lege bidez arautzen ez direnean, jaulkipen bakoitzaren baldintzak eta jaulkitzaileak horiek formalizatzeko duen gaitasuna jaulkitzailearen estatutuetan jasotzen diren klausulen mende egongo dira eta jaulkipen-hitzarmenean nahiz informazio-liburuxkan aurreikusi bezala arautuko dira.

Bi. Honela geratu da idatzita 30 quater artikulua:

«30 quater artikulua. *Zorra aitortzen edo sortzen duten obligazioen edo bestelako baloreen jaulkipenen erregimena.*

1. Obligazioak jaulkitzen badira eta zorra aitortzen edo sortzen duten bestelako baloreak, 30 bis artikuluko 1. puntuko a), c) eta d) letretan adierazitakoak, ezartzen badira, ez da bete beharrik izango Kapital Sozietatei buruzko Legeko 405. artikulua arautzen duen muga.

2. Zorra aitortzen edo sortzen duten obligazioen edo bestelako baloreen jaulkipen-kasuetan ez da eskritura publikorik eman beharrik izango, balore horiek

negoziaziorako alde anitzeko sistema batean negoziatziora onartzekoak diren kasuan. Jaulkipena eta harekin lotutako gainerako ekintzak ere ez dira Merkataritza Erregistroan inskribatu, ez «Merkataritza Erregistroko Aldizkari Ofizialean» argitaratu beharko.

Jaulkipenerako legez eskatzen diren baldintzak eta baloreen ezaugarriak behar bezala jasoko dira, indarrean den araudiari jarraikiz, horretarako eskumena duten pertsonen jaulkitako ziurtagirian. Ziurtagiri horren bidez alta eman ahal izango zaie baloreei konturako ohartarazpenetan, lege honetako 6. artikuluan xedatutakoari jarraikiz.

Jaulkipen horiekin lotutako ekintza guztien publizitatea egiteko negoziatziorako alde anitzeko sistemak xede horrekin ezarritako sistemak erabiliko dira.

### III. TITULUA

#### **Toki-erakundeen eta autonomia-erkidegoen hornitzaileei ordaintzeko finantzazio-neurriak eta merkataritza-eragiketetako berankortasunari aurre egitekoak**

#### I. KAPITULUA

#### **Beste fase batez luzatzea toki-erakundeen eta autonomia-erkidegoen hornitzaileei ordaintzeko egiteko finantzazio-mekanismoa**

##### *1. sekzioa. Xedapen orokorrak*

##### 20. artikulua. *Xedea.*

Kapitulu honen xedea da toki-erakundeen eta autonomia-erkidegoen hornitzaileei ordaintzeko egiteko finantzazio-mekanismoaren aplikazio-eremu subjektiboa eta objektiboa zabaltzea. Hori egiteko, mekanismoaren fase berriko prozedura-berezitasunak arautuko dira, erakunde horiek beraien hornitzaileekiko ordaintzeke dituzten obligazioak kitatu ditzaten, baldin eta likidoak, mugaeguneratuak eta galdagarriak baziren 2012ko urtarrilaren 1a baino lehen.

##### *2. sekzioa. Toki-erakundeei aplikatzekoak zaizkien xedapenak*

##### 21. artikulua. *Aplikazio-eremu subjektiboa.*

Toki-erakunde hauek bete behar dituzte toki-administrazio-entitateen hornitzaileei ordaintzeko finantzaketa-mekanismo bat ezartzeko informazio-betebeharrak eta beharrezko prozedurak ezartzen dituen otsailaren 24ko 4/2012 Errege Lege Dekretua eta hornitzaileei ordaintzeko finantzaketa-funtsa sortzen duen martxoaren 9ko 7/2012 Errege Lege Dekretua:

1. Estatuko zergetan parte hartzeko ereduari sartuta dauden Euskal Autonomia Erkidegoko eta Nafarroako toki-erakundeek. Horretarako, hitzarmenak izenpetu behar dituzte Estatuko Administrazio Orokorrarekin eta, bakoitzari dagokionaren arabera, Euskal Autonomia Erkidegoko foru-aldundiekin edo Nafarroako Foru Komunitatearekin.

2. Udalerrien mankomunitateek.

3. Estatuko zergetan parte hartzeko ereduak bete behar dituzten toki-erakundeek, martxoaren 5eko 2/2004 Legegintzako Errege Dekretuaren bidez onartu zen Toki Ogasunak arautzeko Legearen testu bategineko II eta III. titulu- eta IV. kapitulu- eta adierazitakoek, hurrengo artikuluan zehazten diren ordaintzeko-betebehar bete gabekoei dagokienez.

## 22. artikulua. *Aplikazio-eremu objektiboa.*

1. Aurreko artikuluko 3. puntuan adierazten diren toki-erakundeek aukera izango dute, fase berri honetan, kontratistei ordaindu gabeko obligazioak sartzeko mekanismoan, baldin eta erakunde horiek 2012. urtea baino lehen zituzten aurrekontuetan aplikatu badira eta hauen ondoriozkoak badira: lankidetzazko hitzarmenak; administrazio-emakidak; kudeatzeko gomendioak, baldin eta gomendia jaso duen erakunde autonomiarik baten edo Estatuko Administrazioaren bitarteko propioa eta zerbitzu teknikoak bada; ondasun higiezinak errentamendu-kontratuak; urriaren 30eko 31/2007 Legeak arautzen dituen kontratuak (31/2007 Legea, uraren, energiaren, garraioen eta posta-zerbitzuen sektoreetako kontratazio-prozedurei buruzkoak); herri-lanen emakida-kontratuak; sektore publikoaren eta sektore pribatuaren arteko lankidetzazko kontratuak; zerbitzu-publikoak kudeatzeko kontratuak, emakidaren modalitatean, toki-erakundeek eman beharreko diru-laguntzen kontura egindakoak, baldin eta 2012ko urtarrilaren 1a baino lehenago ordaindu behar bazitzaion kontratistari, eta, betiere, behar bezala bete badira azaroaren 14ko 3/2011 Legegintzako Errege Dekretuaren bidez onartu zen Sektore Publikoko Kontratuaren Legearen testu bateginak arautzen dituenak.

2. Aurreko artikuluko 1. eta 2. paragrafoetan adierazten diren toki-erakundeek kasuan, aukera izango da, artikuluko honetako aurreko paragrafoan adierazitako betebeharrak sartzeari gain, kontratistei ordaintzeko beste obligazio batzuk ere hartan sartzeko, baldin eta toki-erakundearen 2012koa baino lehenagoko aurrekontuetan aplikatutakoak badira; zehazki, bi arau hauek adierazitako ordaintza-betebeharrak izango dira: toki-administrazio-entitateen hornitzaileei ordaintzeko finantzaketa-mekanismo bat ezartzeko informazio-betebeharrak eta beharrezko prozedurak ezartzen dituen otsailaren 24ko 4/2012 Errege Lege Dekretuak eta hornitzaileei ordaintzeko finantzaketa-funtsa sortzen duen martxoaren 9ko 7/2012 Errege Lege Dekretuak.

## 23. artikulua. *Toki-erakundeek informazioa emateko eta fakturak ordaintzeko betetzeko izango duten prozeduraren berezitasunak.*

1. Kontratistek, 2013ko martxoaren 22ra arte, toki-erakunde zordunari ziurtagiri indibidual bat eskatzeko aukera izango dute. Toki-erakundeak kontratistarekiko dituen ordaintza-betebeharrak adieraziko ditu ziurtagiri horrek.

2. Eskiera egin ondorengo bost egun naturaleko epean emango da ziurtagiri indibiduala. Toki-erakundeek kontu-hartzaileak edo barne-kontrolako organoak emango du, aurreko paragrafoan adierazitako moduan eta edukiarekin. Berariaz adieraziko da toki-erakundearen 2012. urtea baino lehenagoko aurrekonturen batean aplikatutako betebeharrak ziurtatu direla. Ez bazaio epe barruan erantzuten eskaerari, ezetsi egin dela ulertuko da.

3. Toki-erakundeek kontu-hartzaileak edo barne-kontrolako organoak, 2013ko martxoaren 29a baino lehen, onartutako ziurtagiri indibidualen zerrenda ziurtatu bat igorriko dio Ogasun eta Herri Administrazioari, sinadura elektronikodun bitarteko telematikoa baliatuz.

4. Eguneratutako informazio hori kontsultatzeko aukera emango diete toki-erakundeek kontratistari, eta, zerrendetan badaude, izaera pertsonaleko datuen baseko araudiaren baitan dagokien informazioaren berri izateko eskubidea izango dute.

Ezingo da kontratisten kobrantza-eskubidea gauzatu finantzazio-mekanismo honen barruan, baldin eta mankomunitate zordunak ez baditu bete artikuluko honen 6. puntuan arautzen diren betebeharrak formalak.

5. Toki-erakundeek presidentek beharrezkoak diren jarraibideak emango ditu kontratisten eskaerak aztertuko direla bermatzeko, ziurtagiri indibidualak azkar emateko eta igorritako informazioa eskuragarri izateko. Azken baldintza hori betetzeko, bide elektronikoa lehenetsiko dira.

6. Mankomunitateek, 2013ko martxoaren 22a bitartean, Ogasun eta Herri Administrazioari igorri behar diote haien estatutuen kopia fede-emailea. Igorpen horretan, mankomunitateek berariaz zehaztu behar dute udalek zer partaidetza-

ehuneko duten mankomunitatean 2011ko abenduaren 31ko datan, estatutuek adierazten dutenaren harian. Udal horietako osoko bilkuretan onartutako estatutuak izan behar dute. Dokumentu horiek igortzen ez badira, ezingo zaio ekin artikuluko honetako aurreko puntuetan arautzen den prozedurari.

Mankomunitatea ez badago sartuta Ogasun eta Herri Administrazioetako Ministerioaren mendekoa den Toki Erakundearen Datu Base Orokorrean eta Tokiko Sektore Publikoko Erakundearen Inbentarioan, horietan sartzeko eskatu behar du aurreko leerroaldean adierazitako epean, eta xedapen horretan adierazten den dokumentazioa igorri behar du.

#### 24. artikulua. *Diziplina-prozedura.*

Errege lege-dekretu honen 23. artikuluan arautzen diren betebeharrak betetzeko eskumena duten langile publikoek urratu egiten badituzte betebeharrak, arau-hauste oso larriak egingo dituzte, eta betetzekoa izango da Enplegatu Publikoaren Oinarrizko Estatutuaren apirilaren 12ko 7/2007 Legeak 95. artikuluko bigarren paragrafoan arautzen duena. Ogasun eta Herri Administrazioetako Ministerioko Funtzio Publikoko Zuzendaritza Nagusia izango da diziplina-prozedurari ekin eta instrukzioa egiteko organo eskuduna eta Ogasun eta Herri Administrazioetako ministroa izango da prozedura ebatzeko organo eskumenduna.

#### 25. artikulua. *Doikuntza Planaren berezitasunak.*

Toki-erakundeek aurkeztutako doikuntza-planek bete egin behar dute toki-administrazioetako entitateen hornitzaileei ordaintzeko finantzaketa-mekanismo bat ezartzeko informazio-betebeharrak eta beharrezko prozedurak ezartzen dituen otsailaren 24ko 4/2012 Errege Lege Dekretua eta hornitzaileei ordaintzeko finantzaketa-funtsa sortzen duen martxoaren 9ko 7/2012 Errege Lege Dekretua, eta, horrez gain, baldintza hauek bete behar dituzte:

1. Toki-erakundeek, x artikuluan arautzen diren ziurtagiri indibidualak igorri ondoren, doikuntza-plan bat egingo dute beren buruak antolatzeke ahalak baliatuz, eta plan hori aurkeztuko dute, kontu-hartzailearen edo barne-kontrolerako organoaren txostenarekin batera, toki-korporazioaren osoko bilkurak onar dezan, edo, mankomunitateen kasuan, haien estatutuak, mankomunitatea osatzen duten udaletako osoko bilkurek onartutakoak, ezarritako gobernu-organok onar dezan.

2. Onartzen den doikuntza-plana Ogasun eta Herri Administrazioetako Ministerioko organo eskumendunera igorri behar du toki-erakundeak 2013ko apirilaren 15a baino lehenago, sinadura elektronikodun bide telematikoz. Aurkeztutako planaren balorazioa egingo du organo horrek eta toki-erakundeari jakinaraziko dio, 2013ko maiatzaren 20an beranduenez.

Egun hori igaro eta baloraziorik jaso ez bada, aldekoa dela ulertuko da.

Euskal Autonomia Erkidegoko eta Nafarroako toki-erakundeek bete egin beharko dute Estatuko Administrazio Orokorren eta, bakoitzari dagokionaren arabera, Euskal Autonomia Erkidegoko foru-aldundien edo Nafarroako Foru Komunitatearen arteko hitzarmenek araututakoa.

3. Arau honetako 21. artikuluko 3. puntuak adierazten dituen toki-erakundeek doikuntza-plan bat onartu bazuten hornitzaileei ordaintzeko mekanismoaren hasierako fasean 2012ko uztailaren amaieran zena eta Ogasun eta Herri Administrazioetako Ministerioak haren aldeko balorazioa egin badu, doikuntza-plan horren berrikuspen bat igorriko dute, oso bilkuran onartu ondoren, 2013ko apirilaren lehen hamabost egunetan. Berrikuspen-plan hori igortzen ez badute, arau-urratze bat egiten dela ulertuko da, eta betetzekoa izango da Aurrekontu Egonkortasunari eta Finantza Iraunkortasunari buruzko apirilaren 27ko 2/2012 Lege Organikoaren lehen xedapen gehigarrian arautzen duena eta haren garapen-arauek arautzen dutena.

26. artikulua. *Martxoaren 5eko 2/2004 Legegintzako Errege Dekretuaren bidez onartutako Toki Ogasunak Arautzeko Legearen testu bategineko laugarren xedapen gehigarriaren aplikazioa.*

1. Mankomunitateak badira zordunak, mankomunitateetako udalerriek Estatuko zergetan duten partaidetzen atxikipenen bidez betearaziko da hornitzaileei egin beharreko ordainketak finantzatzeko funtsarekin izenpetzen dituzten zorpetze-eragiketen ondoriozko betebeharrak ordaintzeko bermea, toki-erakunde horiek 2011ko abenduaren 31n duten partaidetza-kuotaren arabera proportzioan. Irizpide hori aplikatuko da, baldin eta toki-erakundeek ez badituzte adierazitako zorpetze-eragiketak hitzartzen atxikipen horiek betearazteko ondorioetarako.

2. Euskal Autonomia Erkidegoko eta Nafarroako toki-erakundeek kasuan, aintzat hartuko dira lurralde historikoetako eta Estatuko Administrazio Orokorreko organo eskudunen artean izenpetzen diren hitzarmenak. Hitzarmen horiek derrigorrean jaso behar dute berme-sistema bat hornitzaileei egin beharreko ordainketak finantzatzeko mekanismotik eratortzen zaizkien ordainketa-betebeharrak ordaintzeko.

27. artikulua. *Finantzazio eratzekia duten obligazio ordaingabeen kitapena.*

1. Mekanismo honen bidez ordainduak izan diren ordainketa-obligazio ordaingabeek finantzazio eratzekia baldin badute, zenbateko horien diru-sarrera egiten denean, diru hori zuzenean eratzekia izango da hornitzaileei ordaintzeko funtsaren finantzaziora, eta zorpetze-eragiketa alde aurretik amortizatzeko erabili beharko da, edo, kasuan-kasuan, zorra kitatzeko. Aurreikuspen hori ez zaie aplikatuko Europar Batasunaren egitura-funtsetatik eratorritako kofinantzaketa duten obligazioei.

2. Artikulu honek araututakoa aplikatuko zaie, bai otsailaren 24ko 4/2012 Errege Lege Dekretuaren araupean ordaindu diren ordainketa-obligazioei, bai arau honen bidez zabaldua izan den mekanismoaren baitan ordaintzen diren obligazioei.

*3. sekzioa. Autonomia-erkidegoek bete beharreko xedapenak*

28. artikulua. *Aplikazio-eremu subjektiboa.*

Politika Fiskal eta Finantzarioko Kontseiluak 2012ko martxoaren 6an hartutako Erabakiak autonomia-erkidegoen hornitzaileei ordaintzeko aparteko finantzazio-mekanismoaren ildo orokorrak ezarri zituenak araututako mekanismoaren fase berri honetan sartzeko aukera izango dute autonomia-erkidegoek.

Arau honen baitan, autonomia-erkidegoak izango dira erkidegoetako administrazioak eta erkidegoaren mendeko gainerako erakunde, organismo eta entitateak, haien kudeaketarekiko eta barne-arau edo estatutuekiko erabakimena duten heinean, eta erkidegoak zuzenean edo zeharka partaidetutako elkarteak. Kasu guztietan, Herri Administrazioen sektoreko Autonomia Erkidegoen azpisektoreko entitateak izan behar dute, Kontseiluak 1996ko ekainaren 25ean onartu zuen 2223/96/EE Erregelamenduak onartu zuen Nazio eta Eskualde Kontuen Sistema Europarrak emandako definizioaren eta egindako mugaketaren baitan.

29. artikulua. *Aplikazio-eremu objektiboa.*

1. Autonomia-erkidegoen kasuan, mekanismoaren fase berri honetan sar daitezke, hornitzaileei sor zaizkien neurrian, sorkari hau duten ordaindu gabeko obligazioak: lankidetzak-hitzarmenak; administrazio-emakidak, kudeatzeko gomendioak, baldin eta gomendioa jaso duen erakundea bitarteko propioa eta Administrazioaren zerbitzu teknikoa bada eta ez bada sartzen 28. artikulua ematen duen autonomia-erkidegoaren definizioaren barruan; ondasun higiezinak errentamendu-kontratuak; urriaren 30eko 31/2007 Legeak araututako kontratuak (31/2007 Legea, ur, energia, garraiobide eta posta zerbitzuen sektoreetako kontratazio prozedurei buruzkoa); herri-lanen emakida-kontratuak; sektore publikoaren eta sektore pribatuaren arteko lankidetzak-kontratuak; eta

zerbitzu-publikoak kudeatzeko kontratuak, emakidaren modalitatean, autonomia-erkidegoarekin hitzartutako diru-laguntzen kontura egindakoak, baldin eta 2012ko urtarrilaren 1a baino lehenago ordaindu behar bazitzaion kontratistari, eta, betiere, behar bezala bete badira azaroaren 14ko 3/2011 Legegintzako Errege Dekretuaren bidez onartu zen Sektore Publikoko Kontratuaren Legearen testu bateginak arautzen dituenak.

2. Autonomia-erkidegoak ez badu mekanismo honen lehen fasean parte hartu, aukera izango du, aurreko puntuan adierazitako obligazioak jasotzeaz gain, kontratistei zor zaizkien obligazioak jasotzeko mekanismo horretan, hain zuzen ere, Politika Fiskal eta Finantzarioko Kontseiluaren 2012ko martxoaren 6ko Erabakiak (autonomia-erkidegoen hornitzaileei ordaintzeko aparteko finantzazio-mekanismoaren ildo orokorrak ezartzekoak) aipatzen dituenak.

3. Kasu guztietan, autonomia-erkidegoaren 2011ko eta lehenagoko urteetako kontu orokorrean jaso diren eta ordaindu gabe dauden obligazioak izan behar dute, edota ekitaldi horietan onartutako urteko kontuetan jasotakoak, baldin eta haren baitakoa ez den erakunde batek ordaindu gabeko obligazioak badira. Kasu guztietan, zorra ordaindu aurretik izan behar du obligazioak aurrekontura aplikatua.

30. artikulua. *Autonomia-erkidegoek informazioa emateko eta fakturak ordaintzeko betetzekoa izango duten prozeduraren berezitasunak.*

1. Autonomia-erkidegoek, 2013ko martxoaren 6a baino lehen, Ogasun eta Herri Administrazioetako Ministeriora igorri behar dute autonomia-erkidegoko kontu-hartzaile orokorrak ziurtatutako zerrenda bat, 29. artikuluan adierazi diren betebeharrak jasotzen dituenak.

2. Zerrenda hori kontsultatzeko aukera izango dute hornitzaileek 2013ko martxoaren 22ra arte, eta, egoki iritziz gero, zorra mekanismo horren bidez ordain diezaieten onartuko dute.

3. Hasierako zerrendan azaltzen ez diren hornitzaileek autonomia-erkidegoei eska diezaieteki ordaintzeko dauden obligazioak badirela aitortzeko ziurtagiri indibidualak emateko autonomia-erkidegoen kontura. 29. artikuluan araututako baldintzak bete behar dituzte ziurtagiri horiek. Ziurtagiri hori eskatzen badute, hornitzaileek onartu egingo dute, eskaera egitearekin batera, aurreko paragrafoan adierazitakoa.

4. Autonomia-erkidegoko kontu-hartzaile orokorrak egingo du ziurtagiri ofiziala, haren eskaera aurkeztu ondorengo bost egun naturaleko epean. Ez bazaio epe barruan erantzuten eskaerari, ezetsi egin dela ulertuko da.

5. Autonomia-erkidegoko kontu-hartzaile orokorrak, 2013ko martxoaren 29a baino lehen, Ogasun eta Herri Administrazioetako Ministerioari igorriko dio, sinadura elektronikodun bide telematikoz, hornitzaileek onartutako fakturen zerrenda oso ziurtatua. Bete bete beharko dira 29. artikuluan arautzen diren baldintzak.

6. Eguneratutako informazio hori kontsultatzeko aukera emango diete autonomia-erkidegoek hornitzaileei, eta, zerrendetan badaude, dagokien informazioaren berri izateko eskubidea izango dute, izaera pertsonaleko datuen babeseko araudiari dagokionez.

31. artikulua. *Doikuntza Plana berrikustea.*

Autonomia-erkidegoek, 2013ko apirilaren 15a baino lehen, doikuntza-plan bat igorri behar diote Ogasun eta Herri Administrazioetako Ministerioari, edo lehendik egin duten doikuntza-planaren berrikuspen bat. Ministerioak agiri horren balorazioa egingo du hura aurkeztu ondorengo 15 eguneko epean.

32. artikulua. *Finantzazio eratzekia duten obligazio ordaingabeen kitapena.*

Mekanismo honen bidez ordainduak izan diren ordainketa-obligazio ordaingabeek finantzazio eratzekia baldin badute, zenbateko horien diru-sarrera egiten denean, diru hori zuzenean eratzekia izango da hornitzaileei ordaintzeko funtsaren finantzaziora, eta zorpetze-eragiketa alde aurretik amortizatzen erabili beharko da, edo, kasuan-kasuan,



autonomia-erkidegoak Hornitzaileei Ordaintzeko Finantzaketa Funtzarekin duen zorra kitatzeko.

Artikulu honek adierazi dituenak aplikatuko zaizkie Politika Fiskal eta Finantzarioko Kontseiluak 2012ko martxoaren 6an hartutako Erabakiak (autonomia-erkidegoen hornitzaileei ordaintzeko aparteko finantzazio-mekanismoaren ildo orokorrak ezartzekoak) araututako esparruaren barruan ordaindu diren ordainketa-obligazioei eta arau honek mekanismo horren luzapenerako arautzen duen esparruaren barruan ordaintzen direnei.

## II. KAPITULUA

### **Merkataritza-eragiketen berankortasunari aurre egiteko neurriak**

33. artikulua. *Aldatu egiten da abenduaren 29ko 3/2004 Legea, merkataritza-eragiketen berankortasunari aurre egiteko neurriak ezartzen dituen.*

Bat. Aldatu egiten da 4. artikulua:

«4. artikulua. *Ordaintzeko epea zehaztea.*

1. Kontratuan ez bada ordaintzeko egunik edo eperik hitzartu, salgaiak jaso edo zerbitzuak hartu diren dataren hurrengo hogeita hamar egun naturaleko epea izango du zordunak ordainketa-obligazioa betetzeko, baita faktura edo ordainketa-eskaera aurretiaz jaso duen kasuetan ere.

Salgaiak egiaz jaso diren edo zerbitzuak egiaz eman diren eguna igaro ondoren hamabost egun bete baino lehen helarazi behar diete hornitzaileek bezeroei haiei dagokien faktura edo fakturaren baliokidea den ordainketa-eskaera.

Ordainketa-epea hitzartu bada kontratuan, ordainketa-epearen hasieratik izango ditu ondoreak bitarteko elektronikoen bidez hartutako fakturak, baldin eta, betiere, behar bezala bermatu badira sinatzailearen nortasuna eta izenpearen benetakotasuna, fakturaren osotasuna eta interesatuak hura jaso duela.

2. Legeak araututa edo kontratuan hitzartuta dagoelako, onarpen- edo egiaztapen-prozedura bat ezarri bada hartutako ondasunek edo jasotako zerbitzuek kontratuan xedatutakoarekiko adostasuna egiaztatzeko, prozedura horrek ezingo du iraun hogeita hamar egun natural baino gehiago, ondasunak hartu edo zerbitzuak eman diren egunetik aurrera. Kasu horietan, ordainketa-epea hogeita hamar eguneko izango da ondasunak edo zerbitzuak onartu edo egiaztatzen diren egunetik aurrera, eta, epe hori zehazteko, ez da kontuan hartuko onarpenaren edo egiaztapenaren aurretik ala ondoren jaso izan den faktura edo ordainketa-eskaera.

3. Kontratuko aldeek luzatu egin ditzakete, hitzarmen bidez, aurreko puntuetan adierazitako ordainketa-epeak, baina ezingo dute inoiz ere hitzartu 60 egun naturaletik gorako eperik.

4. Fakturak multzoka daitezke gehienez hamabost eguneko epe baten barruan, epe horretan egindako entrega guztiak hartuko dituen faktura batean, aldizkako faktura-laburpenak eginez, edo haiek agiri bakar batean bildu, haien ordainketa errazteko, fakturak aldizka multzokatuta. Eta ordainketa-epearen hasierako data izango da, kasuan kasu, aldizkako faktura-laburpenaren epearen edo fakturen aldizkako multzokatze-epearen erdiko egunari dagokiona. Ordainketa-epeak, berriz, ezin du izan hirurogei egun naturaletik gorakoa, egun horretatik aurrera.»

Bi. Lerroalde berri hau eransten da 6. artikuluaaren amaieran:

«Kontratuko aldeek ordainketa-egutegiak hitzartu badituzte epekako ordainketak egiteko, epe horietakoren bat ez bada adostutako egunean ordaintzen, muga-egunera iritsi diren zenbatekoen gainean soilik kalkulatu dira lege honek arautzen dituen interesak eta konpentsazioak.»

Hiru. Honela idatzita geratuko da 7. artikulua 2. puntuko lehen erroaldea:

«2. Zordunak berandutzagatik ordaindu beharreko legezko interes-tasa egutegian dagokion seihilekoaren lehen eguna baino lehen Europako Banku Zentralak bere azken finantzazio-eragiketa nagusiari aplikatutakoa izango da, zortzi puntu portzentual gehituta.»

Lau. Honela idatzita geratuko da 8. artikuluko 1. puntua:

«1. Zorduna berandutza-egoeran sartzen bada, zordunarengandik 40 euroko zenbateko finkoa jasotzeko eskubidea izango du hartzekodunak. Zor printzipalari gehituko zaio zenbateko hori, berariaz hura eskatu beharrik izan gabe.

Horrez gainera, zordunaren berankortasunaren ondorioz egiazta daitezkeen kobrantza-kostuengatik kalte-ordain bat erreklama diezaioke hartzekodunak zordunari, kostu horiek aurreko erroaldean adierazitako zenbatekotik gorakoak badira.»

Bost. Honela idatzita geratuko dira 9. artikuluko izenburua eta haren 1. paragrafoa:

«9. artikulua. *Neurriz kanpoko klausulak eta jardunak.*

1. Ordaintzeko dataekin edo epearekin, berandutzagatik interes-tasarekin edo kobrantza-kostuen konpentsazioarekin lotutako praktika edo kontratuzko klausulek ez dute baliorik izango horiek hartzekodunaren kaltean neurritz kanpokoak direnean, betiere kasuaren egoera guztiak eta honako hauek kontuan hartuta:

a) Merkataritza-praktika egokien desbideratze larriak, fede onaren eta jarduketa leialaren aurkakoak.

b) Ondasunaren edo zerbitzuaren izaera.

c) Zordunak 7. artikulua 2. paragrafoan jasotzen den legezko berandutzagatik interes-tasatik edo 8. artikulua 1. paragrafoan adierazten den zenbateko finkotik urruntzeko arrazoi objektiboren bat duenean.

Horrez gainera, klausula edo jardunbideren bat hartzekodunarentzat abusuzkoa ote den erabakitzeko, kontuan izango da, kasu zehatzaren ezaugarri guztiei erreparatu ondoren, ea ordainketa horrek zordunari likidezia gehigarri bat emango ote dion zordunaren kontura, edo kontratista nagusia ote den haren hornitzaileei edo azpikontrastei ordainketa-baldintza justifikatu gabeak ezartzen dizkiena, haren onurarako ezarriak izan direlako edo beste arrazoi objektiboren bat eman delako.

Edonola ere, 6. artikuluan berandutzagatik interesak eskatzeko ezarritako baldintzen aurkakoak diren aldean artean hitzartutako klausula edo praktika oro bidegabekoa izango da, bai eta 8. artikuluan aurreikusitako kobrantza-kostuengatik kalte-ordainen edo berandutza-tasa horren kobrantza kanpo uzten duten klausulak edo praktikak ere. Era berean, baliogabetzat joko dira berandutza-interesa kanpo uzten duten praktikak edo aldeek hitzartutako klausulak eta praktikak, baita 7. artikulua 2. paragrafoan izaera ordezkatzailerak duten eta berandutza-interesaren legezko tasari buruzkoak diren bestelako klausulak eta praktikak ere, horiek hartzekodunaren kalterako neurritz kanpoko edukia dutenean; neurritz kanpoko klausula edo praktikatzat hartuko dira, orobat, hitzartutako interesa berandutzagatik legezko interesaren % 70 baino txikiagoa denean, artikulua honetan aurreikusitako egoerak kontuan hartuta, aplikatutako interesa neurritz kanpoko ez dela frogatu daitezkeen kasuan izan ezik.»

## IV. TITULUA

**Trenbide-sektoreko neurriak**

34. artikulua. *Estatuko trenbide-sarearen administratzaileari, Trenbide Azpiegituren Administratzaileari (ADIF), eskualdatzea Estatuko trenbide-sarearen titulartasuna.*

1. Estatuaren titulartasunpeko sarea osatzen duten trenbide-azpiegiturak eta geltokiak (ADIFI agindu zaio azpiegitura eta geltoki horien administrazioa) Trenbide Azpiegituren Administratzailearen (ADIF) titulartasunpera pasatuko dira, lege hau indarrean jartzen denetik aurrera.

Aurreko lerroaldean adierazten diren ondasunen titulartasun-aldaketak Kontularitzako Informazio Sistemarik eta Sustapen Ministerioko erregistroetatik ondorioztatzen den balioaren truke egingo dira.

2. Ondasun horiek administratu, berritu eta haietan hobekuntzak egiteko, Trenbide Azpiegituren Administratzaile ADIF enpresa-erakunde publikoak transferentzia korrontekak eta kapital-transferentziak jaso ditzake Estatuko Aurrekontu Orokorretatik eta beste herri-administrazio batzuen aurrekontuetatik.

Sarea administratzeko oinarrizko irizpideak finkatuko ditu Sustapen Ministerioak, lortu behar diren xedeak eta helburuak zehaztuko ditu, eta zerbitzuaren kalitate-mailak adieraziko.

Estatuko Administrazioako Kontu-hartzailatza Orokorrek egiaztatuko du, finantza-kontrol iraunkorrerako eginkizunen barruan eta urteko auditoria-planak aintzat hartuta, Trenbide Azpiegituren Administratzaileari (ADIF) esleitutako funtsen aplikazioa.

3. Xedapen hau aplikatzeko egiten diren eskualdaketek ez dute Estatuko, autonomia-erkidegoko edo tokiko zergarik ordainduko, autonomia-erkidegoei lagatako zergak barne, eta ezingo zaie eskualdaketa horiei aplikatu martxoaren 5eko 2/2004 Legegintzako Errege Dekretuaren bidez onartu zen Toki Ogasunak Arautzeko Legearen Testu Bategineko 9.2. artikulua arautzen duena.

Eskualdaketa, egintza juridiko eta eragiketa horiek, era berean, salbuetsita izango dituzte fede-emaile publikoek eta jabetzako eta merkataritzako erregistroetara egindako esku-hartzeengatik arielak edo ordainsariak.

35. artikulua. *Ferrocarriles Españoles de Vía Estrecha (FEVE) enpresa-erakunde publikoaren iraungipenaren kontularitza-ondoreak.*

Kontularitza-alorrean, Ferrocarriles Españoles de Vía Estrecha (FEVE) enpresa-erakunde publikoaren azkentze-data 2013ko urtarrilaren 1a izango da.

Ondorioz, erakunde horren azken ekitaldi ekonomikoa 2012ko abenduaren 31n itxitakotzat joko da.

36. artikulua. *Trenbide-azpiegitura eta -zerbitzuen arloan zenbait neurri ezartzen dituen uztailaren 20ko 22/2012 Errege Lege Dekretuak 1.1 artikuluko a) eta b) letretan adierazten dituen Estatuko merkataritza-sozietateek trenbide-garraioko zerbitzuak ematea.*

1. Trenbide-azpiegitura eta -zerbitzuen arloan zenbait neurri ezartzen dituen uztailaren 20ko 22/2012 Errege Lege Dekretuak 1.1 artikuluko a) eta b) letretan adierazten dituen Estatuko merkataritza-sozietateek jarraitu egingo dute, orain artean bezala eta etenik egin gabe, garraioak eta salgaiak trenbidez garraiatzeko zerbitzu guztiak, Renfe-Operadora erakundeari ustiatzea dagozkionak, azken horren benetako eraketa-datatik aurrera.

Zerbitzu horiek guztiak emateko, bere gain hartuko du enpresa-erakunde publikoa ordura arte ematen ari zen zerbitzuak emateko azpiegitura-ahalmena. Aurrerantzean, zuzenean eskuratu beharko dute trenbide-azpiegituren administratzailearengandik zerbitzuak emateko behar duten azpiegitura-gaitasuna, eta, horretarako, behar bezala

bete behar dute apirilaren 7ko FOM/897/2005 Agindua, Sarearen gaineko Adierazpenari eta trenbide-azpiegiturako gaitasuna esleitzeko prozedurari buruzkoa.

2. Ulertuko da trenbide-azpiegitura eta -zerbitzuen arloan zenbait neurri ezartzen dituen uztailaren 20ko 22/2012 Errege Lege Dekretuak 1.1 artikuluko a) eta b) letretan adierazten dituen Estatuko merkataritza-sozietateek eskuratuak dituztela trenbide-enpresa izateko lizentzia, Trenbideko Sektorearen Legeko 44. artikuluko araututakoa, eta segurtasun-ziurtagiria, Interes Orokorreko Trenbide Sareko zirkulazioaren segurtasunari buruzko Erregelamenduaren 16. artikuluko adierazitakoa, ustiatzen dituzten zerbitzuen esparrurako. Hala ere, enpresa horiek zerbitzuak ustiatzen hasi eta sei hileko epean, Trenbide Sektorearen Legeko 45. artikuluko eta hura garatzeko arauak agintzen dituzten eskakizunak betetzen dituztela egiaztatu behar dute eta trenbide-enpresa izateko lizentziak eskatu. Horrez gainera, ustiapen-lanak hasi ondorengo urtea izango dute gehienez, segurtasun-kudeaketarako sistema bat dutela egiaztatzen duten dokumentuak aurkezteko, trenbide-zirkulazioaren, gidaritzako langileriaren eta gurpildun materialaren alorretan eskatzen diren baldintzak betetzen dituztela kreditatzeko eta dagokien segurtasun-ziurtagiria eskatzeko.

37. artikulua. *Trenbide Sektorearen azaroaren 17ko 39/2003 Legea aldatzea.*

1. Aldatu egiten da Trenbide Sektoreko azaroaren 17ko 39/2003 Legearen bederatzigarren xedapen gehigarriko 1. paragrafoa, eta honela idatzita geratuko da:

«1. Sei hileko epean Interes Orokorreko Trenbide Sareko Linea eta Bide-zatien Katalogoa emango du Sustapen Ministerioak, Trenbide Sektoreko Legearen 4. artikuluko arautzen dituen irizpideak betez. Katalogo horrek linea eta bide-zatien zerrenda ezarriko du, Trenbideetako Zuzendaritza Orokorra adierazitako kode ofizialaren arabera. Linea eta bide-zatien jatorria eta helmuga adieraziko dira katalogoan, haien ezaugarri teknikoen azalpen labur batez lagunduta.

Katalogo horretan zerrendatuko dira, alde batetik, interes orokorreko lineak eta bide-zatiak, eta, bestetik, aurreko zerrenda hartatik aparteko eranskin batean, Trenbide Sektorearen Legeko 4. artikuluko arautzen dituen baldintzak bete ez arren, aldi baterako Trenbide Sektorearen Legeko araubidearen arabera administratuko diren lineak eta bide-zatiak, harik eta, autonomia-erkidegoek Estatuko Administrazio Orokorri eskabidea egin ondoren, aparteko eranskin horretan adierazten diren linea eta bide-zatien eskualdaketa gauzatzen den arte.

Katalogo hori egiteko eta katalogoan aldaketak egiteko, entzun egin behar zaie trenbide-linea eta trenbide-zati horiek zati batean edo haien ibiltarte osoan igarotzen dituzten autonomia-erkidegoei.»

2. Trenbide Sektorearen azaroaren 17ko 39/2003 Legeko hirugarren xedapen iragankorri 2., 3., 4. eta 5. puntu berri hauek gehitzen zaizkio:

«2. Xedapen honen 1. paragrafoan arautzen dena betetzeko izango bada ere, lehiatzaileei irekiko zaie estatu-eskumenpeko bidaiarien trenbide bidezko garraio-zerbitzua emateko aukera, sektoreko zerbitzuak, haien segurtasuna eta sektorearen antolamendua bermatzeko.

3. Hori horrela, 2013ko uztailaren 31tik aurrera, lehia askeko erregimenean emango dira bidaiarien trenbide-garraioko zerbitzuak, baldin eta, nagusiki, xede turistikoa baldin badute. Lege honetako 42.2 artikuluko arautzen duena betez egingo da hori guztia.

Lege honetan, nagusiki, xede turistikoa duten bidaiarien trenbide-garraioko zerbitzuak izango dira, aldizkako izaera izan hala ez, trenean eskainitako jarleku guztiak alde aurretik bidaia-agentziaren batek saldutako edo salmentan eskainitako konbinazio baten barruan ematen direnak prezio oso baten barruan. Prezio oso horretan, trenbide-garraioko zerbitzuaz gain, beste zerbitzu batzuk eman behar dira, modu orokor batean asetzeko jolaseko, kulturako edo aisiako jarduerekin lotutako joan-etorriak egin nahi dituzten pertsonen beharrezan.

Adierazitako jarduera horien osagarri izan behar du trenbide-garraioko zerbitzuak. Ezingo dute xede hori izan nagusiki edo helburu bakartzat bidaiariak trenbidez garraiatzea xede duten jarduerak.

Sustapen Ministerioaren agindu bidez arautuko dira zerbitzu horiek emateko baldintzak.

4. Lege honetako 53.2 artikuluan zehazten diren lizitazio publikoen baldintzak ezarriko ditu Ministroen Kontseiluak 53. artikulua adierazten dituen trenbide-garraioko zerbitzuetarako, nahiz eta betetzekoa izango den, kasu guztietan, Europako Parlamentuak eta Kontseiluak 2007ko urriaren 23an eman zuten 1370/2007/EE Erregelamenduko 5.6 artikulua. Zerbitzua beste operadore batek ematen hasi bitartean, Renfe-Operadora erakundeak jarraituko du zerbitzu horiek ematen, eta kontratu bidez arautuko da, hala dagokion kasuan, eman beharrekoa izan daitekeen konpentsazioa.

5. Lege honen 42.2 artikulua araututakoa betetzekoa izango bada ere, xedapen honetako 3. eta 4. puntuan sartzan ez diren operadoreek, aldi batean, gaikuntza-tituluak eskuratu beharko dituzte zerbitzuak emateko.

Ministroen Kontseiluak zehaztuko du zenbat gaikuntza-titulu emango diren zerbitzua lehia-erregimenean emango den linea bakoitzean edo linea-multzo bakoitzean, bai eta gaikuntza-titulu horien indarraldia ere.

Sustapen Ministerioak emango ditu gaikuntza-tituluak, lizitazio-prozedurak egin ondoren. Publikoak izango dira prozedurak, eta operadore lehiatzaile guztien benetako lehia bermatuko dute.

Sustapen Ministerioaren agindu bidez zehaztuko dira aurreko lerroaldean adierazitako lizitazio-prozeduretan parte hartzeko bete beharko diren baldintzak eta eskakizunak, baliatuko diren esleipen-irizpideak eta prozedura horietako faseak. Kasu guztietan, betetzekoa izango da Europako Parlamentuak eta Kontseiluak 2007ko urriaren 23an eman zuten 1370/2007/EE Erregelamendua, bidaiariak trenbidez eta errepidez garraiatzeko zerbitzu publikoei buruzkoa, eta, Sustapen Ministerioak lizitazioak arautzeko agindua ematen ez duen bitartean, Sektore Publikoko Kontratuen Legea eta hura garatzeko arauak.

Zerbitzuak lurralde guztian emateko gaikuntza-titulua izango du RENFE-Operadora erakundeak, lizitazio-prozesuan parte hartu beharrik izan gabe.»

### 38. artikulua. *Interes Orokorreko Trenbide Sarea.*

Lege honen eranskinean zerrendatutakoak izango dira Interes Orokorreko Trenbide Sareko lineak eta bide-zatiak, harik eta Trenbide Sektorearen azaroaren 17ko 39/2003 Legeko bederatzigarren xedapen gehigarriak adierazten duen Interes Orokorreko Trenbide Sareko Lineen eta Bide-zatien Katalogoa onartzen den arte. Artikulu honetan adierazitako zerrenda eguneratzeko ahalmena ematen zaio Sustapen ministroari.

## V. TITULUA

### Hidrokarburoen sektorean hartzen diren neurriak

### 39. artikulua. *Hidrokarburoen Sektoreko urriaren 7ko 34/1998 Legea aldatzea.*

Aldaketa hauek egiten zaizkio Hidrokarburoen Sektoreko urriaren 7ko 34/1998 Legeari:

Bat. Honela idatzita geratuko da 41.1 artikulua:

«1. Lege honen 40 artikulua araututakoaren arabera baimenduak izan diren petrolio-produktuak gorde eta garraiatzeko instalazio finkoen titularrek hirugarrenen sarbidea ahalbidetu behar dute, prozedura negoziatuen bidez. Prozedura horien baldintza teknikoek gardenak, objektiboak eta ez-baztertzailak izan behar dute. Horrez gainera, argitara eman beharko dituzte aplikatzen dituzten prezio publikoak.

Gobernuak bidesariak eta sarbide-baldintzak ezar ditzake uharteetako lurraldeetarako, garraiorako eta biltegitratze-lanetarako bestelako azpiegiturak ez dauden lurralde nazionalako eremuetarako eta azpiegitura horiek desegokiak direla irizten den eremuetarako.

Petrolio-produktuak biltegitratu eta garraiatzeko instalazio finkoen titularrek baldintza hauek bete behar dituzte, baldin eta, aurreko lerroaldean araututakoaren arabera, hirugarrenen sarbidea ahalbidetu behar badute:

a) Energiaren Batzorde Nazionalari jakinarazi behar diote zer eskaera izan dituzten beren instalazioetara sartzeko, zer kontratu izenpetu dituzten, instalazio horiek erabiltzeagatik kobratzen dituzten prezioen zerrenda eta prezio horietan izaten diren aldaketak, hilabeteko gehienezko epean. Energiaren Batzorde Nazionalak argitaratu egingo du informazio hori, Lege honetako hamaikagarren xedapen gehigarriko hiru.4 puntuan agintzen den moduan.

b) Energiaren Batzorde Nazionalari aurkeztu behar diote zer tarifa-metodologia aplikatu duten, deskontu aplikagarrien tasak, hirugarrenak haien instalazioetara sartzeko sistemak eta urteko inbertsio-plana. Energiaren Batzorde Nazionalak zirkular bidez arautzen duen moduan argitaratuko da informazio hori.

c) Instalazioen edukiera erabilgarriari buruzko datu eguneratuak argitaratu behar dituzte, kontratatutako edukiera eta denbora-iraupena, egiaz erabilitako edukiera, erregistratutako kongestio fisiko eta kontratuzkoak, aurreikusitako handitze, hobekuntza eta aldaketak, eta jardunean hasteko egutegia. Energiaren Batzorde Nazionalak ikuskatuko du zer aldizkakotasunez gertatzen diren kontratuzko kongestioak, hau da, zer aldizkakotasunez geratzen diren erabiltzaileak instalazio horietara sartu ezinik, nahiz eta edukiera-ahalmen fisikoa izan instalazio horietan.

d) Instalazio horiek kudeatzean, akziodunen eta zerbitzuen erabiltzaileen arteko interes-gatazkak ekidingo dira, eta berariaz zainduko da tratu berdina ematen zaiela jarduerako zerbitzuen erabiltzaile guztiei, sozietatearen akziodunak diren ala ez aintzat hartu gabe.

Energiaren Batzorde Nazionalak zirkular bidez ezarriko du zer prozedura erabiliko den kontratu-negoiazioetako gatazken eta garraiorako edo biltegitratzeko instalazioetara sartzeko eskabideetan suerta daitezkeen gatazken berri emateko. Era berean, hiru hileko gehienezko epe batean ebatziko ditu petrolio-produktuak garraiatu edo biltegitratzeko instalazio horietara (hirugarrenen sarbidea bermatu behar duten instalazio horietara) sartzeko eskabideen eta kontratuen alorrean jakinarazten zaizkion gatazkek.»

Bi. Honela geratuko da idatzita 43.2 artikulua:

«2. Edozein pertsona fisiko edo juridikok egin dezake, askatasunez, petrolioaren karburanteak eta erregaiak txikizka banatzeko jarduera.

Jarduera horiek egiteko baliatzen diren instalazioek bete egin behar dituzte, instalazio horien segurtasun-baldintzak eta baldintza teknikoak arautzen dituzten jarraibide tekniko osagarriek agintzen dutenaren arabera, instalazio-mota bakoitzaren kontrol-egintzak eta, era berean, bete egin behar dute gainerako arau aplikagarriek agintzen dutena; bereziki, metrologiari eta metrotekninari buruzko alderdiak eta kontsumitzaileen eta erabiltzaileen babesari buruzkoak.

Autonomia-erkidegoetako administrazioek, haien eskumenen eremuan, bermatu egin behar dute prozedura bakarrean eta organo bakar baten aurrean egingo direla karburanteak txikizka hornitzeko instalazio horien ezarpena kontrolatzeko egintzak. Alderdi horiek bermatzeko, autonomia-erkidegoek arautuko dute zer prozedura baliatuko den eta zer autonomiako edo tokiko organok egingo, eta, hala badagokio, ebatziko duen hura. Instalazio horiek ezartzeko administrazio-



tramite guztiak koordinatuko ditu prozedura horrek, proiektu bakar batean oinarrituta.

Ebazpen hori eman eta jakinarazteko epea zortzi hilekoa izango da gehienez. Epe hori igarotzen bada berariazko ebazpenik jakinarazi gabe, aldeko ebazpena eman dela usteko da, Herri Administrazioen Araubide Juridiko eta Administrazio Prozedura Erkidearen azaroaren 26ko 30/1992 Legeak 43. artikuluan arautzen duen moduan.

Lurraldearen eta hirigintzaren plangintza egiteko tresnek ezingo dituzte arautu instalazioen alderdi teknikoak, ezta teknologia jakin batzuk eskatu ere.

Erregaiak txikizka hornitzeko instalazioen jarduera ekonomikoa bateragarria izango da, lurzorua erabilerari dagokionez, merkataritza-jarduera indibidual eta elkartuekin, merkataritza-zentroekin, merkataritza-parkeekin, ibilgailuen azterketa teknikoa egiteko establezimenduekin eta industrialde edo industria-poligoekin. Instalazio horiek bateragarriak izango dira, halaber, arrisku, hondakin-sorkuntza eta ingurumen-inpaktu antzerakoa duten jarduerak ezartzeko egokiak diren erabilerekin, berariaz zehaztu gabe zerbitzugunerako egokitasunaren kualifikazioa.

Aurreko lerrokadetan zehaztutakoa, Errepideei buruzko uztailaren 29ko 25/1988 Legean zehaztutakoari eta haren garapen-arauei kalterik egin gabe ulertu behar da.

Hiru. 43 bis artikulua berri hau gehitzen da:

«43 bis artikulua. *Esklusibotasunez hornitzeko kontratu-loturei ezarritako mugapenak.*

1. Esklusibotasunez hornitzeko kontratu-loturek baldintza hauek bete beharko dituzte:

a) Kontratuak urtebeteko iraupena izan behar dute gehienez. Kontratuak automatikoki luzatuko dira urtez urte, gehienez bi aldiz, salbu eta petrolio-produktuak txikizka banatzen dituenak hura amaitzeko asmoa adierazten badu, kontratuaren edo luzapenaren amaiera-data iritsi baino hilabeteko aurrerapenarekin gutxienez.

b) Kontratuak ezin dute eduki banaka edo bateratuta erregaiaren publikoarentzako salmenta-prezioa zuzenean edo zeharka finkatuko, gomendatuko edo harengan eragingo duen esklusibotasun-klausularik.

2. Deusezak izango dira eta jarri gabekotzat hartuko dira 1. puntuan adierazitakoaz bestelako kontratu-iraupenak hitzartzen dituzten kontratu-klausulak, erregaiaren salmenta-prezioa salneurri finko, gehieneko edo gomendatu jakin baten arabera ezartzen dutenak, eta salmenta-prezioa zeharkako moduren batean finkatzeko bide eman dezaketen gainerako kontratu-klausulak.

3. Handizkako operadoreek Energia Politika eta Meatzetako Zuzendaritza Nagusiari jakinaraziko diote mota horretako zer kontratu izenpetu dituzten eta horien amaierako data, eta Industria, Energia eta Turismoako Ministerioaren web-orri ofizialean argitaratuko da azken datu hori.

4. Artikulu honetan xedatutakoa ez da aplikagarria izango saltzaileak kontratu bidezko ondasunak edo zerbitzuak hornitzailearen jabetzakoak diren lokaletan eta lursailetan saltzen dituenean.»

Lau. Bi lerroalde hauek gehitzen zaizkio 109.1 artikuluari.

«ad) Petrolio-produktuak biltegitatu eta garraiatzeko instalazioak norberarentzat hartzea eta haien edukieratik nabarmen behera erabiltzea, baldin eta, Lege honetako 41. artikulua arautzen duenaren arabera, hirugarrenen sarbidea baimendu behar badute.

ae) 43 bis.1 artikulua arautzen dituen mugak eta obligazioak urratzea.»

Bost. Honela idatzita geratuko da 43. artikuluko lehen puntua:

«3. Handizkako operadoreen eta ibilgailuen hornidurarako instalazioen jabeen artean egindako hornidura eskusiboko akordioetako baldintzen artean behar bezala jasoko da aipatutako produktu horien salmenta irmoa, jabeek hala eskatuz gero.

Petrolio-erregaiak txikizka banatzen edo hornitzen dituzten enpresek beren betebeharrak betetzen dituztela egiaztatzeko dokumentazioa eta egiaztapena eskatu beharko diete instalazioan bertan kontsumitzeko instalazio finkoen titularrei.

Hornidura eskusiboko kontratuzko loturen arabera, ibilgailuentzako erregai-hornidurarako instalazioak beren marka-irudia bertan ezarria duen operadore bakar batek hornitzen dituztenean, hark kontsumitzaileei emandako erregaien jatorria, bolumena eta kalitatearen kontrolerako ikuskapen- edo jarraipen-sistema egokiak eta instalazioa hornitutakoei dagozkiela egiaztatzeko sistemak ezarri ahal izango ditu, kontratuan jasotako gainerako gaitasunei kalterik egin gabe.

Operadoreek agintari eskudunei jakinarazi beharko diete kontsumitzaileari iruzurrezkoak izan lekizkiokeen desbideratzerik ikusten badute, eta hala badagokio, egiaztatze-jardunei uko egiten bazaie.

Egoera horietan, eskumena duen administrazioak beharrezko neurriak hartu beharko ditu kontsumitzaileen eta erabiltzaileen interesak babesten direla bermatzeko.»

40. artikulua. *Ondasun eta Zerbitzuen Merkatuetan Lehia Handitzeko Premiazko Neurriak ematen dituen ekainaren 23ko 6/2000 Errege Lege Dekretua aldatzea.*

Ondasun eta Zerbitzuen Merkatuetan Lehia Handitzeko Premiazko Neurriak ematen dituen ekainaren 23ko 6/2000 Errege Lege Dekretua aldatu egingo da, eta honela idatzita geratuko da haren 3. artikulua:

«3. artikulua. *Ibilgailuei erregaiak txikizka hornitzeko instalazioak merkataritza-establezimenduetan eta enpresa- eta industria-jarduerak egiteko bestelako eremuetan.*

1. Ibilgailuei petrolio-produktuak hornitzeko instalazio bat izan dezakete, gutxienez, merkataritza-establezimendu indibidual eta elkartuek, merkataritza-zentroek, merkataritza-parkeek, ibilgailuen azterketa teknikoa egiteko establezimenduek eta industrialde edo industria-poligonoek.

2. Aurreko puntuak adierazten dituen kasuetan, jarduteko behar dituen udal-lizentziak eskuratzen baditu establezimenduak, eskuratuak izango ditu, haiek jasotzearekin batera, petrolio-produktuak hornitzeko instalazioak jartzeko behar diren lizentziak.

3. Udal-organoak ezingo du ukatu zerbitzuguneak edo ibilgailuei erregaiak hornitzeko unitateak jartzea aurrez aipatutako establezimendu eta eremuetan, baldin eta hori ukatzeko arrazoi bakarria berariaz horretarako kualifikazioa duen lurzorurik ez izatea bada.

4. Erregaiak hornitzeko instalazioaren azalera ez da zenbatuko instalazio hori dagoen merkataritza-establezimenduaren erakusketako eta publikoarentzako salmentarako azalera erabilgarrian, azken horien merkataritzako sektore-araubideari dagokionez.»

41. artikulua. *Biokarburanteen salmentako edo kontsumoko nahitaezko gutxieneko helburuak 2013. urterako eta ondorengo urteetarako.*

1. Subjektu hauek dute ezarri diren helburuak bete dituztela egiaztatzeko betebeharra:

a) Hidrokarburoen sektoreari buruzko urriaren 7ko 34/1998 Legeak arautzen dituen handizkako operadoreek, urtean eta merkatu nazionalean egin dituzten salmentengatik, handizkako beste operadoreei egindako salmenten kasuan izan ezik.

b) Petrolio-produktuak txikizka banatzen dituzten enpresek, urriaren 7ko 34/1998 Legeko 43. artikuluan araututako jarduera egiten duten neurrian, merkatu nazionalean eta urtean handizkako operadoreen hornidura jaso gabe egiten dituzten salmentengatik.

c) Petrolio-produktuen kontsumitzaileek, handizkako operadoreek eta petrolio-produktuak txikizka hornitzen dituzten enpresek, hornitu gabeko urteko kontsumoaren zatiarengatik.

2. Artikulu honetako 1. puntuan adierazten diren subjektuek ziurtapena egiteko erakundeari kreditatu behar diote, urtero, 2013. urterako eta ondorengo urteetarako, honako titulartasun hauek:

a) Bioerregai-ziurtagirien gutxieneko kopuru baten gaineko titulartasuna, bioerregaien ehuneko 4,1 saltzearen helburua betetzeko adinakoa.

b) Diesel (CBD) bioerregai-ziurtagirien gutxieneko kopuru baten gaineko titulartasuna, diesel bioerregaien ehuneko 4,1 saltzearen helburua betetzeko adinakoa.

c) Gasolina (CBG) bioerregai-ziurtagirien gutxieneko kopuru baten gaineko titulartasuna, gasolina bioerregaien ehuneko 3,9 saltzearen helburua betetzeko adinakoa.

Salbuespenez, 2013. urtean, gasolina bioerregaien gaineko helburu hori 3,8koa izango da artikuluko 1. paragrafoan adierazten diren subjektuentzat, Kanarietan, Ceutan eta Melillan egindako salmenta eta kontsumoengatik.

3. Artikulu honen aurreko paragrafoetan adierazi diren ehunekoak kalkulatzeko, urriaren 9ko ITC/2877/2008 Aginduak –garraioan bioerregaiak eta beste erregai berriztagarri batzuen erabilpena sustatzeko mekanismo bat ezartzen duenak– araututako formulak erabiliko dira, edo Industria, Energia eta Turismo Ministerioak, Gobernuaren Ekonomia Gaietarako Batzorde Delegatuaren alde aurreko erabakia jaso ondoren, agindu bidez arautzen dituenak.

4. Gobernuak aldatu egin ditzake artikulu honetan arautzen diren helburuak eta beste helburu batzuk ezar ditzake.

42. artikulua. *Azaroaren 4ko 1597/2011 Errege Dekretua aldatzea. Errege-dekretu horrek bioerregai eta biolikidoetarako iraunkortasun-irizpideak, Iraunkortasuna Egiaztatzeko Sistema Nazionala eta bioerregai batzuen balio bikoitza arautzen ditu.*

Xedapen iragankor bakarreko lehen puntua aldatzen zaio azaroaren 4ko 1597/2011 Errege Dekretuari –bioerregai eta biolikidoetarako iraunkortasun-irizpideak, Iraunkortasuna Egiaztatzeko Sistema Nazionala eta bioerregai batzuen balio bikoitza arautzen ditu errege-dekretu horrek–, eta honela idatzita geratuko da:

«1. Gabealdi bat ezartzen da bioerregaien eta biolikidoen iraunkortasuna egiaztatzeko aldi iragankorraren aplikazioan.

Energiaren Estatu Idazkaritzaren titularraren ebazpen bidez erabakiko da zer egunetan amaituko den gabealdia. Ebazpen hori Estatuko Aldizkari Ofizialean argitaratuko da, hura indarrean sartu baino zotzi hilabete lehenago, gutxienez.

Gabealdian, adierazletzat joko dira errege-dekretu honen 4. artikuluan arautzen diren iraunkortasun-irizpideak. Xedapen iragankor honen 2. puntuan adierazten diren zirkularrek eskatzen duten informazio guztia igorri behar dute 10. artikuluan adierazten diren subjektu behartuek, eta informazio horrek egiazkoa izan behar du; hala ere, ez da iraunkortasun-baldintzak betetzea eskatuko bioerregaien salmenta eta kontsumoko betebeharrak eta helburuetarako.

Gabealdian, ez da derrigorrean bete beharrekoa izango xedapen iragankor honen 4. puntuan arautzen dena; hala ere, bioerregaien eta biolikidoen Iraunkortasuna Egiaztatzeko Sistema Nazionaleko eragile ekonomikoek bost urtez gorde behar dituzte, gutxienez, Energiaren Batzorde Nazionalera igortzen duten informazioari dagozkion frogak.

Errege-dekretu honen 12. artikuluko 1. puntuak adierazten dituen ikuskapenek helburu bakarra izango dute gabealdian; alde batetik, eragile guztiak errege-dekretu

honetako 7. artikuluan arautzen den masa-balantzeko sistema behar bezala eta Energiaren Batzorde Nazionalak horri buruz emandako zirkularrek adierazitako moduan aplikatzen ari direla egiaztatzea, eta, bestetik, aplikatutako informazioaren egiazkotasuna konprobatzea. Gabealdiaren amaierara arte, ez da zehapen-espediterik abiaraziko egindako ikuskapenen ondorioz; hala ere, espeditenteak irekiko dira baldin eta ez bada eskatutako informaziorik bidaltzen, datu faltsuak bidaltzen badira edo masa-balantzea ez bada behar bezala aplikatzen.

Gabealdi hori amaitzean, aldi iragankor bati ekingo zaio bioerregaien eta biolikidoen iraunkortasuna egiaztatzeko, eta aldi iragankor hori indarrean izango da harik eta bioerregaien eta biolikidoen iraunkortasuna egiaztatzeko sistema nazionala garatzeko behar diren xedapenak onartzen diren arte, azken xedapenetako hirugarrenaren 1.a) eta 1.b) puntuetan arautzen dena betez, eta errege-dekretu honetan arautzen dena aplikatzeko beharrezkoak diren xedapenak onartzen diren arte, xedapen horren beraren 3. eta 5. puntuetan arautzen den moduan. Aldi horretan, betetzekoak izango dira xedapen gehigarri honen 2. paragrafotik 5. paragrafora arautzen direnak.»

Lehen xedapen gehigarria. *Gizarte Segurantzako kotizazioen hobarien eta murriztapenen finantzazioa, aplikazioa eta kontrola.*

1. Estatuko Enplegu Zerbitzu Publikoaren dagokion aurrekontu-partidaren eta Gizarte Segurantzako sarreren aurrekontuen kontura finantzatuko dira, hurrenez hurren, lege honek araututako hobariak eta kuota-murriztapenak.

2. Enplegatzaileek modu automatikoa aplikatuko dituzte kotizazio-agirietan Gizarte Segurantzako kuoten hobariak eta murriztapenak; hala ere, Lan eta Gizarte Segurantzako Ikuskaritzak, Gizarte Segurantzako Diruzaintza Orokorrak eta Estatuko Enplegu Zerbitzuak kontrolak eta berrikuspenak egin ditzakete, haien eskumen-esparruetan.

3. Gizarte Segurantzako Diruzaintza Orokorrak hileroko adieraziko dio Estatuko Enplegu Zerbitzu Publikoari zenbat langilek jaso dituzten hobariak Gizarte Segurantzako kuotetan, eta datu horiek banakatuta emango dizkio hobaria jaso duten kolektiboen arabera; horrez gainera, haien kotizazio-oinarriak adieraziko dizkio eta zer kenkari aplikatu zaizkien Estatuko Enplegu Zerbitzu Publikoak finantzatutako enplegu-sustapenerako programen barruan.

4. Aldizkakotasun horrekin berarekin, Estatuko Enplegu Zerbitzu Publikoaren Zuzendaritza Orokorrak honako informazio hau emango dio Lan eta Gizarte Segurantzako Ikuskaritzaren Zuzendaritza Orokorriari: jakinarazi zaizkion kontratuetatik zenbatek jaso duten hobaria kuotan, kolektiboen arabera banakatuta, eta, horrez gain, haien kotizazioei eta aplikatu zaizkien murriztapenei buruzko informazioa emango dio. Azken informazio horrek behar adinakoa izan behar du zuzendaritza orokor horrek ikuskapen-jardueren plangintza eta programazioa egin dezan, eta, era berean, egokitasunez zaintzeko hobarien onuradunek behar bezala aplikatzen dituztela hobariak enplegua sustatzeko programetan.

Bigarren xedapen gehigarria. *Enpresa-ekimeneko eta Gazte Enplegurako 2013-2016 Estrategiaren jarraipena eta ebaluazioa egiteko ministerio arteko batzordea.*

Gobernuak ministerio arteko batzorde bat eratuko du lege hau indarrean jarri ondorengo hiru hileko gehienezko epean, Enpresa-ekimeneko eta Gazte Enplegurako 2013-2016 Estrategiaren jarraipena egiteko. Erregelamendu bidez arautuko da zer osaera eta funtzio izango dituen batzorde horrek. Enplegu eta Lan Kontuatarako Konferentzia Sektorialaren bitartez, batzorde horrek Estrategiaren garapenaren berri emango die autonomia-erkidegoei. Batzorde hori Enplegu eta Gizarte Segurantzako Ministerioaren langilez, bitarteko teknikoaz eta aurrekontuaz hornituko da eta horiekin egingo du lan. Batzordeak 2016ko abenduaren 31ra arte egingo du lan eta egun horretan desegingo da.

Hirugarren xedapen gehigarria. Enpresa-ekimeneko eta Gazte Enplegurako Estrategiara atxikitzea.

1. Enplegu eta Gizarte Segurantzako Ministerioak, enpresaren gizarte-erantzukizunaren arloan dituen eskumenen esparruan, enpresa publikoak nahiz pribatuak Ekintzailtza eta Gazte Enplegurako 2013-2016 Estrategiara atxikitzea formalizatu ahal izango du; hark gazteen langabezia murrizteko egiten duen ekarpena aitortzeko –besteen konturako lan-txertaketa bidez, nahiz autoenpleguaren eta ekintzailtzaren bitartez– zigilu edo bereizgarri bat emango zaio.

2. Enplegu eta Gizarte Segurantzaren Ministerioak Estrategiara atxikitako enpresei buruzko informazioa, planteatutako ekimenen oinarritzko ezaugarriak eta horiek lortutako emaitza nagusiak jakinaraziko dizkiete, aldiaren behin, Enpresa-ekimeneko eta Gazte Enplegurako 2013-2016 Estrategiaren Jarraipena eta Ebaluazioa egiteko Ministerio arteko Batzordeari, Gai Ekonomikoetarako Gobernuaren Batzorde Delegatuari, autonomia-erkidegoei (Enplegu eta Lan Kontuetaarako Konferentzia Sektorialaren bitartez), gizarte-eragileei, Enpresen Gizarte Erantzukizuneko Estatuko Kontseiluari eta egokitzen jotzen diren organo aholku-emaileei.

Laugarren xedapen gehigarria. Banaketa-kontratuak egokitzeko epea.

Esklusibotasunez banatzeko kontratuak, hots, Hidrokarburoen sektoreari buruzko urriaren 7ko 34/1998 Legeko 43.bis artikulua araupean dauden kontratuak, egokitu egin behar dute lege honetara, berau indarrean sartu eta 12 hileko epean. Kontratu horiek ezin dute izan, zuzenean edo zeharka, berritzeko betebeharra ezartzen duen klausularik. Halakorik jartzen bada, deusezak izango dira.

Denbora-tarte hori ez da aplikagarria izango hornitzaileak lokalak edo lursailen errentamendu-kontratu bat indarrean duenean edo hirugarrenengoekiko eskubide erreal mugatu bat duenean, betiere berariazko hornidura-kontratuen iraupena lokal edo lursailen errentamendu-kontratuaren edo eskubide errealaren iraupena baino luzeagoa ez bada.

Bosgarren xedapen gehigarria. *Langileak lagatzeko kontratuak.*

Aldi baterako lanerako enpresak arautzen dituen ekainaren 1eko 14/1994 Legean xedatutakoari kalterik egin gabe, langileak lagatzeko kontratuak egin ahal izango dira, halaber, aldi baterako lanerako enpresen eta enpresa erabiltzailearen artean, enpresa erabiltzaileak gazte-enplegurako lehen lan-kontratuetaarako bete behar dituen egoera eta baldintza nahiz betebeharrak berberekin, Lege honetako 12. artikuluan jasotzen denari jarraikiz.

Seigarren xedapen gehigarria. *Ceuta eta Melilla Autonomia Estatutudun Hirietan bingo nahiz kirol- edo lehiaketa-ekitaldietako apustuetaarako tributu-oinarria aldatzea.*

Arau hau indarrean hasi denetik aurrera, eta araubide erkideko autonomia-erkidegoen eta autonomia-estatutua duten hirien finantzaketa-sistema arautzen duen abenduaren 18ko 22/2009 Legearen 50. artikuluan aurreikusitakoari jarraikiz, jokatutako zenbatekoen batura totalaren eta parte-hartzaileek jokoan lortutako sariaren zenbatekoaren arteko tartea izango da zozketa, tonbola, apustu eta ausazko konbinazioei dagokien tasaren tributu-oinarria, betiere Ceuta edo Melillako Hiri Autonomoetako Administrazioek kirol- edo lehiaketa-ekitaldietan apustu egitea baimentzen dutenean edo horiek baimentzeko eskudunak direnean, horiek baimenik gabe antolatu edo gauzatu diren kasuetan.

Autonomia Estatutudun Hiri horietako lurraldeetan antolatzen edo gauzatzen diren bingo presentzialen gaineko tributu-oinarria ere jokatutako zenbatekoari parte-hartzaileek lortutako sariaren zenbatekoa kentzean lortutakoa izango da.

Zazpigarren xedapen gehigarria. *Ceuta eta Melillako ekoizpenaren, zerbitzuen eta inportazioaren gaineko zerga onartzen duen martxoaren 25eko 8/1991 Legea aldatzea.*

Ceuta eta Melillako ekoizpenaren, zerbitzuen eta inportazioaren gaineko zerga onartzen duen martxoaren 25eko 8/1991 Legearen 9. artikulua aldatu da, eta honela idatzita geratu da:

«9. artikulua. *Salbuespenak ondasun-inportazioetan.*

Ceutan eta Melillan egiten diren behin betiko ondasun-inportazioak salbuetsita egongo dira, Balio Erantsiaren gaineko Zergaren araudi komunaren baldintza beretan, eta, aplikagarri direnak aurreko eragiketen pareko izango dira, salbuespen honi dagokionez.

Zehazki, bidaiari-erregimeneko ondasun-inportazioetan, salbuespena Balio Erantsiaren gaineko Zerga arautzen duen araudian bidaiari-erregimeneko ondasun-inportazioetarako aurreikusitako baldintza eta zenbateko beretan aplikatuko da. Ceuta eta Melilla hirietan zenbateko hori murriztu ahal izango da ordenantza fiskaletan; dena den, amaierako zenbatekoak ezin izango du 90,15 euro baino txikiagoa izan.»

Zortzigarren xedapen gehigarria. *Lanekoak ez diren praktiken arau-esparruaren egokitzapena.*

Lege hau onartu eta sei hilabeteko epean, Gobernuak txosten bat aurkeztuko du Diputatuen Kongresuan; bertan, lanekoak ez diren praktiken erabilera eta horiek lan-esperientziarik eta kualifikazio profesionalik gabeko gazteak lan-merkatura txertatzeko tresna gisa erabil daitezela sustatzeko hartu beharko liratekeen jarduketan eta/edo araudien aldaketak jasoko dira.

Bederatzigarren xedapen gehigarria. *Desgaitasunen bat duten pertsonak.*

Lege honetako 9, 10, 12, 13 eta 14. artikuluetan aurreikusitako kontratazio-pizgarriak aplikatuko dira % 33ko desgaitasuna edo handiagoa duten 35 urtetik beherako gazteak kontratatzen direnean, horiek artikulua horietan aurreikusitako gainerako baldintza guztiak betetzen badituzte.

Lege honetako 11. artikuluan aurreikusitako kontratazio-pizgarriak aplikatuko dira % 33ko desgaitasuna edo handiagoa duten 35 urtetik beherako gazteak kontratatzen direnean, horiek artikulua horietan aurreikusitako gainerako baldintza guztiak betetzen badituzte.

Lehen xedapen iragankorra. *Neurriak aldi baterako aplikatzea.*

Lege honetako 9. artikulutik 13. artikulura arautzen diren neurriak indarrean izango dira gure herrialdeko langabezia-tasa ehuneko 15etik behera jaitsi arte, Enplegu eta Gizarte Segurantzako Ministerioak erregelamendu bidez ezarritako moduan.

Bigarren xedapen iragankorra. *Indarrean dauden kontratuak eta pizgarriak.*

1. Indarreko lan-kontratuak lege hau indarrean jarri baino lehen egin badira eta hitzartuta badituzte Gizarte Segurantzako kuoten hobariak eta murriztapenak, kontratu horiek egin ziren garaian indarrean ziren arauen bidez arautuko dira, edo, kasuan kasu, hobaria edo murriztapena aplikatzen hasi zen garaian indarrean zeuden arauen bidez.

2. Lege honetako 9, 10, 12 eta 13. artikuluetan, bosgarren xedapen gehigarrian eta azken xedapenetako laugarrenean jasotzen dena aplikagarria izango zaie lan-kontratuei eta Gizarte Segurantzari ordaindu beharreko kuoten gainean baliatutako hobariei eta murriztapenei, kontratu horiek 2013ko otsailaren 24aren ondoren eta lege hau indarrean hasi aurretik sinatuak badira.



Hirugarren xedapen iragankorra. *Aurretik indarrean ziren kontratuak.*

Lege hau indarrean hasi aurretik indarrean ziren kontratuek merkataritza-eragiketen berankortasunari aurre egiteko neurriei buruzko abenduaren 29ko 3/2004 Legea bete beharko dute, lege honek egiten dituen aldaketak kontuan hartuta, hura «Estatuko Aldizkari Ofizialean» argitaratu eta urtebeteko epean.

Laugarren xedapen iragankorra. *Hornidura-instalazio berrietarako lizentziak.*

Ekainaren 23ko 6/2000 Errege Lege Dekretuak, Ondasun eta Zerbitzuen Merkatuetan Lehia Handitzeko Premiako Neurriak ematekoak, 3. artikuluan adierazten dituen establezimendu eta eremuetan hornidura-instalazioak eraikitzeke udal-lizentziak eskatzen badira, udal-lizentzia horiek administrazio-isiltasun bidez eman direla ulertuko da, baldin eta establezimendu eta zona horiek eskuratua baldin bazuten jarduerarako udal-lizentzia lege hau indarrean jarri zen garairako, eta ez bada berriazko ebazpen-jakinarazpenik egiten lizentzia-eskaera egin ondorego 45 egunen barruan. Epe hori igarota, instalazioa eraikitzeke lanak zer egunetan hasiko diren jakinaraziko dio sustatzaileak lizentzia hori emateko ardura duen agintariari.

Bosgarren xedapen iragankorra. *Esklusibotasun-kontratuak handizkako operadoreekin.*

1. Petrolio-produktuak handizka saldu eta ehuneko 30etik gorako merkatu-kuota duten operadoreek ezingo dute handitu jabetzan edo bestelako tituluren baten pean dituzten instalazioen kopurua, baldin eta instalazio horien kudeaketa zuzena edo zeharkakoa eskuratzea badakarkie, eta ezingo dituzte banaketa eskusiboko banaketa-kontratu berriak izenpetu ibilgailuentzako erregaiak eta karburanteak hornitzeko instalazioak ustiatzen dituzten txikizkako banatzaileekin, aintzat hartu gabe nork duen haiekiko titulartasuna edo eskubide erreala.

Aurreko paragrafoan araututakoa betetzekoa izango bada ere, aurretik izenpetuta zeuden kontratuak berri ditzakete operadoreek, nahiz eta aurrez adierazitako merkatu-kuota gainditu.

2. Merkatu-kuotaren ehuneko hori zenbatzeko, hauek hartuko dira kontuan:

a) Handizkako operadoreek edo enpresa-talde bereko operadoreek probintzia bakoitzeko banaketa-sarean ibilgailuei hornitzeko dituzten instalazioen kopurua. Penintsulatik kanpoko lurraldeetan, zenbaketa bereizita egingo da uharte bakoitzerako eta Ceuta eta Melillarako.

b) Banaketa-sare berekoak izango dira operadore nagusiak jabetza-erregimenean dituen instalazio guztiak, bai haien zuzeneko ustiapena dutenak, bai hirugarrenei edozein tituluren pean lagatakoak, bai operadoreak instalazioaren titularrarekin eskusiban eta handizka hornitzeko kontratuean izan ditzakeen instalazioak.

c) Aurreko atalean araututakoaren baitan, banaketa-sare berekoak izango dira ibilgailuei hornitzeko instalazioak, baldin eta talde bereko partaide den erakunderen bateko instalazioa bada, Merkataritza Kodeko 42. artikulua arautzen duenaren arabera.

3. Energia eta Meatze Politikako zuzendari nagusiaren ebazpen bidez zehaztuko da urtero petrolio-produktuak handizka eta araututako ehunekoaz gaindiko merkatu-kuotarekin banatzen dituzten operadoreen zerrenda. Estatuko Aldizkari Ofizialean argitaratuko da ebazpen hau.»

4. Bost urteko epean, edo merkatuaren bilakaeran eta sektorearen enpresa-egiturak horretarako bide ematen duenean, 1. paragrafoan adierazitako ehunekoa berrius dezake Gobernuak, edo xedapen honek ezarritako debekua bertan behera uztea erabaki dezake.

Seigarren xedapen iragankorra. *Gizon eta emakumeen arteko tratu-berdintasunaren arloko aldaketan ondorioak abian jartzea.*

Azken xedapenetako hamahirugarrenean eta hamalaugarrenean xedatutakoa aplikagarria izango zaie 2012ko abenduaren 21aren ondoren sinatutako kontratuetatik eratorritako pentsio eta aseguru pribatuei, borondatezkoei nahiz lan-arloko independenteei eta antzeko finantza-zerbitzuei.

Horri dagokionez, 2012ko abenduaren 21aren ondoren sinatutako kontratu gisa hartuko dira alderdi guztien onespina duten eta egun horretatik aurrera egiten diren kontratuen aldaketak, luzapenak, berrespenak edo kontratu-izaerako gainerako adierazpenak.

Xedapen indargabetzailea. *Arauk indargabetzea.*

Indargabetu egiten da ekainaren 23ko 6/2000 Errege Lege Dekretuko –ondasunen eta zerbitzuen merkatuetan premiazko lehiakortasuna handitzeko neurriak arautzekoa– lehen xedapen iragankorra.

Era berean, indargabetu egiten dira lege honek araututakoa aurkaratzen duten maila bereko eta beheragoko arauak.

Azken xedapenetako lehena. *Konstituzio-oinarria.*

Espainiako Konstituzioko 149.1.7, 149.1.17 eta 149.1.18 artikuluetan oinarrituta arautzen da lege honen I. titulua, eskumen eskusiboa ematen baitiote Estatuari lan-arloko legediari dagozkion gaiak arautzeko (nahiz eta autonomia-erkidegoetako organoen eskumena izan daitekeen legedi hori betearaztea), Gizarte Segurantzaren oinarritzko legegintza eta araubide ekonomikoa ezartzeko (kasu honetan ere, Gizarte Segurantzako zerbitzuak betearazteko eskumenak izan ditzakete autonomia erkidegoek), eta, hurrenez hurren, administrazio-kontratuei eta -emakidei buruzko oinarritzko legedia emateko.

Arau honen II. titulua eman da Konstituzioaren 149.1.11 artikulua kredituak, bankuak eta aseguruak antolatzeke oinarrien alorrean Estatuari esleitzen dizkion eskumenen babesean.

Toki-erakundearen eta autonomia-erkidegoen hornitzaileei ordaintzeko finantzazio-mekanismoaren fase berria zabaltzeko neurrien xede dira obrak, hornidurak eta zerbitzuak kontratatzeagatik sortzen diren ordainketa-betebeharrak; beraz, eskumena, kasu honetan, Espainiako Konstituzioko 149.1.18 artikulutik eratorria da; izan ere, artikulua horrek Estatuaren esku uzten du administrazio-kontratuei eta -emakidei buruzko oinarritzko legedia emateko eskumen eskusiboa.

Horrenbestez, eskumen-titulu horrek gaitzen du Estatu oinarritzko arauak emateko, enpresaburuek eta Administrazio Publikoak izenpetutako administrazio-kontratuen ondoriozko merkataritza-eragiketetan sortutako zorren ordainketen berandutza-egoerak prebenitzeko.

Hala ere, toki-ogasunetan eragiten duten artikulua Espainiako Konstituzioaren 149.1.14 artikuluan oinarritzen dira, Ogasun orokorrekiko eta Estatuaren zorrarekiko eskumen eskusiboa ematen baitiote Estatuari. Hala, kasu honetan, lehenetsunez aplikatu behar da artikulua hori, 149.1.18 artikulua aurretik.

Era berean, 149.1.14 artikulua da autonomia-erkidegoek informazioa emateko eta fakturak ordaintzeko betetzeko izango duten prozeduraren berezitasunak arautzeko eskumen-oinarria.

Arau honetako III. tituluko II. kapitulua Espainiako Konstituzioko 149.1.6 eta 8 artikuluetan oinarrituta eman da, merkataritzako eta arlo zibileko legegintza-eskumena ematen baitiote Estatuari.

Espainiako Konstituzioko 149.1. 21 eta 24 artikuluetan oinarrituta eman da IV. titulua, estatuaren esku uzten baitute autonomia-erkidego bat baino gehiagotik igarotzen diren trenbide eta lur-garraioekiko eskumena eta interes orokorreko herri-lanen gainekoa.

Lege honen V. tituluan xedatzen diren arauak oinarritzko izaera dute, Espainiako Konstituzioak, 149.1.13. eta 25. artikuluen bidez, Estatuaren esku uzten dituen eskumenak baliatuz eman baitira. Artikulu horiek jarduera ekonomikoaren plangintza orokorraren oinarriak ezarri eta koordinatzeko eskumena eta meatzeen eta energiaren araubideen oinarriak ezartzeko eskumena arautzen dute, hurrenez hurren.

Lege honetako seigarren xedapen iragankorrean eta azken xedapenetako hamahirugarrenean eta hamalagarrenean xedatutakoa oinarritzkoa da, Konstituzioaren 149.1.1 artikulua Estuari egozten dizkion eskumenen esparruan emana baita, zeinak Estuari espainiar guztien berdintasuna bermatuko duten oinarritzko baldintzen arauketa esleitzen baitio. Espainiako Konstituzioaren 149.1.11 eta 13 lerroek Estatuaren esku uzten dute jarduera ekonomikoaren plangintza orokorraren koordinazioa eta aseguruaren antolamendu-oinarriak finkatzeko eskumen eksklusiboa.

Lan-legediari buruzko azken xedapenetako laugarrena Konstituzioaren 149.1.7 artikuluen babespean emana da.

Azken xedapenetako bigarrena. *Martxoaren 24ko 1/1995 Legegintzako Errege Dekretuaren bidez onartutako Langileen Estatutu Legearen Testu Bategina aldatzea.*

Kendu egiten zaio azkenengo leerroaldea martxoaren 24ko 1/1995 Legegintzako Errege Dekretuaren bidez onartutako Langileen Estatutuko 11.1 artikuluko c) letrari, eta honela idatzita geratuko da letra hori:

«c) Titulu edo profesionaltasun-ziurtagiri bakarra dela bide, ezein langile egon ahal izango da bi urtetik gora, enpresa bakarrean edo gehiagotan, praktikako kontratuarekin.

Ildo berean, nahiz eta titulu edo profesionaltasun-ziurtagiri ezberdinak erabili kontratuak egiteko, guztira, praktikak egiten ari diren langileek bi urterako kontratuak egin ditzakete gehienez enpresa jakin bateko lanpostu jakin batean aritzeko.

Artikulu honen ondorioetarako, unibertsitate-ikasketei dagozkien gradu-, master- eta doktorego-ikasketen tituluak ez dira hartu behar titulu bakartzat, kasu honetan izan ezik: praktikak egiteko lehenengo kontratua egiten dutenerako, langileek goi-mailako dagokion titulua dutenean.»

Azken xedapenetako hirugarrena. *Aldi baterako lan enpresak arautzen dituen ekainaren 1eko 14/1994 Legea aldatzea.*

Aldaketa hau egiten zaio ekainaren 1eko 14/1994 Legeari –14/1994 Legea, aldi baterako lan enpresak arautzekoa–:

Bat. Honela idatzita geratuko da 6. artikuluko 2. paragrafoa:

«2. Langileak besteren zerbitzuean jartzeko kontratuak egin ditzakete aldi baterako lan-enpresek eta horien erabiltzaile diren enpresek, enpresa erabiltzaileak iraupen jakineko kontratu bat egitean balia ditzakeen egoera berdinetan eta baldintza eta eskakizun berdinak beteta, Langileen Estatutuen 15. artikuluan xedatutakoarekin bat etorritik.

Halaber, langileak besteren zerbitzuean jartzeko kontratuak egin ditzakete aldi baterako lan-enpresek eta horien erabiltzaile diren enpresek, enpresa erabiltzaileak prestakuntzarako eta ikasketarako kontratu bat egitean balia ditzakeen egoera berdinetan eta baldintza eta eskakizun berdinak beteta, Langileen Estatutuen 11.2 artikuluan xedatutakoarekin bat etorritik.»

Bi. Aldatu egiten da 7. artikuluko 1. paragrafoa, eta honela idatzita geratuko da:

«1. Besteren zerbitzuean jartzeko kontratuaren iraupenaren alorrean, Langileen Estatutuko 11.2 eta 15 artikuluek eta haiek garatzeko xedapenek

besteren zerbitzuean jartzeko kontratuari buruz arautzen dutena aplikatuko da, nahiz eta betetzekoak izango diren Lege honetako 12.3 artikulua zerbitzuak eman aurretik izan daitezkeen prestakuntza-aldiei buruz arautzen dituenak.»

Hiru. Honela idatzita geratuko da 10. artikuluko 2. paragrafoa:

«2. Aldi baterako lan-enpresek prestakuntzarako eta ikaskuntzarako kontratuak egin ditzakete haien erabiltzaile diren enpresen zerbitzuean kontratatutako langileekin, prestakuntzarako eta ikaskuntzarako kontratuen araubidearen arabera.»

Lau. Paragrafo berri hau gehitzen zaio 12. artikuluko 3 bis paragrafoari:

«3 bis artikulua. Aldi baterako lan-enpresek prestakuntzarako eta ikaskuntzarako kontratuak egiten badituzte haien erabiltzaile diren enpresen zerbitzuean jartzeko kontratatu dituen langileekin, aldi baterako lan-enpresa horiek bete egin behar dituzte Langileen Estatutuko 11.2 artikulua eta haren garapeneko araudiak prestakuntzaren alorrean arautzen dituen betebeharrak.»

Bost. Honela idatzita geratuko da 11. artikuluko 2. paragrafoa:

«2. Kontratua denbora jakin baterako eta Langileen Estatutuko 49.1.c) artikuluan adierazten diren egoeretan gauzatu bada, langileak kalte-ordain ekonomiko bat jasotzeko eskubidea izango du horien erabiltzaile diren enpresen zerbitzuean jartzeko kontratua amaitzean. Honako hau izango da, hain zuzen, kalte-ordain ekonomiko hori: zerbitzuko urte bakoitzeko soldatako hamabi egun ordaintzetik ateratzen zen zenbatekoaren edo, hala badagokio, arau aplikagarrietan zehatutako zenbatekoaren zati proportzionala. Kalte-ordaina proportzionalki banatu ahal izango da kontratua indarrean den bitartean.»

Azken xedapenetako laugarrena. *Lan-merkatua aldatzeko premiazko neurriei buruzko uztailaren 6ko 3/2012 Legearen 3. artikulua aldatzea.*

Lan-merkatua aldatzeko premiazko neurriei buruzko uztailaren 6ko 3/2012 Legearen 3.2 artikulua aldatu da, eta honela idatzita geratu da:

«2. Hasierako iraupena edo iraupen luzatua amaitu ostean prestakuntzarako eta ikaskuntzarako kontratu horiek kontratu amaigabe bihurtzen dituzten enpresek, horiek egiten diren data dena dela, 1.500 euroko murriztapena aplikatu ahal izango dute, urtero, Gizarte Segurantzari ordaindu beharreko enpresa-kuotan; halere, hiru urtetan zehar aplikatu ahal izango dute murriztapena. Emakumeen kasuan, murriztapen hori 1.800 eurokoa izango da urtean.

Prestakuntzarako eta ikaskuntzarako kontratatutako eta enpresa erabiltzaileen zerbitzura jarritako langileen kasuan, horiek murriztapen bera aplikatzeko eskubidea izango dute, baldintza beretan eta etenik gabe, langile horiekin lan-kontratu mugagabeak egiten direnean.»

Azken xedapenetako bosgarrena. *Azaroaren 8ko 1529/2012 Errege Dekretua aldatzea. Errege-dekretu horrek prestakuntzarako eta ikasketarako kontratua garatu eta bitariko lanbide-heziketaren oinarriak ezartzen ditu.*

Aldatu egiten da prestakuntzarako eta ikasketarako kontratua garatu eta bitariko lanbide-heziketaren oinarriak ezartzen dituen azaroaren 8ko 1529/2012 Errege Dekretua, eta honela idatzita geratuko da:

Bat. Errege-dekretuari 6 bis artikulua hau gehituko zaio:

«6 bis artikulua. *Aldi baterako lan-enpresek egindako prestakuntzarako eta ikaskuntzarako kontratuak.*

Aldi baterako lan-enpresek prestakuntzarako eta ikaskuntzarako kontratuak egin ditzakete haien erabiltzaile diren enpresen zerbitzupean jartzeko kontratatutako langileekin, Langileen Estatutuko 11.2 artikulua eta errege-dekretu honek xedatutakoaren arabera.

Bereziki, aldi baterako lan-enpresaren ardurapekoak izango dira II. tituluko II. kapituluak prestakuntzarako eta ikaskuntzarako kontratuentzat arautzen dituen prestakuntza-alderdiekiko betebeharrak. Kontratuak bere baitan jasotzen duen prestakuntza aldi baterako lan-enpresan bertan eman daiteke, baldin eta 18.4 artikulua arautzen dituen baldintzak betetzen badira.»

Bi. Honela idatzita geratuko da 20. artikuluko 1. paragrafoa:

«1. Lan-jarduera nola egiten den zaindu behar du enpresako pertsona titularrak, bai eginkizun hori zuzenean bere gain hartuz lanbide-jarduera enpresan egiten baldin badu, bai tutoretza-lan hori egingo duen pertsona bat izendatuz enpresako langileen artetik. Kasu batean zein bestean, lanbide-kualifikazio edo -esperientzia egokia izan behar du arduradun horrek.

Prestakuntzarako eta ikaskuntzarako kontratuak egiten dituztenean aldi baterako lan-enpresek, aldi baterako lan-enpresak eta enpresa erabiltzaileak langilea azken horren zerbitzupean jartzeko egiten duten kontratuan adierazi behar da enpresa erabiltzaileko nork zainduko duen langilearen lan-jarduna. Arduradun hori izango da aldi baterako lan-enpresarekiko solaskidea alor horretan, eta aldi baterako lan-enpresak hartu beharko ditu bere gain kontratuak adierazten dituen tutoretzekiko gainerako obligazioak eta artikulua honek eta hurrengoak prestakuntza-jarduerarako xedatzen duen akordioari dagozkion betebeharrak.»

Azken xedapenetako seigarrena. *Europar Batasuneko zuzenbidea barneratzea.*

Lege honen bidez, Espainiako zuzenbidera ekartzen da Europako Parlamentuaren eta Kontseiluaren 2011ko otsailaren 16ko 2011/7/EE Zuzentaraua, zenbait neurri ezartzen dituen merkataritza-eragiketen berankortasunaren aurka.

Azken xedapenetako zazpigarrena. *Azaroaren 14ko 3/2011 Legegintzako Errege Dekretuaren bidez onartutako Sektore Publikoko Kontratuak Legeko testu bategina aldatzea.*

Bat. Honela idatzita geratuko da 216. artikuluko 4. puntua:

«4. Obra-ziurtagiriak onartu ondoren, edo ondasunak nahiz zerbitzuak kontratuan xedatutako moduan entregatu eta eman direla egiaztatzen duten agiriak eman ondoren, hogeita hamar egun izango ditu administrazioak prezioa ordaintzeko, hargatik eragotzi gabe 222.4 artikuluan ezarritako epe berezia; administrazioa prezioa ordaintzen atzeratzen bada, berandutze-interesak eta kobrantza-kostuen kalte-ordainak ordaindu behar dizkio kontratistari epe hori igarotakoan, Merkataritza-eragiketarako Berankortasunaren aurkako Neurriak ezartzen dituen abenduaren 29ko 3/2004 Legean ezarritakoaren arabera. Interesen sorrerako epea abiarazteko, kontratistak bete egin behar du fakturak dagokion administrazio-erregistroan garai eta modu egokian aurkezteko betebeharra. Obligazio hori hogeita hamar eguneko epean bete behar du, salgaiak egiaz entregatu edo prestazioa egiaz eman duen egunetik aurrera.

Arau honetako 222.4 eta 235.1 artikuluek araututakoa betetzeari utzi gabe, Administrazioak obra-ziurtagiriak eta ondasunak edo zerbitzuak kontratuan hitzartutako moduan entregatu eta eman direla egiaztatzen duten agiriak eman

behar ditu, haiek egiaz entregatu edo eman ondorengo hogeita hamar egunen barruan, salbu eta berariaz bestelakorik hitzartu bada kontratuan edo lizitazioa arautzen duten agirietan.

Edonola ere, kontratistak ez badu betetzen fakturak administrazio-erregistroan aurkezteko epea, interesen sorrera ez da hasiko harik eta hogeita hamar egun igarotzen diren arte faktura dagokion erregistroan aurkezten den egunetik, baldin eta Administrazioak ez badu fakturarekiko onarpenik eman, eta ez badu, kasuan kasu, haren ordainketarik egin.»

Bi. Honela idatzita geratuko da 222. artikuluko 4. paragrafoa:

«4. Obra-kontratuetan izan ezik (235. artikuluan xedatutakoa aplikatuko zaie), harrera- edo adostasun-akta jaso ondorengo hogeita hamar eguneko epearen barruan erabaki eta jakinarazi behar zaio kontratistari kontratuaren likidazioa eta, hala behar badu, hari dagokion saldoa ordaindu. Hala ere, harrera hori gertatu ondorengo egunen batean jasotzen badu faktura herri-administrazioak, kontratistak faktura hori dagokion erregistroan aurkezten duen egunetik aurrera kontatuko da hogeita hamar eguneko epea. Likidatutako saldoa ordaintzen berandutuz gero, kontratistak berandutza-interesak eta kobrantza-kostuen kalte-ordainak jasotzeko eskubidea edukiko du, Merkataritza-eragiketetako Berankortasunaren aurkako Neurriak ezartzen dituen abenduaren 29ko 3/2004 Legean jasotakoaren arabera.»

Hiru. Honela idatzita geratuko da 228. artikuluko 5. puntua:

«5. Kontratistak artikuluko honetan ezarritakoak baino ordaintze-epe luzeagoak itundu ahal izango ditu hornitzaile eta azpikontratatzaleekin, betiere merkataritza-eragiketetako berankortasunaren aurkako neurriak ezartzen dituen abenduaren 29ko 3/2004 Legearen 4.3 artikuluan jasotako mugak betetzen badira eta itun hori egitea gehiegizko klausula ez bada, abenduaren 29ko 3/2004 Legearen 9. artikuluan ezarritako irizpideen arabera; gainera, ordainketa kanbio-akzioari lotutako agiri negoziagarri baten bidez egin beharko da, eta haren deskontu- edo negoziazio-gastu guztiak kontratistaren kontura ordainduko dira. Horrez gain, ordainketa abal baten bidez bermatzeko eskatu ahal izango du hornitzaileak edo azpikontratatzaleak.»

Lau. Honela idatzita geratuko da hamaseigarren xedapen gehigarriko 1. paragrafoko f) letra:

«f) Administrazio-organoen eta enpresa lizitzaile edo kontratisten egintza edo borondate-adierazpen guztiak, kontratazio-fasean zehar eman eta ondorio juridikoak dituztenak, sinadura elektronikoa aitortu baten bidez kautotu behar dira, Sinadura Elektronikoari buruzko abenduaren 19ko 59/2003 Legearen arabera. Erabiltzen diren bitarteko elektroniko, informatiko eta telematikoek bermatu egin behar dute sinadura arau honetako xedapenekin bat datorrela.

Hori eragotzi gabe, kontratazio-prozeduretan egiten diren fakturek haiei aplikagarri zaien araubide berezian xedatutakoaren arabera arautuko dira.»

Bost. Hogeita hamahirugarren xedapen gehigarri berri bat gehitzen da:

«Hogeita hamahirugarren xedapen gehigarria. *Fakturak administrazio-erregistro batean aurkezteko eta organoak identifikatzeko betebeharra.*

1. Emandako zerbitzuengatik edo entregatutako ondasunengatik fakturak dagokion administrazio-erregistroan aurkezteko obligazioa du kontratistak, haiek tramitatzeko eskumendun diren administrazio-organoen edo -unitateetara igortzeko.

2. Xedapen hau indarrean sartu ondoren onartzen diren kontratuen administrazio-baldintzen agirietan, alderdi hauek adieraziko dira, fakturetan jaso



daitezen: herri-kontularitzaren alorrean eskumendun den administrazio-organoaren identifikazioa, kontratazio-organoaren identifikazioa eta hartzailearen datuak.»

Azken xedapenetako zortzigarrena. *Ordezko zuzenbidea.*

Lege honen III. tituluko I. kapituluan arautzen ez diren alderdiak arautzeko, ordezko araubide moduan aplikatuko dira 4/2012 Errege Lege Dekretua, otsailaren 24koa, toki-administrazioko entitateen hornitzaileei ordaintzeko finantzaketa-mekanismo bat ezartzeko informazio-betebeharrak eta beharrezko prozedurak ezartzen dituen, 7/2012 Errege Lege Dekretua, martxoaren 9koa, hornitzaileei ordaintzeko finantzaketa-funtsa sortzen duena, eta Politika Fiskal eta Finantzarioko Kontseiluak 2012ko martxoaren 6an hartutako Erabakia, autonomia-erkidegoen hornitzaileei ordaintzeko aparteko finantzazio-mekanismoaren ildo orokorrak ezarri zituen.

Azken xedapenetako bederatzigarrena. *Hornitzaileei ordaintzeko finantzaketa-funtsa sortzen duen martxoaren 9ko 7/2012 Errege Lege Dekretua aldatzea.*

Aldatu egiten da Hornitzaileei ordaintzeko finantzaketa-funtsa sortzen duen martxoaren 9ko 7/2012 Errege Lege Dekretuko 9. artikulua, eta honela idatzita geratuko da:

«9. artikulua. *Ordaintze-agentea.*

Kreditu Ofizialeko Institutua arduratuko da errege lege-dekretu honen araupean egiten diren eragiketak administratzeaz eta kudeatzeaz, Funtsaren kontularitza eramateaz eta Funtsaren Kontseilu Errektoreak haren esku utz ditzakeen finantza-kudeaketako eta kudeaketa arrunteko bestelako zerbitzuak emateaz, dagokion konpentsazio ekonomikoa ordainduz.»

Azken xedapenetako hamargarrena. *Administrazio publikoetako eta finantza-esparruko likidezia-neurriei buruzko uztailaren 13ko 21/2012 Errege Lege Dekretua aldatzea.*

Aldatu egiten da Administrazio publikoetako eta finantza-esparruko likidezia-neurriei buruzko uztailaren 13ko 21/2012 Errege Lege Dekretuko 15. artikulua, eta honela idatzita geratuko da:

«15. artikulua. *Araubide komuneko autonomia-erkidegoen finantza-sistemako baliabideak atxikitzea.*

Mekanismo horrekin bat egiten duten araubide erkideko autonomia erkidegoek erantzun egin beharko diete Estatuarekin hartutako obligazioei, atxikitze bidez, Autonomia Erkidegoen finantziarioari buruzko irailaren 22ko 8/1980 Lege Organikoak zortzigarren xedapen gehigarrian ezarritakoarekin bat etorritik. Horrek guztiak ez du eragotziko alde anitzeko finantza-instituzioekiko zorpetze-eragiketen ondoriozko betebeharrak betetzea eta doikuntza-planean jasota dauden finantza-zorpetzeko eragiketen ondoriozko gainerako betebeharrak betetzea.»

Azken xedapenetako hamaikagarrena. *Araugintzarako gaikuntza eta erregelamendu bidezko garapena.*

Lege honek arautzen duena garatu eta betetzeko xedapenak emateko gaikuntza ematen zaie, beren eskumenen eremuan, Gobernuari eta Justizia, Ogasun eta Herri Administrazioetako Ministerioaren titularrari, Sustapen, Enplegu eta Gizarte Segurantzako Ministerioaren titularrari, Industria, Energia eta Turismoko Ministerioaren titularrari eta Ekonomia eta Lehiakortasun Ministerioako titularrari.

Azken xedapenetako hamabigarrena. *Erregelamendu bidezko xedapenak aldatzea.*

Lege hau indarrean jarri ondoren, aldaketak egin behar badira lege honek aldatzen dituen erregelamenduetan, aldatzekoak diren arau horiei dagozkien erregelamendumailako arauen bidez egin ahal izango dira aldaketa horiek.

Azken xedapenetako hamahirugarrena. *Emakumeen eta gizonen berdintasun eraginkorrerako martxoaren 22ko 3/2007 Lege Organikoa aldatzea.*

Honela idatzita geratu da emakumeen eta gizonen berdintasun eraginkorrerako martxoaren 22ko 3/2007 Lege Organikoa:

«Bat. 71. artikularen 1. paragrafoko bigarren lerrokada ezabatu da. Faktore aktuarialak.

Bi. Bosgarren xedapen iragankorra ezabatu da. Hilkortasun- eta biziraupentaulak.»

Azken xedapenetako hamalagarrena. *Urriaren 29ko 6/2004 Legegintzako Errege Dekretuak onartutako aseguru pribatuak antolatzeari eta gainbegiratzeari buruzko testu bategina aldatzea.*

Urriaren 29ko 6/2004 Legegintzako Errege Dekretuak onartutako aseguru pribatuak antolatzeari eta gainbegiratzeari buruzko Legearen testu bategina aldatu da eta hamabigarren xedapen gehigarria gehitu da, honako hau dioena:

«Hamabigarren xedapen gehigarria. *Emakumeen eta gizonen arteko tratu-berdintasuna.*

Ondasunak eta zerbitzuak eta horien horniketa eskuratzerakoan gizonen eta emakumeen arteko tratu-berdintasunaren printzipioa ezartzen duen Kontseiluaren 2004ko abenduaren 13ko 2004/13/EE Zuzentarauaren aplikazio-esparruaren barnean, aseguru-kontratuen tarifak kalkulatzeko orduan aseguratuena prima eta prestazioetan ezin izango dira emakume eta gizonen arteko desberdintasunak ezarri, sexua kalkulurako faktore gisa hartzen dutenean.»

Azken xedapenetako hamabosgarrena. *Indarrean hastea.*

Lege hau «Estatuko Aldizkari Ofizialean» argitaratzen den egunaren biharamunean hasiko da indarrean.

Horrenbestez,

Lege hau betetzeko eta betearazteko agintzen diet espainiar guztiei, norbanakoei eta agintariei.

Madriren, 2013ko uztailaren 26an.

JUAN CARLOS E.

Gobernuko presidentea  
MARIANO RAJOY BREY

## I. ERANSKINA

Interes Orokorreko Trenbide Sarea osatzen dute:

a) Taula honetan adierazten diren linea eta bide-zatiek:

Linea	Jatorria	Helmuga
010	MADRIL-ATOCHAKO ATEA.	SEVILLA-SANTA JUSTA.
012	MADRIL-ATOCHAKO ATEA.	ATOCHAKO LOTUNEA.
016	MAJARABIQUE.	MAJARABIQUEKO ALDAGAILUA.
018	CERRO NEGRO/STA. CATALINA LOTUNEA.	CERRO NEGRO TTG ET.
020	LA SAGRA.	TOLEDO.
022	ALCOLEAKO ALDAGAILUA	ALCOLEAKO ALDAGAILUKO LOTUNEA
024	YELES 34,397 KM-KO ORRATZA.	BLANCALES LOTUNEA.
030	MALAGA-A. V. LOTUNEA	MARIA ZAMBRANO.
032	ANTEQUERA-SANTA ANA.	ANTEQUERAKO ALDAGAILUA.
040	TORREJON DE VELASCO LOTUNEA.	VALENTZIA-JOQUIN SOROLLA.
042	ALBACETEKO LOTUNEA	ALBACETE-LOS LLANOS.
050	ADIF - TP FERRO. MUGA	MADRIL-ATOCHAKO ATEA.
052	PLASENCIA DE JALON ALDAGAILUA.	PLASENCIA DE JALON ALDAGAILURAKO LOTUNEA.
054	CANAL IMPERIAL LOTUNEA.	MONCASI LOTUNEA.
056	ARTESA DE LLEIDA LOTUNEA.	LES TORRES DE SANUI LOTUNEA.
060	ZARAGOZA-DELICIAS ALDAGAILUKO LOTUNEA.	ZARAGOZA-DELICIAS ALDAGAILUA.
066	CAN TUNIS-A. V LOTUNEA.	CAN TUNIS-A. V.
068	VALLECAS AV - 12,300 KM-KO ORRATZA.	LOS GAVILANES - 13,400 KM-KO ORRATZA.
070	HUESCAKO LOTUNEA.	HUESCA.
072	FUENCARRAL TTG AV.	MADRIL-CHAMARTIN ALDAGAILUA.
074	MEDINA DEL CAMPOKO ALDAGAILUA.	OLMEDO-AV.- 133.9 KM-KO ORRATZA
076	VALDESTILLASEKO ALDAGAILUA.	VALDESTILLASEKO ALDAGAILURAKO LOTUNEA.
078	VALLADOLID C. GRANDE ALDAGAILUA.	VALLADOLID-CAMPO GRANDE.
080	VALLADOLID-CAMPO GRANDE.	MADRIL-CHAMARTIN.
082	A GRANDEIRA AG. 85,0 KM-KO LOTUNEA.	COTO DA TORRE LOTUNEA.
100	HENDAIA/IRUN MUGA.	MADRIL-CHAMARTIN.
102	ARANDAKO LOTUNEA.	MADRIL-CHAMARTIN.
104	ALCOBENDAS-S. SEBASTIAN DE LOS REYES.	UNIBERTSITATEA-CANTOBLANCO.
106	HENDAIA/IRUN MUGA	IRUN.
108	VALLADOLID-CAMPO GRANDE.	LA CARRERA (ZLK).
110	SEGOVIA.	VILLALBA DE GUADARRAMA.
112	MADRIL-HENDAIA LINEAKO LOTUNEA.	VALLADOLID-ARGALES.
116	LOS COTOS.	CERCEDILLA.
120	VILAR FORMOSO/FUENTES DE OÑORO MUGA.	MEDINA DEL CAMPO.
122	SALAMANCA.	AVILA.
124	SALAMANCA.	VALDUNCIEL (ZLK).
126	ARANDA DE DUERO-MONTECILLO.	ARANDA DE DUERO-CHELVA (ZLK.).
130	GIJON-SANZ CRESPO.	VENTA DE BAÑOS.
132	TUTERA-VEGUIN LOTUNEA.	ABLAÑA.
134	LEONGO SAILK. BAZTERBIDEA.	TORNEROS.
138	GALIZIA LOTUNEA.	LEONGO BASE LOTUNEA.
140	TUTERA-VEGUIN LOTUNEA.	ENTREGO.
142	SOTO DE REY.	OLLONIEGOKO LOTUNEA.
144	SAN JUAN DE NIEVA.	ASTURIASEKO VILLABONA.
146	VIELLAKO LOTUNEA.	PEÑA RUBIAKO LOTUNEA.
148	TRASONA.	NUBLEDO.
150	ABOÑO.	SERIN.

Linea	Jatorria	Helmuga
152	GIJON-PORTUA.	VERIÑA.
154	LUGO DE LLANERA.	TUTERA-VEGUIN.
160	SANTANDER.	PALENTZIA.
162	SOLVAY FAKTORIA (ZLK).	SIERRAPANDO (GLK).
164	PALENTZIA ARROYO VILLALOBON.	MAGAZ.
166	RUBENAKO LOTUNEA.	VILLAFRIA.
168	VILLAFRIA.	RUBENAKO LOTUNEA- 377,3 KM-KO ORRATZA.
172	MADRIL-CHAMARTIN ALDAGAILUA.	MADRIL-CHAMARTIN.
174	MEDINA DEL CAMPO.	MEDINA DEL CAMPOKO ALDAGAILUA.
176	VALDESTILLAS.	VALDESTILLASEKO ALDAGAILUA.
178	VALLADOLID- 250.2 KM-KO ORRATZA.	VALLADOLID C. GRANDE ALDAGAILUA.
200	MADRIL-CHAMARTIN.	BARNA.– FRANÇAKO GELTOKIA.
202	TORRALBA.	CASTEJON DE EBRO.
204	CANFRANCEKO LOTUNEA.	CANFRANC.
208	SAN JUAN DE MOZARRIFAR.	SAN GREGORIO.
210	MIRAFLORES.	TARRAGONA.
212	HOYA DE HUESCA-2,3 KM.	HOYA DE HUESCAKO LOTUNEA.
214	C.I.M. ZARAGOZAKO CIM	CARTUJA.
216	PLAZA LOTUNEA-1,4 KM-KO ORRATZA	PLAZA LOTUNEA-8,7 KM-KO ORRATZA
218	PLAZA LOTUNEA.	ZARAGOZA-PLAZA.
220	LLEIDA-PIRINEUS.	L'HOSPITALET DE LLOBREGAT.
222	TOUR DE CAROL-ENVEIGT/PUIGCERDÁ MUGA.	MONTCADA-BIFURCACIO.
224	CERDANYOLA UNIVERSITAT.	CERDANYOLA DEL VALLES.
230	LA PLANA-PICAMOIXONS.	REUS.
234	REUS.	CONSTANTI.
238	CASTELLBISBAL-LLOBREGATEKO ORRATZAK.	BARTZELONA-MORROT.
240	SANT VICENÇ DE CALDERS.	L'HOSPITALET DE LLOBREGAT.
242	MARTORELL-SEAT.	71,185 KM-KO ORRATZA.
244	70,477 KM-KO ORRATZA.	0,500 KM-KO ORRATZA.
246	MOLLET-SANT FOST.	CASTELLBISBAL-RUBIKO ORRATZAK.
250	BELLVITGE 674,8 KM-KO ORRATZA.	L'HOSPITALET DE LLOBREGAT.
254	AIREPORTUA.	EL PRAT DE LLOBREGAT.
260	FIGUERES-VILAFANT.	VILAMALLA.
262	SAGRERAKO LOTUNEA.	CLOTEKO LOTUNEA.
264	MONTCADA-BIFURCACIO.	AIGÜESEKO LOTUNEA.
266	GLORIAS LOTUNEA.	VILANOVAKO LOTUNEA.
268	SAGRERAKO LOTUNEA.	ARAGO LOTUNEA.
270	CERBERE/PORTBOU MUGA.	SAGRERAKO LOTUNEA.
274	CERBERE/PORTBOU MUGA.	PORTBOU.
276	MAÇANET-MASSANES.	SAGRERAKO LOTUNEA.
278	LA LLAGOSTA.	MOLLET GUNEKO LOTUNEA.
280	MOLLETEKO LOTUNEA.	MOLLET GUNEKO LOTUNEA.
282	PLASENCIA DE JALON ALDAGAILUA.	PLASENTZIA-308,6 KM-KO ORRATZA.
284	CIM-337,1 KM-KO ORRATZA.	CIM-0,7 KM-KO ORRATZA.
286	CARTUJA-23,3 KM-KO ORRATZA.	CARTUJA-351,1 KM-KO ORRATZA.
288	MIRAFLORES-345,6 KM-KO ORRATZA.	MIRAFLORES-0,9 KM-KO ORRATZA.
290	CIM-337,1 KM-KO ORRATZA.	ZARAGOZA-DELICIAS ALDAGAILUA.
294	RODA DE BARA- ZABALERA ALDAGAILUA.	RODA DE BARA.
298	GIRONA-MERCADERIES.	SALGAIEN GIRONAKO LOTUNEA.
300	MADRIL-CHAMARTIN.	VALENTZIA- NORD GELTOKIA.
302	146,1 KM-KO SAILK. ORRATZA.	ALCAZAR DE SAN JUAN.
304	ALFAFAR-BENETUSSER.	VFSL - 1,3 KM-KO ORRATZA.
306	SAN VICENTE DE RASPEIG.	S. VICENTE DE RASPEIG-448 KM-KO ORRATZA.

Linea	Jatorria	Helmuga
308	ALBACETE-LOS LLANOS.	ALBACETEKO ALDAGAILUA.
310	ARANJUEZ.	VALENTZIA - SANT ISIDRE.
312	CASTILLEJO-AÑOVER.	ALGODOR.
314	XIRIVELLA-L'ALTER (GLK).	VALENTZIA - SANT ISIDRE.
318	ALBACETEKO ALDAGAILUA.	ALBACETE- 279,4 KM-KO ORRATZA.
320	CHINCHILLA MONTEAR. 298,4 KM-KO ORRATZA.	CARTAGENA.
322	AGUILAS.	MURTZIAKO CARGAS.
324	0,8 KM-KO ORRATZA.	CARTAGENA.
326	523,2 KM-KO ORRATZA.	ESCOMBRERAS.
328	VALENTZIA-A. V.-396,7 KM-KO ORRATZA.	VALENTZIAKO ALDAGAILUA
330	LA ENCINA.	ALACANT-TERMINALA.
332	LA ENCINA-2,963 KM-KO ORRATZA.	CAUDETE.
334	SANT GABRIEL.	ALACANT-BENALUA (ZLK).
336	REGUERON.	ALACANT-TERMINALA.
338	VALENTZIAKO ALDAGAILUA.	VALENTZIA-JOQUIN SOROLLA.
340	VALLADAKO LOTUNEA.	XATIVA-47,0 KM-KO ORRATZA.
342	ALCOI.	XATIVA.
344	GANDIA.	SILLA.
346	GANDIA PORT.	GANDIA-MERCADERIES.
348	FORD.	SILLA.
360	LOS NIETOS.	CARTAGENA PZ BAS.
400	ALCAZAR DE SAN JUAN.	CADIZ.
402	ESPELUY-340,1 KM-KO ORRATZA.	JAEN.
404	ESPELUY-338,8 KM-KO ORRATZA.	ESPELUY-150,5 KM-KO ORRATZA.
406	LAS ALETAS.	CADIZKO UNIBERTSITATEA (GLK).
408	ALCOLEA-431,9 KM-KO ORRATZA.	ALCOLEAKO ALDAGAILUA
410	LINARES-BAEZA.	ALMERIA.
412	MINAS DEL MARQUESADO.	HUENEJA-DOLAR.
414	ALMERIAKO LOTUNEA.	GRANADAKO LOTUNEA.
416	MOREDA.	GRANADA.
418	ANTEQUERA-STA.ANA 50,4 KM-KO ORRATZA.	ANTEQUERA-STA.ANA 48,3 KM-KO ORRATZA.
420	LAS MARAVILLAS LOTUNEA.	ALGECIRAS.
422	UTRERAKO LOTUNEA.	FUENTE DE PIEDRA.
426	GRANADA.	FUENTE DE PIEDRA.
428	ANTEQUERAKO ALDAGAILUA.	ANTEQUERA-SANTA ANA 50,4 KM-KO ORRATZA.
430	CORDOBA - EL HIGUERON LOTUNEA.	LOS PRADOS.
432	CORDOBA-ZENTRALA.	HIGUERON.
434	CORDOBako ALDAGAILUA.	VALCHILLON.
436	FUENGIROLA.	MALAGA-ALAMEDA ZENTROA (GLK).
440	NARANJOS LOTUNEA.	HUELVA-TERMINO.
442	MAJARABIQUEKO ALDAGAILUA.	NARANJOS LOTUNEA.
444	TAMARGUILLOKO LOTUNEA.	LA SALUD.
446	CARTUJA LOTUNEA.	CARTUJA.
450	LA NEGRILLA LOTUNEA.	S. BERNARDO LOTUNEA.
452	SEVILLAKO PORTUA (ZLK).	LA SALUD.
454	MAJARABIQUEKO ALDAGAILUA.	SAN JERONIMOKO LOTUNEA.
456	LA SALUD-6,2 KM-KO ORRATZA.	LA SALUD-10,2 KM-KO ORRATZA.
458	MAJARABIQUE-GELTOKIA.	SAN JERONIMOKO LOTUNEA.
500	PLANETARIO LOTUNEA.	VALENCIA DE ALCANTARA.
504	VILLALUENGA-YUNCLER.	ALGODOR.
508	BADAJOS.	517,6 KM (MUGA).
510	ALJUCEN.	CACERES.
512	ZAFRA.	HUELVA-CARGAS.

Linea	Jatorria	Helmuga
514	ZAFRA.	JEREZ DE LOS CABALLEROS (ZLK).
516	MERIDA.	ROSALES.
520	CIUDAD REAL.	BADAJOS.
522	MANZANARES.	CIUDAD REAL.
524	CIUDAD REAL-MIGUELTURRA.	POBLETEKO LOTUNEA.
526	PUERTOLLANO.	PUERTOLLANO-FINDEGIA.
528	ALMORCHON.	MIRABUENO.
530	MONFRAGÜE.	PLASENTZIA.
532	MONFRAGÜE- 255,4 KM-KO ORRATZA.	MONFRAGÜE- 4,4 KM-KO ORRATZA.
600	VALENTZIA- NORD GELTOKIA.	SANT VICENÇ DE CALDERS.
602	VFSL - 2,3 KM-KO ORRATZA.	VALENTZIA PORTUA IPARRALDEA.
604	LES PALMES.	PORT DE CASTELLO.
606	VFSL - 1,3 KM-KO ORRATZA.	VALENTZIA PORTUA HEGOALDEA.
608	VALENTZIAKO SAILK.-F.S.L.	VFSL - 1,6 KM-KO ORRATZA.
610	SAGUNT.	TERUELGO LOTUNEA.
612	SAGUNT-28,3 KM-KO ORRATZA.	SAGUNT-268,8 KM-KO ORRATZA.
614	VALENTZIA-GELTOKIKO A.V. ORRATZA	VALENTZIA-JOQUIN SOROLLA.
620	TORTOSA.	L'ALDEA-AMPOSTA-TORTOSA.
622	272,0 KM-KO SAILK. ORRATZA.	TARRAGONA-CLASSIFICACIO.
624	100,4 KM-KO SAILK. ORRATZA.	TARRAGONA.
700	ABANDO PRIETO IND. INTERMODALA.	CASETAS.
702	CABAÑAS DE EBRO.	GRISEN.
704	ERRIOXAKO LOTUNEA.	GAZTELAKO LOTUNEA.
710	ALTSASU.	CASTEJON DE EBRO.
712	534,0 KM-KO LOTUNEA.	231,5 KM-KO LOTUNEA
720	SANTURTZI.	ABANDO PRIETO IND. INTERMODALA.
722	MUSKIZ.	DESERTU-BARAKALDO.
724	BILBAO SALGAIK.	SANTURTZI.
726	LA CASILLAKO LOTUNEA.	LOTUNEKO ORRATZA.
740	PRAVIA.	FERROL.
750	GIJON-SANZ CRESPO.	PRAVIA.
752	LAVIANA.	GIJON-SANZ CRESPO.
754	SOTIELLO.	MUSEL PORTUA.
756	SOTIELLO LOTUNE ADARRA.	VERIÑA LOTUNE ADARRA.
758	MARUCA SALGAIK.	AVILES PORTUA.
760	OVIEDO.	TRUBIA.
762	SOTO UDRION.	SAN ESTEBAN DE PRAVIA.
764	TRUBIA.	COLLANZO.
770	VALDECILLA LA MARGA.	OVIEDO.
772	LIERGANES.	OREJO.
774	PUERTO DE RAOS.	MALIAÑO (GLK).
776	RIBADESELLA PORTUA.	LLOVIO.
780	BILBAO CONCORDIA.	SANTANDER.
782	ARIZ.	BASURTOKO OSPITALEA.
784	LUTXANA-BARAKALDO.	IRAUREGI.
790	ARANGUREN.	ASUNCION UNIBERTSITATEA/LEON
792	MATALLANA.	LA ROBLA.
794	GUARDO.	TERMICA VELILLA.
800	A CORUÑA.	LEON.
802	TORAL DE LOS VADOS.	VILLAFRANCA DEL BIERZO (ZLK).
804	BETANZOS-INFESTA.	FERROL.
806	BAÑEZA.	ASTORGA.
810	CHAPELAKO LOTUNEA.	MONFORTE DE LEMOS.



Linea	Jatorria	Helmuga
812	VIGO-GUIXAR.	CHAPELAKO LOTUNEA.
814	GUILLAREI.	VALENCA DO MINHO/TUI MUGA.
816	GUILLAREI- 141,6 KM-KO ORRATZA.	GUILLAREI- 0,9 KM-KO ORRATZA.
820	ZAMORA.	MEDINA DEL CAMPO.
822	ZAMORA.	A CORUÑA.
824	REDONDELA.	SANTIAGO DE COMPOSTELA.
826	MEIRAMAKO ZENTRAL TERMIKOA.	CERCEDA-MEIRAMA.
828	FAXIL.	PORTAS.
830	UXESKO LOTUNEA.	SAN CRISTOBALGO LOTUNEA.
832	545,4 KM-KO ORRATZA.	SAN DIEGO LOTUNEA.
834	A CORUÑA-SAN DIEGO.	EL BURGOKO LOTUNEA.
836	LEON.	BERNESGA IBAIKO LOTUNEA.
838	TORNEROS LOTUNEA.	QUINTANA LOTUNEA.
840	CERCEDA-MEIRAMA.-000,729 KM-KO ORRATZA.	MEIRAMA-PICARDEL.
842	SAR IBAIKO LOTUNEA.	A GRANDEIRA 376,1 KM-KO LOTUNEA.
900	MADRIL-CHAMARTIN.	MADRIL-ATOCHA ALDIRIAK.
902	PITIS.	HORTALEZA.
904	FUENCARRALGO LOTUNEA.	FUENCARRAL-4.5 KM-KO ORRATZA.
906	FUENCARRAL-KONPLEXUA.	MADRIL-CHAMARTIN.
908	HORTALEZA.	AIREPORTUA-T4.
910	MADRIL-ATOCHA ALDIRIAK.	PINAR DE LAS ROZAS.
912	LAS MATAS.	PINAR DE LAS ROZAS.
914	CHAMARTINGO LOTUNEA.	P. PIO LOTUNEA.
916	DELICIAS.	MADRIL-SANTA CATALINA.
920	MOSTOLES - EL SOTO.	PARLA.
930	MADRIL-ATOCHA ALDIRIAK.	SAN FERNANDO DE HENARES.
932	MADRIL-ATOCHA ALDIRIAK.	MADRIL-SANTA CATALINA.
934	MADRID-ABROÑIGAL.	REBOLLEDOKO LOTUNEA.
936	SAN CRISTOBAL INDUSTRIAL.	VILLAVERDE BAJO.
938	MADRIL-ATOCHA ALDIRIAK.	MADRILGO ASAMBLEA -ENTREVIAS (GLK).
940	O'DONNELL.	VICALVARO-SAILK.
942	VILLAVERDE BAJO.	VALLECAS-INDUSTRIAL.
944	VICALVARO.	VICALVARO-SAILK.
946	MADRIL-SANTA CATALINA.	VILLAVERDE BAJO.
948	VICALVARO-SAILK. 3,007 KM-KO ORRATZA.	VICALVARO-SAILK. LOTUNEA.

b) Zerrenda honetan adierazten dira zer trenbide-azpiegitura dauden Interes Orokorreko Portuen esparruan:

- Pasaia.
- Bilbao.
- Santander.
- Gijon-Musel.
- Aviles.
- Ferrol eta Ferrolgo ibaia.
- A Coruña.
- Vilagarcía de Arousa.
- Marín eta Pontevedrako ibaia.
- Vigo eta Vigoko ibaia.
- Huelva.
- Sevilla eta Sevillako ibaia.
- Cadiz eta Cadizko badia.
- Algecirasgo badia.

- Malaga.
  - Almeria.
  - Cartagena (haren barruan sartzen da Escombreras izeneko dartsena).
  - Alacant.
  - Gandia.
  - Valentzia.
  - Sagunt.
  - Castellon.
  - Tarragona.
  - Bartzelona.
- c) Figueres eta Perpinyá nazioarteko sekzioko Figueres-Frantziako Muga bide-zatia.